



393905785 400



THE BOSTON PUBLIC LIBRARY

JOAN OF ARC COLLECTION

44



FORTITUDO COMEST EST PERPETVA VIRGINITATIS




HEROINÆ NOBILISSIMÆ
IOANNÆ DARC LOTHAR-
RINGÆ VILGO AVRELIÆ-
NENSIS PVELLÆ HISTORIA,
Ex variis grauissimæ atque
incorruptissimæ fidelis
scriptoribus excerpta

Eiusdem Mauortia Virgi-
nis Innocentia à ca-
sumniis vindicata

Auctore Ioanne Hordal Serenissimi
Ducis Lotharingia Consiliario,
Et I.V. Doctore ac professore
publico in alma vniuersi-
tate Ponti-Mussana.



PONTI-MVSSI,
Apud Melchiorẽ
Bernardum Eiusdem
Ser. Ducis Typographum
M. D C. XII.



Cum privilegio Regis.

Leonard. Gaultier sculp.

92
J6H81

Don of Art

DLB3

458x

+ ÆTERNÆ GLORIÆ,
DEI OPT. MAX.
SALVTIS AC VICTORIÆ
DATORIS:

DEIPARÆ VIRGINIS, missione auxilia-
tricis, ac liberatricis puellæ Ioannæ
Darc, optimè de Gallia meritæ;


DIVI MICHAELIS, quo Dei ac Mariæ
internuncio excitata Ioanna, quo Eccle-
siæ Galliæque præside, belli principe ac
ductore, sacro ipsius apparitionis die. Li-
beratâ per Ioannam Aureliâ, Gallia
omnis ad spem salutemque
vocata est;

IOANNÆ DARC, natæ immortalitati
clarissimæ Virginis,
LOTHARINGIÆ, vnde illa orta;
GALLIÆ, cui subsidio diuinitus est missa;
Deditissimus IOANNES HORDAL,
Perenne hoc monumentum
statuit, dicatque.

TALIS IN ARMA RVIT BELLACI SCHEMATE VIRGO



*Pugnate audentes Galli: si tale tenebat,
 Palladium titubans Troia, perennis erat.*



ILLVSTRISIMO GENEROSISSIMOQVE
PRINCIPI

FRANCISCO
A LOTHARINGIA
MARCHIONI DE HATON-
CHASTEL, COMITI DE VAVDE-
mont, de Salm, Chaligny, &c.
Baroni de Viuiet, Ruppe, Bran-
débouurg, Domino de
Dompremy, &c.



*V*irilem hanc Puellam pietate illustrem, ar-
mis nobilem, castimonia singularem, Gallo-
rum saluti, Lotharenorum decori, Hostium
exitio, suo partim commodo olim natam,
partim denatam incommodo, nunc verò cum
nationum propè omnium elogijs renascentem
ut dicarem ego tibi (PRINCEPS ILLVSTRIS-
SIME) effecit tum mea virginisque in te huius, tum tua in
me Virginemque istam propensio. Et verò ad quem reuertere-
tur nisi ad te Ioanna quæ à ditione tua originem traxit suam?
Quidni rediret suum ad Patronum Cliens, ad Dominum fa-

mula, ad Ducem miles? amat pedamentum vitis, pastorem
ovis, naus nautam, ut seruetur, ut foueatur, ut regatur. At
in quo facilius inueniat, a quo equius praesidia haec impetret,
quam ab illo dignitatis suae conservatore ac vindice, quem in
rebus arduis magnanimitas, in dubijs prudentia posse faciunt,
velle autem effusa in omnes, singulari stipata felicitate beni-
gnitas? Hinc est cur te Asylum oppressus, afflictus subsidium,
portum naufragis, inferioribus benignum, aequalibus familia-
rem, amicus beneficum, hostibus terribilem, omnibus admira-
bilem videamus. Nimirum ita se res habet ut a felici arbore
fractus optimi, a progenitore praestantissimo eximij foetus,
a nobilissima indole omnibus virtutum locupletata dotibus,
generosissima facta nequeant non existere. Nam ut Impira-
torum Regum, Dynastiarum tum orientis tum obeuntis solis
vetustissimas clarissimasque omittam imagines, ut sileam vi-
rorum gentis tuae Principum pulchram per vulnera pro Ca-
tholica Religione mortem obeuntium, memoriam immortali-
tati consecratam, quae non obstupescat tam absolutam virtu-
tum omnium uno in te vigentium cumulū ut aelegisse te praejer-
tim videantur in quo una omnes sedem sibi & gratiam fige-
rent & perennem? Me ut interdum delectet, Principum per-
multos templis is conferre (fas sit vetera illa quam quam ritè
antiquata meminisse) in quibus Dei unius Deae sola colere-
tur effigies; te vero Pantheo illi in quo residerent omnes Dij.
Floruit in bello aliquis sed emarcuit in pace, aliū toga sed non
arma decorarūt, reuerentiā ille terrore, alius amorem facilitate
captavit. Ille quæsitam domi gloriam in publico hic in publi-
co partam domi perdidit. Postremo pauci admodum exitere
quorum virtutes nullo vitiorum confinio laederentur. At tibi
(ut cū Plinio loquar in Panegyrico) quanta concordia, quan-
taeque concentus omnium laudum, omni que gloriae contigit,
ut nihil severitati tuae hilaritate, nihil gravitati simplicitate,

nihil maiestati humanitate detrahatur? Iam cultus & religionis cura, iam constantia in aduersis, in prosperis æquabilitas, in factis dignitas, in dictis sapientia nonne Principem votis omnibus maiorem loquuntur? talem profectò esse oportuit eum cuius fidei maximus Regum urbes potentissimas, cuius fortitudini equites numero multos, stirpe nobiles, bellica laude spectatos committeret: quem Veneta Respublica externo militi Præfectam deposceret, quem Austrasia vniuersa primum à Duce suo intueretur. Ego certè ut te aspexi te suspexi, & salutaribus vultus tui radijs saucijs ita te intrinsecus intueri, gloriamque tuam tueri extrinsecus statui, ut quemadmodum a sole heliotropium non abscedit, sic à virtutum contemplatione tuarum animus meus, à præconijs vox, & stylus, à beneficentia manus abitura non sit. Accipe igitur Ioannam hanc gente nostram, ditione tuam, ut à te ad nos profecta, per nos ad te redeat; tuo in solo nata educataque, tuæ tuorumque gloriæ nata sit; te habeat gloriæ suæ vindicem; quibusque è terris salutem Galliæ intulit, in eas, quòd per hostilem inuidiam redire viua haud potuit, immortaliter viuaci gloria nobilis, per te unà mecum, tuo favore, meus laboribus reuer-

Tuæ Excellentiæ re &
studio addictissimus

I. HORDAL.

Extrait du Privilege.

PAr grace & priuilege de son Altesse, il est permis à Melchior Bernard son Imprimeur iuré en l'Vniuersité du Pont-à-Mousson, d'imprimer, ou faire imprimer, le liure de nostre tres-cher & feal Conseiller d'estat, & Docteur és droicts & Professeur Ordinaire en nostre Vniuersité dudit Pont, intitulé *Heroina nobilissima Ioanna Darc Lotharinge vulgò Aurelianensis Puella historia*. Avec deffence tres-expressse à tous autres Imprimeurs & Libraires d'imprimer ledict liure: & ce pendant le terme & espace de six ans, à compter du iour qu'il aura esté acheué d'imprimer, sur peine d'amende arbitraire & de confiscation des exemplaires. Car ainsi nous plaist. Expedié à Nancy le 17. de Mars, Mil six cens & douze. Les Sieurs de Gournay Chef du Conseil, de Stainuille Doyen de la Primatiale, de Valhey, Gouverneur de Marsal, de Myon, Bardin, Bailliuy, Rouyer, Maistres aux requestes ordinaires & autres presens.

Ainsi signé HENRY.

Et plus bas.

I. Rolin.

APPROBATIO.

EGo infra scriptus Societatis IESV Theologus legi hunc librum, in quo de Ioanna Puella rebus gestis quid sentendum sit, doctè & accuratè demonstratur. Nihilq₃ in eo reperi quod sanctissima nostre fidei aduersetur, aut bonis moribus possit officere. Hoc mei nominis adscriptione testor.

Ioannes Mamburgus.



NOBILI, CLARISSIMO
DOCTISSIMOQVE VIRO D.

D. IOANNI HORDAL SERENISSIMI DVCIS
Lotharingæ Consiliario, I. V. D. atque in
almâ Vniuersitate Pontimuffana Pro-
fessori ordinario, Cognato suo.

IN DEPICTAM ET DESCRIPTAM
Virginis Aureliæ statuam & historiam.



*Vmice quum duplici, pictâ scriptâque tabella,
Penè exesa tuæ Virginis arma polis:
Te Natura mouet, siquidem genus inde tulisti;
Ipse tuos pictâ Virgine, pingis auos.*

*Nec mirum, nam quæ armis gloria parta puellæ
Est eadem & scriptis gloria parta tibi.*

Car. du Lis Consiliarius & Aduocatus:
Reg. Parif.

AL MEDESIMO SIGNOR

HORDAL.

*Q*uesta guerriera, si come io, Francese,
Ache ti parlo in lingua non vulgare!
Perche Ariosto gentil che ser mi pare,
Questa par Bradamente fiera è cortese:
Non chabbi volsuto l'ardite Imprese
Di questa Pulcella, in versi cantare,
Ma con graue è fedel stile narrare
Mandate dal' Ciel' luinte è difese.
Ora, di quanto questa valorosa

*Fanciulla supera la fanolosa
Bradamanie, Di quanto piu buggia
Grada si, ma sbelletata è fallace,
Cede a la verita, nuda che sia,
Di tanto ti cede Ariosto mendace.*

AL MEDESIMO SIGNOR.

M*Ira che con l'arte è la dotta mano
Con chiaro stile è eccellente ingegno
Quest'opra è salita in sì altero segno
Cherimauor fà ogni scrittor lontano.*

Cat. de Cailly.

EN LOOR DE LA OBRA Y HISTORIA DE IVANA VIRGEN AVRELIANA
hechaporelnoble y doctissimo Señor Don Iuan
de Hordal Consejero d'estado de Su Alteza
Doctor en los derechos y Professor ordinario en la alma, celebre, y nombrada Vniuersidad de Puente-Mufsonedeudo
y pariente d'essa misma
Virgen.

P*Arate aqui, ô hermano passagero;
Porque passas de priessa, y tan ligero?
Mira à este auctor, honrra y gloria
D'esta ciudad, y de tierras de Lirios:
Mira à nuestra Virgen, y à nuestros rios;
Y por siempre queden en tu memoria.*

Porel Señor Iac. de Cally. Gentil. Aurel.

AD EVNDEM.

C*unctatuo cedant impigro scripta labori,
Veris falsa, sacris vana, vetusta nonis.*

*Virginis Aureliæ nam quis monimenta recenset
Plura his quæ memoras, vera, sacra atque noua.*
Idem de Cailly Nob. Aurel.

SVR LE TRES-DOCTE ET AG-
greable liure du Sieur HORDAL, par lequel il sem-
ble nous vouloir raurir la Pucelle d'Orleans, sa
bonne parente, & l'emmener en son païs.


SI mes ayeux, iadis pleins de uallieur,
Ont accoudnit sur la riuë de Loire,
(De ton pays) Iehan de Vaucouleur,
Qui de l'Anglois remporta la victoire:
Si que son nom, par tiltre meritoire,
Nostre la dit; Or' sous quelle couleur
Nous voudrois tu laisser ceste douleur
De l'emmener dedans ton territoire?
Pense tu point du charme de ton liure
Soudainement la raurir à noz yeux?
Net'y attens, ny moins qu'on te la liure.
Plustost faisant comme mes peres vieux,
Pour la querir & leur prouësse ensuiure,
J'iray chez toy & en tous autres lieux.

Par le mesme Sieur de Cailly G. Orli.

Sur le tableau de la Pucelle d'Orleans.

CE maintien Martial, & ce visage beau:
Pouuoient ils rencontrer plus fidel pinceau;
L'esprit en est au ciel, son honneur & sa gloire,
Ne periront iamais au temple de memoire.
Par le mesme Sieur de Cailly G. Orli.

NOBILI, CLARISSIMO, DOCTIS-
SIMOQUE VIRO D. D. IOANNI HORDAL
in vtroq; & Principis, & Iuris auditorio Colle-
gæ suo, de restituta dignitati IANA DARCIA.
NICOLAVS GVINETVS.

 *Rancia, quæ victrix populorum, colla Britanno
Subdus? & irato numine pressa iaces?
Heu pietas! sic strata gemus? sic Lilia marcent?
Languida probrosum sic patiere iugum?
At miseret miseræ superos: monituque superno
Finibus è Lotharis arma virago capit;
Reddat ut attonitæ vires: Angloque minaci
Præcipiat versum trans mare ferre pedem.
Non prius occiderent Franci Diadematus hostes,
Quàm noua Dux belli fœmina facta foret.
Non prius acciperes patriam Delphine coronans,
Quàm tutum ad Rhemos Virgo pararet iter.
Qualis in Argiuas vel Pentefilea phalanges,
Vel ruit in medios Volsca puella Phryges:
Talis per densas acies IANA instat, & acta
Fertur in aduersos cuspide Brutiigenas.
Auxilium præsens obfessa Aurelia sentit,
Et grata, in memori marmore gesta notat.
Sed frustra in summo scalpta est victoria Ponte,
Frustrà Seruatrice Gallica, IANA cluet.
IANAE iterum laudes obliuia longa tegebant
IANA iterum probris millè petita fuit.
Verùm dum linguas HORDALLE retundis inanes,
Vindice te Gallis DARCIA viuaredit.*

FRATER FRATRI
CONSULTISSIMO.

FRancigenūm vindex, sceptri tutela virago
Quam facis à sera posteritate legi.
Teque tuosque suo prognatos sanguine clarat,
Si lubet addatur laus ut auita tuæ.
Digerat ast longo funis ordine ceras
Qui volet, & patria laude superbus eat;
Nam proprius tibi (Frater, honos meritisque paratur:
Nempe tuis per te gloria surgit auis.

Tibi addictissimus L. Stephanus I.V. Licen.
Ciuit. & Marchion. Pontimus.
Procognitor.

EIDEM COGNATO SVO
plurimūm colendo.

Nascitur en iterum flammis consumpta Virago:
Qualis aromatico funere Solis auis.
Sed cuius radij dant vitam HORDALLIVS ille est;
Cuius ab illustri Virgo renata stylo.
Nascere securā eternūm fruitura salute:
Flammaque cum fama te sciat esse Deam.
Steph. Hordal. I. P. L.

EIDEM LECTISSIMO
Cognato suo.

FLoruerat meritis quondam celebrata triumphis
Aureij virgo spesque, salusque soli.

*Illa sed aduerso nuper marcescere vento
Credita, non meritis insimulata notis.*

HORDALE *Iurus honos in fontem protegis, illo
Nempe decet fungi munere iuridicum.*

Dominicus Guillot Canonicus
Tullensis.

EIDEM D. D. IOANNI HORDAL
*acerrimo Aureliæ Puellæ integritatis vindici,
Amico suo fidelissimo.*

N*E te ultra Aureliæ iactent à stirpe Puellæ:
Iactanda est potius laudibus illa tuis.*

*An genus Aureliæ tibi plus illustre Puellæ
Quàm fuit hæc calamo nobilitata tuo?*

*Non reor (HORDALLI): nec quisquam dicat an alter
Maius ab alterius lumine lumen habet.*

Eiusdem eidem.

E*N formidati toto prius orbe Britanni
Aureliæ fracti Virginis ense cadunt.
Quid nunc hos mirere decus lacerare Puellæ?
Fæmineâ mœrent succubuisse manu.*

Adamus Marotus Sequanus.
I. P. D.


DE GALLORVM CVM ANGLIS
diffensione à iudicibus delegatis à sede
Apostolica decisa.

EIDEM D. HORDAL.

A Gallis Angli multum distare videntur,
Dum de IOANNA Virgine differitur:
Namque ut Francigenæ clara eius facta probarunt.
Ipsamet Angligenæ sic reprobare solent.
Sed cum Pontifices laudent celebrentque puellam,
Conuenit illorum credere iudicio.
Inde tibi debetur honos ob talia scripta,
Perpetuò quorum luce superstes eris.

P. G. Anglus.

A MONDICT SIEVR HORDAL SVR SON.
Liure de la Pucelle d'Orleans: Sonnet.

 Ontrepointer l'effort des ennemis Anglois,
Emousser de leurs dards la pointe redoutable,
Amortir de leurs feux le brandon execrable,
Restaurer les estats, Et regner de Valois:
C'estoit à la grandeur de tes masles exploits
O Pucelle, de Mars la fille incomparable,
C'estoit à la valeur de ton bras indomtable
O Amazone, l'heur, Et l'honneur des François.
Mais c'estoit, MON HORDAL, à ta plume eloquente
Peindre cest Heroine en prôiesse eminente,
C'estoit, c'estoit à toy frayer ses combas,
Et mouler sur la charte au naïf son image
Affin que ioincts d'escrits comme de parentage,
L'un & l'autre marchiez sur l'oubly du trespas.


Adenot Iacquet Barrisien Legiste.

TALIS INERMIS ERAT MULIERI VESTE PVELLA.



*Mollis an hic facies? an imago tenella puellæ?
Veste puellari Martia virgo latet.*

L. Gautier sculp.



HEROINÆ NOBILISSIMÆ

IOANNAE DARC
LOTHARINGÆ VVLGO

AVRELIANENSIS PVELLÆ HISTORIA

EX VARIIS GRAVISSIMÆ
atque incorruptissimæ fidei scriptoribus
excerpta,

EIVSDEM MAVORTIÆ VIRGINIS
Innocentia à calumnijs vindicata.

Authore IO ANNE HORDAL. &c.

SI Deus in seipso simplex,
in effectis multiplex, utro-
bique mirabilis, innumera
suarum in humanum genus sin-
gularis providentiæ protulerit argumen-
ta, nulla tamē edidit vel clariora ad exem-
plum vel ad impetrandam fidem effica-
ciora, vel denique ad concitandam fidu-
ciam aptiora, quam dum profligatas Prin-
cipum, provinciarum, regnorumq; for-
tunas non ab interitu modò vindicavit,

Præfatio.

Publicos
rerum hu-
manarum
motus
spectacu-
la esse di-
vinæ pro-
videntiæ.

sed eas etiam maiori longè tum firmitate roboravit, tum splendore decoravit. In his enim & fulciendis & illustrandis ea sapientissimus ille rerum omnium moderator usus est agendi ratione, quæ humanas supergressa vires, in eum tantum refundi queat à quo dimanavit. Nimirum ut intelligerent omnes à quo tempestates extiterant, tranquillitatem esse ab eo profectam, ab eo conceptum esse periculum à quo sit enata securitas, deniq; ab eodem à quo impendebat interitus, vitam instauracionemque pependisse. Stolidum profectò est hominum vulgus quod ratione præditum, rationis ductum vix sequitur, sensuumque appulsu necesse habet belluarum instar regi. Illud ergo terret præpotens è cælo Deus, ut quoniam calamitosum est ab inexhausto bonitatis omnis authore beatitatem speret suam, illud decumanis fluctibus quatit, ut salutis suæ anchoram, illo in immobili æternitatis solo defigat, illud denique impendentibus mortis vrget minis, ut ipsum à perni-

cie traducat ad vitam. Excitantur enim rerum aduersarum perpeffione mortales ad causam ærumnarum suarum inuestigandam, authoremque noscendum; & vbi scelerum conscientia illam subiecit, hunc supremi numinis suggessit recordatio, ad Deum tantò arctius amplectendum prouocantur quantò strictius impliciti criminibus suis tenebantur. Ita gentem illam Hebræam delectam inter omnes, dilectam præ omnibus, non duram minus quàm diutinā seruire in Ægypto passus est seruitutem, vt redditæ gloria libertatis redundaret in se vnum, in vniuersum verò populum beneficiorum omnium deriuaretur vtilitas. In quem enim Ducem atque authorem Moyfis conseruatio qui prius propemodum orbis fuit quàm ortus, prius damnatus aquis, quàm in lucem natus, prius expositus quàm susceptus nisi in Deum conferatur? Cui nam eiusdem in aggrediendo Pharaone fortitudo, in permouēdo efficacitas præterquam Deo tribuatur, cum Moysem

neque ingenij tarditas rerum admirabiliū
quæ dicendæ ipsi quæ efficiendæ erant,
notiones mente producere, neque hæsi-
tantia linguæ animique tenuitas efferre
pateretur? Quis denique inaudita omni-
bus omnino seculis, patrata tamē à Moy-
se miracula numero plurima, nouitate
miranda, magnitudine stupenda, quis in-
quam ea sibi præter Deum audeat arroga-
re? Atque vt in eiusdem gentis historiā
me contineam, quonam collineauit illa
prouidentia diuinæ seueritatisne an beni-
gnitas? cum Philistæam nationem ritibus
profanam, feram moribus, odio in He-
bræos non infatiabili minus quàm impio
imbutam triumphare in gigantis vnus
fiducia permisit; verum ita triumphare,
vt vastam illam corporis immanis proce-
ritatem, turrimve carneā, pastoris vnus
paruitate prosterneret, robur vinceret
imbecillitate, tumidosque animi vesani
spiritus ipsa demissione retunderet, mi-
nueret, extingueret, militares denique
armorum motus rusticæ fundæ verbere

elisos eluderet, imò verò trophæum pastor ex spolijs ducis triumphalibus erigeret, hostes dolore & dedecore, suos lartia gloriaque impleret, satiaret, cumularet? Quid illa totius ferè eiusdemque gentis vna in ciuitate arctissima sub Holoferne obsidio, deditio imminens, ruina certissima, quorsum permissa, quorsum immissa, nisi vt scelerum suorum conscientia stimulatì Iudæi tantum in immortali præsidio confiderent, quantum diffidere de mortali subsidio cogebantur? nam vnde spes ipsis salutis affulsit, vnde affuit? non à valida militum manu, non à machinis, non ab armis, imò nec à virili sexu: verum ab eo cui timidè agere ius est naturæ quoddam atque indoles, à fœmina, à vidua, à captiua. Fregit enim virile robur mulieris mollitudo, prudentiam penè audacior pietas diuino directà consilio fefellit, infelicitas prosperitatem profligauit. Quid multa? obtruncauit Iuditha Holofernem, obsessi obsessores cepere, victique Iudæi & numero pauci, victores

Assyrios multitudine infinitos, longè
quàm Thebani in Cadmæa pugna glorio-
sius superarunt. Et vt aliquantò propiùs
ad nostrum accedamus argumentum,
quantâ dignum est admiratione quod à
reparata per Christum salute quarto de-
cimo, altero autem à nobis seculo Gallia-
rum regno euénit? Quid? nonne obfes-
sum illud ab Anglis & infessum, cum bel-
lis externis, intestinisque discordijs labo-
raret, ac tantum non in ruinam procum-
bere videretur, puellæ vnus eiusque ru-
sticanæ animo, consilio, viribus, armis,
seruatum ab interitu restitutumque pri-
stinæ dignitati fuit? Sed (quod mirari pla-
nè æquum est) ea commutatione fortu-
næ vt salutem quam attulerat Gallis, sibi
non retineret, mortemque cui Anglo-
rum permultos dederat ipsa incurreret,
aut vt verius loquar, moriens tum animi
vitam, tum nominis gloriam nullo tem-
pore inter morituram gemente licet in-
uidia compararet. Quamuis enim oppu-
gnari quandoque veritatem contingat,

Puella
Ioanna
perturba-
tis rebus
Gallicis
diuinitus
subsídio
missa.

nunquam tamen expugnari: premie apostest non opprimi, mergitur sed emergit, tam conspicua, tam illustris, tam vegeta, vt eam nec inuidiæ liuor inficere, nec mendaciorum tenebræ obscurare, nec annorum diuturnitas oblitterare queat. Et verò quis nisi vel malignus, ne dicam impius, vel in historijs penitus peregrinus puellæ integritatem dignitatemque illius reuocare in dubium audeat quæ è disiunctissimis nationibus, scriptores oratione tum deuinctâ numeris, tum solutâ clarissimos, incorruptissimos eiusdem ætatis, interiectæ, nostræ etiam istius memoriæ viros suæ virtutis admirabilitate ad sui cōmendationem excitauit? Apud me sanè tantum valuit vis veritatis vt quietis partem capere potuerim nullam, donec dispersa rerum à puella nostra gestarum diuersis in auctoribus membra in vnum veluti corpus coaptarem, quò non solum singularum partium decor eluceret, verùm totius historiæ coagmentata pulchritudo cerneretur. Quò cum ani-

Quæ causas fuerint auctori huius scribendæ historiæ.

mo & cupiditate, mea ipse sponte studio-
 sè incumberem, tum vt id moliri, & age-
 re auderem inductus sum assiduis con-
 sanguineorum, affinium atque amicorū
 flagitationibus, nobilis præsertim, clarif-
 simi, consultissimique viri Domini Caro-
 li du Lis Regij in Parisiensi subsidiorum
 Curia Consiliarij atque Aduocati gene-
 ralis, qui quòd à Petro Darc Virginis no-
 stræ fratre tertio ortus est, eodem illo à
 quo Hordaliorum genus est propaga-
 tum; nobiscum iure huius virginis digni-
 tati fauet, à qua vtrisque spectatissima est
 transmissa nobilitas.

Rei Nar-
 ratio.

RE M vt ordiar. Anno Domini
 Millesimo quadringentesimo
 vigesimo secundo, cum Caroli
 VI. Francorum Regis obitu, quasi effra-
 ctis viarum repagulis, emotisque regni
 præsidij omnibus, magno numero se,
 magnifq; molitionibus Angli in regnum
 Galliæ infudissent, captis belli impetu
 clarissimis ac munitissimis arcibus, oppi-
 dis,

dis, ciuitatibus, vastatis agris, magna edita hominum & locorū strage, breui tempore tanto omnia suorum armorum terrore compleuerunt, propè vt de rebus Gallicis actum videretur, nam & Carolus VII. bis acie fusus multis hominum millibus amissis, primùm in oppido quod Crepantium vocatur, iterum in finibus Lexouiorum vbi auxiliares Scoti fortissimè præliantes cum pluribus Gallorum millibus ab hostibus cæsi sunt, in summā suæ fortunæ desperationem venerat.

Causa belli fuit, partim inueterata Regum Angliæ, regni Galliæ potiundi cupiditas; partim recenti dolore atque iracundia tumens in Gallos, Anglumque adiuuans Burgundiæ Dux; qui, quòd ad matrimonium Catharinæ Francicæ cum Henrico V. Angliæ Rege, Regem Galliæ Carolum VI. Reginam, Catharinamq; ipsam adegerat, eius matrimonij leges eas dixit, quæ & Gallico & communi iuri aduersæ, belli postea seminarium fuerunt.

Remita narrant. Cum Catharina Ca-

Causa
belli Gal-
lis ab An-
glis illati.

roli VI. filia, Henrico V. Anglorum Re-
ginuptui traderetur, eæ matrimonij leges
auctore Philippo Duce Burgundiæ dictæ
sunt; si superstitie Henrico Carolus VI.
vita fungeretur, Galliæ regnum Henri-
cus adiret: sin prior obiret Henricus, ei-
que virilis proles foret superstes, Carolo
è viuis abeunte, Henrici filius regnum
Galliæ consequeretur, nulla de Carolo
VII. legitimo licet successore, mentione
habita. Testes Gaguinus & Papirius Mas-
sonus in annalibus, & Georgius Lilius
Britannus in epitome Chronic. Anglo-
rum Regum. Cumque Henricus Angliæ
& Carolus Galliæ Reges eodem anno
nempe millesimo quadringentesimo vi-
gesimo secundo vitam cum morte com-
mutassent, (sic enim memorant Galli,
Angli, Germani scriptores, nominatim
Gaguinus & Papirius Massonus in Caro-
lo VI. Thomas walsingham in vita Hen-
rici V. Anglorum Regis, & Ioannes Nau-
clerus volumine secundo Chronogra-
phiæ generatione xlvij.) filius Angliæ

Regis eodem cum patre nomine, patri succedit, & in regia Parisiensi ciuitate, regium Franciæ nomen vsurpat, Franciæ Angliæque Rex publicis priuatisque literis & forenfi sigillo monetaque, quam nouam cudi curauit, appellatur inscribiturque. Miserrima certè id temporis fuit vniuersi regni Galliæ perturbatio, nam hinc à Burgundionibus, inde ab Anglis, mox ab his qui se rebus consulere dicebant, ita tumultuabatur, vt dicere difficile esset, hostisne an Francus plus damni infelici populo inferret: Prælia multa, seditiones plures, dum nulla partium alteri instituit cedere, vincuntur tamen Franci apud Vernolium prælio, occisi ad numerum quatuor millium, capti Duces & Comites plurimi. Naclerus loco indicato. Hostis tot militaribus copijs Galliam inuaserat vt Carolus VII. tunc temporis Rex, per ludibrium ab hostibus Bituricensis Rex vocaretur. Verùm vt accisis, afflictisque rebus præsentius numen ideo interuenit vt liquidius agnoscat; Ioan-

na virgo annorum octodecim aut circiter, diuino afflata numine ad erigendos & reficiendos Francorum animos, salutari manu opportunè adfuit. Hæc ex oppidulo quod Donoremigium vocatur in agro Tullensi apud Leucos orta, patre Iacobo Darcio agricola, matre Isabella, utroque probis & honestis moribus, pascere paternas oues solita, ad Carolum venit, prædicans se à Deo missam, ut Aureliam obsidione liberaret, utq; cum Rhemos sacra vñctione regno augustiùs inaugurandum perduceret. Et ut res altiùs repetatur, ita literis traditum inuenimus, huic Virgini patris oues ruri pascenti, dum Aurelia obsideretur, & Caroli res inclinatæ grauitè atque affectæ essent, speciem quandam humana augustiorem sese ostendisse: (Diuum Michaëlem historiæ nominant, vnde Sancti Michaëlis torquatæ militiæ Francicæ origo extiterit) Stephanus Paschasius in cap. XV. lib. secundi disquisitionum Gallicarum, & Matthæus in Ludo. XI. lib. 5.

Puellæ
Ioannæ
ortus.

Diuina
Ioannæ
in rem
Galliæ
electio.

Huius occurſu cum pauore conſternata propèque exanimata fuiſſet, bono animo ab ea eſſe iuſſam, Regemque Carolum adire, quò & Aureliam obſidione liberaret, & Regi afflicto regnum aſſereret. Trepidare primùm illa atque hæſere fidei & conſilij incerta, ſilentio etiam viſa auditaque apud ſe premere; adeò res credita nunciari noua & inſolens, & quæ ſermonem hominibus datura, niſi explorata Dei voluntate, verecundę atque honeſtę virgini diſſimulanda ac detrectanda potius videretur. Verùm cum eadem illa ſpecies identidem ſe cum ijsdem à Deo mandatis virgini offerret, hæc veritate verecundiùs quàm religioſiùs ageret, propinquorum adhibito conſilio viſa atque audita ijs patefacit; Super his ad Robertum Baudricurtium Valliſcoloris Præfectum deducta, riſu primùm ludibrioque excipitur. At cum Baudricurtium de clade ad Roboretum Diui Dionyſij accepta, deque Aurelianorum periculo, magnopere vt re diuinitus comper-

ta admoneret, atque is tum clara in illa virtutis & prudētiae signa adnotaret, tum de eius probitate ac moribus quæstione habita, perhonorifica municipum eius omnium testificatione cognouisset, virili veste indutam, duobus equitibus Ioanne Metensi & Bertrando Pulengeio certis testibus, custodibusque additis; prosequentibus præterea duobus virginis fratribus, ad Carolum qui tunc temporis Chinonij agebat, fausta omnia precatus honestissimè dimittit. Paucis diebus, nullo aut prohibente aut iter demorante hoste, salua & incolumis cum suis ad Regem peruenit: Regem ipsum quem nunquam antea viderat, quique famæ quæ de ipsa erat, experiundæ causa, tenuiore habitu inter regio cultu ornatos proceres, sese ex composito dissimulabat, perspicuè agnoscit; Rex nouitatem rei admiratus, sentiensque non sine numine id esse, quòd tantum terrarum, tantum hostium, tam intrepidè, tam tutò, consilio tam forti, tam inusitato peruasisset; quid vellet, quòd

Aduentus Ioannæ ad Carolum Gallie Regem.

veniret dicere paratam, comiter excipit, præsentibusque regni proceribus dicentem audit. Hic cum illa eadem quæ dudum Baudricurtio, ingenti omnium admiratione exposuisset, Rex superiorum Regum modestiam religionemque secutus, rem totam ad augustius regni & procerum concilium defert. Erant in eo Pontificia atque Ecclesiastica dignitate illustres multi, multi Palatina nobilitate conspicui, cana fide omnes & prudentia. Hi cum præsentis verba, habitum, oris effigiem, cuncta denique in illa admirarentur, adeò sunt eius oratione commoti, recreatique; ut Rex qui fortunæ ornamentis destitutus, amissi regni speculatorus euentus ad Delphinates se recipere cogitabat, uti inde conductam mercenariam militum manu bellum repararet; nulla interposita dubitatione, non modò bellum constantissimè sustinendum, verùm etiam hostes, Duce viragine, audaciore consilio, illatis armis præoccupandos esse decreuerit; quippe qui in illius generosa

Spes ad-
uentu Io-
annæ Re-
gi & Gal-
liæ reddi-
ta.

mente vigere non tantum viriles, sed humana virtute augustiores spiritus aperte conspiceret. Maximè verò Regem ac proceres omnes in sui admirationem adduxit, quod & quo die pugnatum erat ad Roboretum Diui Dionysij rem fortunamque belli, nullo adhuc rumore nuncio Baudricurtio omnem nunciarat, & tunc nescio quid arcani Regi ipsi, præsente eo qui confessione ipsum expiare erat solitus aperuit. Admirationem imprimis illud habuit quòd Regem qui insigniorem offerebat enssem obtestata sit, uti alium quem ad vicum Turonensis agri Diuæ Catharinæ fano nobilem asseruari diuinitus præsenserat, sibi iuberet adferri. Is verò illic inuentus est multo vetustatis situ rubiginosus parte ex vtraq; (ut ipsa prædixerat) hilijs distinctus. Super hæc, illa primò Pictauium ad concilium quod vulgò Parlamentum appellatur, deducta est, ut eius quoque auctoritate, quæ diceret comprobarentur. Cumque non ante dicenti fides habita fuisset, quàm

Sacer eius
lustratus
ensis.

quàm à compluribus & præstantissimis Theologis examinata, prudentissimè & sanctissimè respondisset; paulò post ad Aureliam obsidione soluendam, com-
 meatumque importandum, cum exigua manu militum ire, ac sui documentum dare iussa, armis fulgens, equoque insi-
 dens, ac præferens signum militare can-
 didi coloris in quo Christi imago lili-
 um manu gestantis conspiciebatur, specta-
 ntibus hostium copijs urbem cum com-
 meatu intrepidè ingreditur, Anglosque
 vt ab obsidione recederent prius moni-
 tos, neque obsequentes, pluries adoritur
 ciuibus Aurelianensibus quoduis cum
 ipsa periculum subire paratissimis. In ipso
 ardore pugnae, ictu sagittæ inter humeros
 collumque vulnerata, neque pedem re-
 tulit, neque obligari vulnus passa est, pu-
 gnamque expugna, laudem ex laude ad-
 orta, acerrimè prælians ad octauum Idus
 Maij hasta gladioq; multos hostium pro-
 strauit profligauitque. Victi hîc Angli at-
 que Aurelia liberata.

Comme-
 atus, fa-
 lusq; Au-
 relia per
 puellam
 importa-
 ta.

Victrici
puellæ
honores
acclama-
tioneſq;

Ergo vbi hoſte fuſo fugatoque Ioanna ac cæteri Duces cum exercitu pleni honore & gratulatione in vrbem redeunt; ad hunc redeuntis exercitus triumphum lætitijs omnibus incedens, effuſa omnis ciuitas obuiam procedit, mixti militibus ciues, vniuerſos quidem Duces, at præcipuè Ioannam demirantur: in hanc oculos multitudo vniuerſa, in hanc ſuſpenſa ora conuertit: hanc veluti de cœlo miſſam, & vt ipſam victoriam omnes con-
tuentur: omnibus quos aut temporis aut virginææ modeſtiæ ratio haberi paſſa eſt, honoribus afficiunt; liberatricem ſuam, expultricem hoſtium, vindicem Franciæ Maieſtatis appellant, quæ pro Franciæ conſtituenda ſecuritate, res humanis excellētiores confecerit: fœlicem eam tantæ expeditionis euentu, cuius bellica fortitudo, flos inuicti pudoris, calamitatis publicæ neceſſitatem penè ineluctabilem deuicerit. Factum Senatusconſultum, vt poſteri diem hunc feſtum effuſo omnium ordinum gaudio ludicriſq; cer-

taminibus prosequerentur.

Interea ingens tota Francia deleti Anglorum exercitus, liberatæque vrbs Aureliæ rumor dispergitur, mirari omnes, vnde tantæ Gallo redierint vires, antea iam propè victo, admiratio deinde paulatim in contemptum Anglorum vertit. Multæ vrbes de defectione consilia ineunt.

Carolus rebus cognitis, beneficium numini agniturus Deo Opt. Max. supplicationes decernit: Aula regia antea trepida, & de belli euentu sollicita, lætitia exultat, de Ioannæ virtute præclara vbique fama est.

Gratiæ
Deo ha-
bitæ.

Imprimis ab Aurelijs gratiæ verbis amplissimis Ioannæ aguntur, quod eius eximia prouidentia, prudenti consilio, singulari virtute vrbs periculis maximis sit liberata. Hinc Nothus Aurelius, Sanseuerus, Rayus, Hira, Grauillæus, Couloceus, Florentinus Dillierius, Corrazeus, Santrailla, Alanus Gironus, Iametius Tilloyus, Burgius Bara, Amadeus, & reliqui

militiæ præfecti, sua quisque laude ornantur, quòd eorum fortitudine fidelique opera salui essent Aurelij. Ciues paratos se offerre pro ipsorum salute & gloria, sanguinem si ita res ferat, & vitam profundere, ne dum facultates & fortunas omnes prodigere.

Nec multò post Ioanna cum multis strenuissimis Ducibus urbem egressa, ad Carolum se confert, vti cum eo de itinere Rhemenfi, ac de belli gerendi ratione consilia ineat; venientem summo cum honore, & insigni munificentia Carolus suscipit, gratiam ei quam potest, habet maximam, primùm pro tanto tamque ardenti in rem Gallicam animo, deinde pro nauata tam forti, tam diligenti opera, quò rem Francicam receptam ex hoste, sua iterum sede saluam fundatamque statueret; nominatim pro liberata & ab hostiũ dominatu vindicata vrbe Aurelia.

Nobilitas
et ius Pu-
ellæ & cõ-
sanguine-

Atque vt æternam gratiã æterno beneficio compensaret, ab eo puella Ioanna regio munere, nobilitatis iure, & insi-

gnibus ornatur; neque ipsa modò, sed is à Rege concessū.
 vterque parens, fratres ipsius tres, con-
 sanguinei, & affines eorumque nepotes
 omnes vtriusque sexus seculis omnibus
 futuri, iisdem nobilitatis titulis è vulgi or-
 dine sunt exempti.

Gratis me loqui aut ambitiosè ne quis
 existimet, tibi hîc Lector repræsento ipsis-
 simum diploma regium, quale latinis ver-
 bis conceptum in Parisiensi Computo-
 rum Camera asseruatur. Tu tantum faue
 antiquitati & quam scis fuisse veritatis
 amantio rem quàm elegantiae, noli sper-
 nere paulò horridius latina oratione, ut
 illo seculo sic loquentem.

CAROLVS DEI GRATIA
FRANCORVM REX, Diploma Regium. *ad per-*
petuam rei memoriam magnificaturi di-
uinæ celsitudinis uberrimas nitidissimasq;
gratias celebri ministerio puellæ Ioannæ
Day de Donoremeyo caræ & dilectæ no-
stræ de Bailliua Caluimontis seu eius res-
sortis nobis elargitas & ipsa diuina coope-

rante clementia amplificari speratas; decens arbitramur & opportunum ipsam puellam, & suā nedum eius ob officij merita, verum & diuine laudis preconia totam parentelam, dignis honorum nostræ regie maiestatis insignijs attollendam & sublimandam; ut diuina claritudine sic illustrata nostræ regie liberalitatis aliquod munus egregium generi suo relinquat, quo diuina gloria & tantarum gratiarum fama perpetuis temporibus accrescat & perseueret. Notum igitur facimus vniuersis presentibus & futuris quod nos premissis attentis, considerantes insuper laudabilia grataq; & commodiosa seruitia nobis & regno nostro per prædictam Ioannam puellam multimode impensa, & quæ in futurum impendi speramus, certisq; alijs causis ad hoc animum nostrum inducētibus: præfatam puellam, Iacobū Day dicti loci de Dompremeyo patrem, Isabellam eius uxorem matrem, Iacqueminum & Ioannem Day & Petrum Pierelo fratres ipsius puellæ, & totam suam parētelam, & ligna-

gium, & in fauorem & pro contemplatione eiusdem & eorum posteritatem masculinam & fœmineam in legitimo matrimonio natam & nascituram nobilitamus, & per presentes de gratia speciali, & ex nostra certa scientia ac plenitudine potestatis nobilitamus & nobiles facimus; concedentes expresse vt dicta puella, dicti Iacobus, Isabella, Iacqueminus, Ioannes & Petrus, & ipsius puellæ tota parētela & lignagiū, ac ipsorum posteritas nata et nascitura, in suis actibus, in iudicio & extra, ab omnibus pro nobilibus habeantur, et reputentur: et vt priuilegijs, libertatibus, prerogatiuis, alijsq; iuribus quibus alij nobiles dicti nostri regni ex nobili genere procreati vti consueuerunt & vtuntur, gaudeant pacifice et fruantur. Eosdemque et dictam eorum posteritatem aliorum nobilium dicti nostri regni ex nobili stipite procreatorum consortio aggregamus; non obstante quod ipsi, vt dictum est, ex nobili genere ortum non sumpserint, et forsan alterius quàm libera conditionis existant, volentes

etiam ut iidem prænominati, dictæque parentela et lignagium suprafata puella et eorum posteritas masculina, dum et quotiens eisdem placuerit, à quocunque milite militia cingulum valeant adipisci seu decorari. Insuper concedentes eisdem et eorum posteritati tam masculinæ quàm femininæ in legitimo matrimonio procreata et procreanda ut ipsi feuda et retrofeuda, et res nobiles, et à nobilibus et alijs quibuscunque personis acquirere, et iam acquisitas ac etiam acquirendas retinere, tenere, et possidere perpetuò valeant atque possint, absque eo quod illas vel illa nunc vel futuro tempore extra manum suam ignobilitatis occasione, ponere cogantur; nec aliquam financiam nobis vel successoribus nostris propter hanc nobilitationem soluere quouis modo teneantur aut compellantur. Quam quidem financiam premissorum intuitu et consideratione eisdem supra nominatis et dictæ parentelæ et lignagio prædictæ puellæ, ex nostra ampliori gratia donauimus et quictauimus, donamusq; et quictamus

quictamus per presentes; ordinationibus, statutis; edictis, usu, renōciationibus, consuetudine, inhibitionibus et mandatis factis vel faciendis ad hoc contrarijs non obstantibus quibuscunque. Quocirca dilectis et fidelibus nostris gentibus computorum nostrorum, ac thesaurarijs, nec non generalibus et commissarijs super facto financiarum nostrarum ordinatis seu deputandis, et Bailliuo dictæ Bailliuis Caluimontis, cæterisque iusticiarijs nostris, eorumve loca tenentibus, presentibus et futuris, et cuilibet ipsorum prout ad eum pertinuerit, damus harum serie in mandatis quatenus dictam Ioannam puellam, et dictos Iacobum, Isabellam, Iacqueminum, Ioannem, et Petrum, ipsiusque puellæ totam parentelam et lignagium, eorumque posteritatem prædictam, in legitimo matrimonio ut dictum est natam et nascituram, nostris presentibus, gratia, nobilitatione et concessione uti et gaudere pacificè nunc et in posterum faciāt et permittant, et contra tenorem presentium eosdem nullatenus

impediant seu molestant, aut à quocunque molestari seu impediri patiantur. Quod ut perpetua stabilitatis robur obtineat nostrum presentibus apponifecimus sigillum in absentia magni ordinatum, nostro in alijs, & alieno in omnibus iure semper salvo. Datum Magduni super Ebram mēse Decēbris, anno Domini millesimo cccc^{mo} vicesimo nono, Regni verò nostri octauo, sic sign. Per Regem, Episcopo Sagiensi, Dominis de la Tremoilles & de Tremes & alijs presentibus. Malliere visa expedita in camera Computorum Regis XVI. mensis Ianuarij, anno Domini millesimo cccc^{mo} xxix. Et ibidem registrata libro chartarum huius temporis fol. CXXI.

A. GREELLE.

Illud ipsum diploma regium libr. sept. cap. vndec. de Republ. inferuit Petrus Gregorius Tholosanus quondam I. V. Professor in Academia Cadurcensi, Tholosana & Pontimussana.

Nobilitatis autem insignia Ioannæ,

fratribus, & omnibus vtriusque sexus cō-
 sanguineis propter egregia & militaria
 puellæ facinora à Rege Carolo concessa,
 hæc perhibentur ; *Scutum area carulea*
impositum, ensis argentatus, cuius gemi-
nam aciem utrinque stipent lilia aurea,
cuspidem verò aurea amplectatur corona.
 Testes Enquer. de Monstrelet in secundo
 volumine chronicorum , Richardus de
 Wasbourg in principio primi voluminis
 antiquitatum Gallix Belgicæ. Bellefo-
 rest. in Carolo VII. Stephanus Pascha-
 sius lib. 2. disquisition. Gall. cap. 15. in fine.
 Andreas Theuetus in cap. 25. libri 4. de vi-
 tis illust. virorum, & nouissimè Ioannes
 Sauaronius in tractatu ensis Gallici.
 Hinc Claudius Paradinus inter sua sym-
 bola Heroica præfata insignia his verbis
 retulit. *Ensem coronatum inter duo splen-*
dicantia lilia quondam à Viragine illa
Aureliana in vexillo militari gestatum
immortale monumentum esse protectionis
regni Gallici. Cum verò Rex Carolus,
 Ioannæ & fratribus alijsque consanguini-

Insignia
 Ioannæ
 & consan-
 guineis
 concessa.

neis Lilia in insignibus concessisset, ei insuper placuit vt omisso cognomine Darc, fratres Ioannæ & alij consanguinei ex virili sexu propagati cognominarentur du Lis. Sicque nobilis, clarissimus, consultissimusque Dominus Carolus du Lis Regius in Parisiensi Subsidiarum Curia Consiliarius atque Aduocatus Generalis, (cuius paulò ante memini) meritò hoc modo cognominatur, cum à tertio fratre Ioannæ, Petro du Lis Equite, in directa linea masculina originem traxerit suam, quod pluribus instrumentis quæ apud eum extant vt oculatus testis profiteor, probari potest: vt item in disquisitionibus suis Gallicis vltimæ editionis testatur, Eruditissimus vir Stephanus Paschasius nempe in fine capitis VIII. libri quinti, & doctissimus Dominus Carolus de la Saussaye Ecclesiæ Aurelianensis Decanus meritis in eiusdē Ecclesiæ annalibus quos propediem in lucem est emissurus.

Regis beneficentiam magno studio imitata omnis Gallia est. Aurelianenses

accepti beneficij, & tantæ fortitudinis memores, edito in loco, ad pontem quē Ligeris subterlabitur, æream Puellæ statuat armati militis habitu locauere, quā anniuersarijs laudibus singulari pietate concelebrant. Galli reliqui receptæ libertatis non immemores dictam Virginem vbiq̃ pictam grata & familiari memoria coluerunt teste Egnatio lib. 3. cap. 2. Nec immeritò cum in ea extitisse singularem planè sanctitatem oporteat, cui nec imbecillitas sexus arma subduxerit, nec arma Virginitatem, neque virile robur virginitas. Pulchrè Diuus Ambrosius can. i. 32. q. 5. *Virginitas, Dei templum est, qui eam habet fortitudinem habere conuincitur.* Simillima D. Augustinus libro primo de ciuitate Dei cap. XVIII. *Tanta est vis probitatis & castitatis, ut omnis eius laude moueatur humana natura, & virginitas virtus est animi comitemq̃ secum habet fortitudinem.* can. ita ne aliquem ead. qu. & caus. Huic itaque virgini libenter tribuero illud Boëtij libro

pontem
Ioannæ
posita.

Fortitudo
virginitatis
propria.

primo de consolat. nullum terrorem potuisse eam peruertere, solamque castitatem, quam Deo Opt. Max. vouerat, eam victricem & admirandam reddidisse: ut propterea Humbertus Monmoretana libro sexto bellorum Britannicorum hos ei versiculos appositè adscripserit.

*Virgo pudicitiae specimē, gratissima mūdo,
Grata polo, quam blāda Venus, mollisque
Cupido*

Flectere non potuit.

Valerandus certè Varanius Doctor Theologus Parisiēsis, qui Ioannæ res eleganti descripsit carmine, testatur ad finē primi libri Reginam Siciliae Caroli Regis socrum, per obstetrices inquire curasse, vtrum Ioanna re quemadmodum nomine puella esset, & virginitatis intemerata claustra in ea fuisse inuenta.

*Carleæ uxoris genitrix tentare pudorem
Constituit, veteres non ignarasq. negoti
Matronas iubet exquiri, sed pura refulsit
Corporis integritas. &c.*

Itaque opinor, si quispiam antiquita-

tem totam perlustret, ac peruestiget, exemplum huic simile reperiet nusquā. Commendatur hæc virgo, quod ensē strinxerit, in acies armatas hasta incurrerit, reperiemus fateor hoc illi esse commune cum multis; magnum censebitur quod exercitus ductauerit, hoc etiam fœminæ aliquot egere, sed quæ cum hisce laudibus, regnum omnium Christianissimum florentissimumque penè omni dignitate & salute euersum sustinuerit, erexerit, restituerit consilio manuque in antiquum ac celebre decus, id sanè solius est Ioannæ Puellæ. Potuit Tomyris Scytharum Regina siue suo siue suorum consilio incautum pertrahere in insidias Cyrum, & eius exercitum profligare, sed & maritum passa erat, & an sua industria id perfectum sit ignotum est. Neque verò ensē vibraſſe legitur, neque regnum naſta eſt rebus omnino deſperatis, vti neque Zenobia illuſtriſſima Palmirenorum Regina, quā deuictam duxit Aurelianus in triūphum. Quod ſi Valaſchæ Bohemicæ geſta ſunt

Ioanna
fœminæ
virtutis
bellicæ
ſingularē
exemplū

vera, laudes quodammodo Ioannæ assequeretur, si vel tot vrbes cepisset, vel aduersus bellicosissimam nec minus armis quàm consilio & opibus instructam tunc Anglorum gentem pugnasset, non aduersus homines belluino potius impetu incitados, quàm humanis directos consilijs, aut denique si Bohemicum regnum tanti tunc fuisset, quanti Francorum & Galliæ totius. Virginem quoque nostram longo interuallo consequuntur Maria Puteolana Virgo cuius meminit Petrarca laudesque recenset libro quarto epistolarum. Vrsina Taurella, Montisfortis Comitissa, Orietta Auria, quæ omnes cū armis in acie steterunt, hostes feriendo, fugando, occidendo, commemorante illarum decora Baptista Fulgosio capite secundo libri tertij factorum dictorumq; memorab. Et Orietta quidem cum classis ingens Amurathis Turcarum Imperatoris insulam Lesbium obsedisset, oppidanique viribus atque omni re ad obsidionem sustinendam deficientibus deditio-

nem

nem spectarent, ipsa absente Catalusio viro insulæ domino armata in medium profiliit, cunctosque viriliter hortata incredibilis audaciæ exemplo eruptione facta stans, ac procurrens, in acie primo impetu in Turcas incurrit, ut eos fuderit, ac maxima strage edita in classem se recipere coegerit, insulamque liberarit: quod post alios Hubertus Foglietta in elogijs testatur.

Iam etsi Romani Clæliam suam summis laudibus extollant, aliæque nationes suas foeminas virtute præstantes mirificè prædicent, ægrè ex omnibus parem Ioannæ ullam proferent. De foeminis autem Alemannis quæ ad expeditionem Hierosolymitanam sunt profectæ, audire licet Nicetam Choniata Græcum, illorum temporum scriptorem qui vidit exercitus ipsos, inter quos, inquit, & mulieres erant non coniunctis pedibus, sed viro-
rum instar diuisis, super pallijs equitantes, hastatæ atque armatæ, ac virili habitu ornatae, Martio vultu, Amazonibus auda-

ciores; in quibus etiam vna excelluit quasi altera Penthesilea, quæ ob limbum vestium auro intertextum Auripes vocabatur. Hæc ille libro primo de rebus gestis Manuelis Comneni, Imperatoris.

Sed hæc communia nobis cum multis, illud singulare ut fatiganti ærumnis Christianissimo ac bellicosissimo regno, Christiana virago vna diuinitus submissa reddiderit Gallis bellacem animum, robustum hostem tota penè Gallia iam victorijs exultantem, regnantem in ea, ac ius populis dicentem, confidentem in vrbe regni Principe media è Gallia occupatoque regni folio depulerit.

Bellatrix audensq; viris cōcurrere virgo.

Pressa nō
oppressa
Ioannæ
virtus.

At, ô iudicia Dei abyssus multa! quæ puellaris fortitudo Galliam vniuersam bello fractam erexerat, recrearatque, eadem diuino permissu, puellæ vindici exitium attulit. Credo ut quæ in vita fortitudinis exemplar fuerat, esset & in morte constantiæ; utque delapsa in manus hostium, eminente etiam inter eos eius in-

nocentia, & tum illibati pudoris, quem neque hostis calumniari posset, tum diuinæ missionis veritate, illustriorem Dei gloriam faceret, ipsa ab impotenti animi tumore, periculosissimo virtutis hoste feruaretur.

Rem vt paucis absoluam, huius Ma- uortiaë Virginis tot, tam præclara stupendaque facinora, cum ex omnibus seculis neque visa, neque audita omnes demirarentur; cumque Compendium ab Anglis obsideretur, illa cum pugnatoribus circiter quingētis eruptione facta in manus hostium venit, qui summo in eam liuore suffusi, odioque iniquissimo inflammati, fortitudinem puellæ diuinam, magicis artibus tribuentes, nouo nec vllis retrò seculis audito crudelitatis exemplo, eam innocentem concremarunt. Petro Cauchonio Bellouacorum Episcopo Anglorum fautore, hunc illi exitum vitæ procurante, ingenti, & Anglici nominis probro, & vniuersæ Galliaë luctu ac mœrore; Cauchonij autem maleficij aucto-

Vitæ integritas
constanti
morte coronata.

ris breui post, ab Ecclesia proscriptione, quem eam ob rem excommunicatum esse à Calixto summo Pōtifice asserit Franciscus des Rues, in descriptione antiquitatū Galliæ, dum de Compendio ei sermo est; sensim denique in peius prolaborere Anglica, reflorescente Gallia, ac puellæ Ioannæ gloria sese ad posteros immortaliter propagante.

Exegi breuiter historiæ fidem; tota ut paucis comprehensa, quasi vno aspectu cerni possit. Nūc ne quis me animo meo honorive gratificantem liberius putet, aut cōfinxisse aut dissimulasse quidpiam, tum ut coacta in angustum, explanatius deducta, suis adiunctis, & circumstantijs magis elucescant; subijciam ingentem vim testium, quorum ex ore, quisque, & historiæ fidem, & puellæ Ioannæ integritatem, atque innocentiam, & de re tota antiquitatis iudicia recognoscat. Stylo varijerunt fateor, quippe aut suo, aut Interpretum sermone loquentes, sed tanto, opinor, æquius fecero, quanto integrius

Testium
rei narra-
tæ summa
copia &
authori-
tas.

sua illis per me constabit integritas. Sunt enim ferè huiusmodi, vt vel eo tempore ipso quo Ioanna vixit, vel paulò post, Ecclesiæ lumina, Reipublicæ columina, scientiarum ornamenta, & virtutum præsidia fuerint.

Primus esto Æneas Syluius vir eruditione ac prudentia insignis qui & Pontifex Maximus ob virtutes suas postea creatus, Ioannæ coætaneus hoc de ea elegans elogium profert cap. XLIII. descriptionis Europæ. *In regno Franciæ, nostra ætate, Ioanna, Virgo Lothoringensis, diuinitus (vt credunt) admonita, virilibus indumentis, & armis induta, Gallicas ducens acies, ex Anglorum manibus magna ex parte (mirabile dictu) prima inter primos pugnans victoriam eripuit.*

Pontifices & Theologi.
L.

Syluius par ætate Diuus Antoninus Florentinus Archiepiscopus ex Dominicanorum fratrum ordine assumptus, in tertia parte historiali capite IX. titulo XXII. §. 7. *Tunc obtulit se (inquit) Regi Franciæ, quadam puella filia Rustici assuetapa-*

II.

scere gregem dicens se missam ad iuuādum exercitum eius, etate octodecim annorum vel circa qua milites in multis instruebat in bellando, & ciuitates capiendo. Hæc equitabat aptè, ut miles in exercitū ibat, cum eis insidias inimicorum detegebat, & modum ad capiendas ciuitates docebat, & multa alia admiratione digna agebat. Quo autem spiritu ducta vix sciebatur, credebatur magis spiritu Dei, & hoc ex operibus suis; nihil enim inhonestum in ea videbatur, nihil superstitiosum, in nullo à veritate fidei discrepabat. Sacramenta confessionis & communionis frequentabat & orationes. Et post multas victorias Regis Franciæ, capta ab hostibus occisa est. Deinde pax facta est inter eos, post millia millium utriusq; partis occisorum & regiones vastatas & desolatas.

111.

Tertius sacris infulis ornatus Paulus Iouius Nouocomensis Episcopus Nucerinus in Britannia descriptione, vbi Henricum Regem ab formæ elegantia, viribus corporis animique bonis commen-

darat. *His tātis, ait, virtutibus una castrē-
sis gloria deerat, concepta iam animo in-
genti, ad auctaq; Anglorum studia quæ sua
consuetudine bella prælia trāquillitati at-
que ocio præferebant, odio scilicet illo in
Gallos à maioribus tradito deflagrantes, à
quibus se Gallia regno & tota ferè conti-
nente pulsos indignabantur, & quod igno-
minia nomine in fortibus viris iras accen-
debat, Puella præsertim Duce quæ mira-
culo quodam excitatis Gallorum animis,
fælici ausu superiores victorias atque illa
decora Anglica virtutis trophæa penitus
euertisset.*

Arnaldus Pontacus Episcopus Baza-
rensis libro 2. chronographiæ refert è ve-
tere memoria, Ioannam puellam annorū
circiter viginti natam, Aureliam urbem
obsidione Anglorum liberasse anno 1428.
& eius auspicijs multa prælia fæliciter à
Francis gesta esse.

Ab his dignitate Principibus ponam
proximè Iacobum Philippum Bergo-
mensē, Ordinis Eremitarum diui Au-

IIII.

V.

gustini, quòd eius testimonium rem de qua agitur omnem luculenter confirmat, illustratq;. Is de ea scribēs in lib. de Claris Mulier. cap. 157. sic ait. *Ioanna virgo Gallica natione Lothoringensis: circa annum salutis nostrae 1429. in puellari adolescentulaeque etate diuinitus (ut creditur) ad multa facinora obeunda praelecta: in metropoli Rothomagēsis civitatis, cum quartum & vigesimum tantummodò ageret annum, in summa castitate decessit igne cremata. Haec itaque in primis obscuris & humilibus parentibus cum procreata esset, nihilominus in tota vita inuicti animi princeps extitit victoriosa. Cum à principio magnam etatis suae partem inter pecora egisset: ubi cum suis sodalibus, cum quibus pascendo pecora obuersabatur, saepius cursum exercebat: & modò huc atque illuc illi frequens cursus erat: & aliquando currando hastam ut fortis eques manu capiebat, & arborum truncos validissimis vulneribus percutiebat. Plerumque etiam aliquam ex equabus quae in grege pascebatur, viriliter*

viriliter ascendebat, & hasta brachio supposita currendo ictus validos inferebat: & qui illam inspectabant, magna animi voluptate & admiratione afficiebantur. Per huiusmodi autem exercitationes mulier euasit fortissima. Erat breui quidem statura, rusticanaq; facie, & nigro capillo, sed toto corpore praeualida: quæ per omnem vitam suam, illibatam seruauit virginittatem, & religionis apprimè custos extitit. Eius sermo satis ex more fœminarum illius patris lenis erat: quem sani eius mores plurimum honestabant. Tam rectus illi sensus, tamq; integer, ut ibi educata, ibiue enutrita crederetur: ubi summa prudentia & omnis consilij ratio vigere videretur. Ea igitur tempestate Henricus Anglorum Rex, atrox bellum Carolo eius nominis septimo Francorum Regi intulerat, idemq; maiorem regni sui partem ademerat: & iam Aurelianam primariam sui regni urbem summa vi oppugnabat: & eius urbis quotidie grauissima erat oppugnatio, eo quod undique circumfessa erat,

nec aditus ostendebatur quo posset talis obsessio solui: in ea quippe omnis regni spes vertebatur: qua quidem amissa de toto regno Gallie actum esse videbatur. In hac ergo difficultate Rex constitutus, & angore animi incertus angebatur: nec quod consilium sequeretur, rationem ullam inire poterat. Tum hanc virginem, dum hæc agerentur, contigit pascendo pecora in sacello quodam vilissimo, ad declinandam pluviam obdormire: quo in tempore visa est se in somnis à Deo qui se illi ostenderat admoneri, tumq^{ue} sextum & decimum tantummodò agebat annum. Qua admonitione permota, cōfestim grege omisso quem pascebat: in castra ad Regem est profecta. Quæ cum ad eius tentorium pervenisset: præfata est velle se de rebus maximis cum Rege loqui, quod prædicaret se diuinitus à Deo missam. Primores & Cubicularij aspernabantur puellam quod cultu & corporis habitu una ex agrestibus esse, sicut erat, videretur: unde eam duris verbis atque asperè increpabant, quod tam audax,

tamq̃ petulans & temeraria esset: ut tantum Regem stulta & subrustica adire & alloqui præsumeret. Illa nihilominus à Deo confortata & impulsæ, in proposito perseverans, instanter exposulabat ad Regem ingredi licere, quum se magna sibi afferre diceret & seria, non utique leuia aut minimè ludicra. Quibus ex rebus permoti aulici, eam demum ad Regem introducere. Introducta autem ad Regem Pulcella Janna, quum ad ipsius genua procidisset: Maiestatem regiam ex more, omni cum reuerentia salutavit. Salutatoq̃ Rege, primoribus cunctis palam audientibus: sic locuta est. Gloriosissime Rex: ego ancilla tua minima, omiſſa mei gregis custodia, cui tãquam una ex agrestibus præeram, omnipotentis Dei imperio, ad opem tibi ferendam, qua regnum tuum amissum recuperes, huc impigrè acceſſi: diuinoq̃ iussu, ducem totius tui exercitus, moneo me declarari iubeas. Nec mireris quod puella inops & agrestis, & huiusce vilissimæ sortis huc prodierim, ausaq̃ fuerim tantum impe-

rium suscipere: quia omnipotenti Deo sic visum est, infirma & contemptibilia eligere, ut fortia confundat. At Rex horum verborum gravitatem secum revoluens, ilico tacitus & mirabundus ad primarios suos sustulit oculos. Eademq; admiratio ceteros obstupescit proceres, submissa voce dictitantes: hoc certè diuinum, non humanum esse consilium. Rex autem inquit. Pulcella, ingenuè profiteris te à Deo mihi omnino in auxilium missam esse. Sed qua ratione? Tu fœmina es admodum adolescens, rerum omnium inexperta; & quomodo præssumisti tibi tanti muneris, tantiq; exercitus assumere administrationem? Hoc utique tui non est officij & ætatis tennella munus, sed iure militari peritissimorum, exercitatisimorumq; virorum. Itaque moneo semel atque iterum, ut videas etiam atq; etiã quæ afferas & quæ apportes. Constanti vultu & intrepido confestim respondit. Maxime rex obsecro, ne plura percunctari pergas, Deus à quo missa sum, huic tue necessitati consulat, nec peto teras

ultra tempus, si chara tibi est tui regni incolumitas. Et ut verum intelligas, accipe quæ sub motis arbitris tibi dicam. Postquã verò cum Rege locuta est, Rex propè stupefactus & incertus quid responderet. E vestigio illam totius sui exercitus ducem enūciavit, cunctis primoribus acclamantibus. Res propè incredibilis & inaudita, & maximo spectaculo digna, si animadverteris tot Principes, Regemq; ipsum in bellis exercitatisimos, sese imperio adolescentulæ sedecim annos natæ subijcere, quæ ex ovium & suum vel porcorum gregis excepta fuerat: videre eam virilibus indumentis & armis indutam Gallicas ducere acies. Igitur postquam Ianna hæc virago, totius regij exercitus declarata est Imperatrix: mandavit Rex, coruscantia arma necessaria eidem statim dari, equumq; fortissimū admoneri, faleris alijsq; ornamentis mirificè coopertum: quem cum ascendisset, etiã galea suo capiti superinduta, capilli capitis sui per humeros dispersi dependebant. Cumq; taliter indutam & armatam om-

nis spectaret exercitus, & equo intrepide insidentem: visa est omnibus eques quidā è cælo demissus. Quæ cum parte copiarum terrestri itinere equo inuicta, contendit ad Aurelianam urbem obsidione soluendam: Rex verò cum omnibus alijs copijs, suisq; primoribus Principibus strenuissimis: ad Rhodanum flumen castra castris opposuit. Ipsa autem cum ad hostem peruenisset, extemplo manum summa vi conseruit. In quo quidem conflictu, & prælio, dux totius hostilis exercitus cum decem millibus Anglorum è vestigio fuit interfectus, & triū horarum spatio, tria hostilia recepit munitissima propugnacula. Quo viso: Rex omnem suum exercitum validissimum ad liberandam urbem admouit. Atq; ita intra quatrimum ipsa ciuitas (hoste pulso) cum maxima huius adolescentule gloria, obsidione liberata est: quod potius diuinū quàm humanum factum omnes reputarunt & crediderunt. Hanc quidem rem gestam quidam optimus & locuples testis, vir clarissimus, nomine Guilielmus Gua-

schus serìò mihi exposuit: tunc regius aulicus, prout audierat & viderat. Postquam hoc per octo annos continuos, tricies cum hoste iusto pralio conflixit. Ex quibus semper superior gloriosa discessit: capto, maxima cum ipsius gloria atq; triũpho, Anglorum strenuissìmo Imperatore, quem suo Regi vinctum tradidit. Quibus gestis, regem ipsum Carolum ouãtem Rhemos perducens, ex more à suis proceribus inunctus & consecratus est Rex: quod antea minus facere poterat. Inunctus itaq; Rex atq; ex more corona donatus cum maxima omnium latitia, suiq; gloria atq; triumpho: in templo ea associante est præsentatus. Vetere enim lege non licet Francorum Regem alibi, quàm ea in vrbe consecrari. Cum omnia Gallorum Regum insignia, ibidem posita reseruentur, quæ videlicet adhibentur rege coronando: in primisq; sacra unctio, è cælo demissa. Hæc igitur Ioanna pulcella virgo, cum magnam gloriam in armis esset adepta, & regnum Francorum magna ex parte deperditum, è manibus

Anglorum pugnando eripuisset, in sua flo-
renti etate constituta: non solum se mori-
turam, sed & genus suæ mortis cunctis
predixit. Nam ab ipsis Anglis tandem in
prelio capta, & ad Rhothomagensem vr-
bem violenter perducta: ibidem ab ipsis &
ipsorum Rege, veneficij & artis magicæ vi-
tio incusata, sæuissima ignis morte demum
damnata est. Et hic tanta Virginis vitæ
finis fuit: quo quidem atrocissimo suppli-
cio, hæc tam inaudita virtutis mulier in-
dignè occisa est. Post multos autem annos,
Carolus ipse optimus sanè Rex, Rhotho-
magensi urbem recepta, eo in loco ubi atro-
citer concremata fuerat Ianna Pulcella,
pro monumento & titulo puellaris decoris,
crucem æneam & quidem eminentissimā
inauratāq; poni iussit. Ludovicus autem
rex postea patri succedens, agrè admodum
ferens mortem tam indignam tantæ Vi-
raginis, à Pio Pontifice Romano eius no-
minis secundo impetrasse fertur: ut duos
Iurisperitos in Galliam mitteret: qui ite-
rato diligentius illius causam & vitam
cognosce-

cognoscerent. Qui ubi in Galliam demum peruenissent, ilico duos ex falsis consiliarijs & iudicibus superstites adsecitarunt. Qui postquã causam huiusmodi accuratè diligenterq; omnem cognouissent: deprehenderunt planè mulierem innocētissimam falsò fuisse damnatam, ac omnia conficta contra ipsam extitisse: quæ videlicet de veneficio aut arte magica aduersus illam crimina dicta fuerant. Quinimo omnem eius vitam, tam præclaris gestis ita aequaliter consensisse, nec quidpiam ab ea unquam admissum, quod religionem vlla ex parte violare potuisset. Quas ob res utrosq; eodē mortis supplicio affecerunt: quo ipsi innocentissimam virginem diu ante promulgauerūt atq; damnarunt. Atq; huic damnationi additum est, ut duorum aliorum iudicum mortuorum ossa, è sepulchris effossa, igni similiter cremarentur. Eoq; loci ubi hac virago extiterat cōcremata, templum poneretur, & ex reliquis prædictorū bonis quæ publicata fuerant, ibidem ad Dei summi honorem, ipsiusq; defunctæ

propitiationem: quotidianum sacrificium institutum est. Itaq; hoc modo huic admirabili fœminæ decus omne recuperatū est. Quibus quidem meritis & inauditis facinoribus, Ianna hæc Pulcella, meritò à nobis claris mulieribus venit hic applicanda.

VI. Extat libellus Germani cuiusdam Laudayani anonymi Clerici qui inscribitur Sibylla Francica, seu de admirabili puella Ioanna Lotharinga pastoris filia ductrice exercitus Francorum sub Carolo VII. in cuius primi rotuli principio habentur hæc verba. *Exorto nuper rumore aures audientium qui titillat, de quadam Sibylla in regno Franciæ, quæ exorsa est prophetari famarutilante fulgida, bonæ odore opinionis omnium respersa, vita, moribus, & conuersatione spectabilis; quam vulgus sanctitate dicit fulgere; doctam quoq; ad bella & praliorum euentuum præsciam.*

Prouectus eodem rotulo longiùs de hac ipsa puella hæc addit; *Frequenter purgat & lustrat conscientiam per puram confessionem, & roboratur in virtute spiritus*

sapientia in Eucharistia perceptione, conuersatione humilis, modesta & bonis consentiens, rapinam pauperum valde detestatur, pupillorum orphanorumq; depressionem. Quare honoris statum in Francia obtinet.

Idem sub finem secundi rotuli anno M. CCCC. XXIX. conscripti ita memorat. *Ista Virguncula in regno Francia Sibylla laudatur ab omnibus, in professione fidei Catholica, & in ceremonijs inuenitur suffulta. Sacramēta Ecclesiastica valde veneratur, vita laudabili conuersatur, religiosa in actis, & agendis, in nomine S. Trinitatis cuncta opera quantumcunque grandia aggreditur; & ad finem perducit optatum, firmans pacem, pauperum tollens inopiam, iustitiam sectando diligit, nihil vanitatis mūdi, neq; pomparum aut diuitiarum exquirat.*

Hic te appello prudens Lector; Qui de Ioanna ei contemporalis ista scribat, & scribat ex communi fama & sermone; nonne ab integerrima vita & Christianis-

simis moribus Christianam virginem, omni posteritati, omni æquo rerum æstimatori ac iudici suspiciendam commendat?

VII.

Septimus haud leui authoritate Ioannes Nider Sueuus, ordinis Prædicatorum Sacræ Theologiæ Professor & hæreticæ pestis inquisitor in suo insigni libro de Maleficis & eorum deceptionibus cap. 8. de hac bellatrice virgine ita testatur. *Infra decem annorum spatia nouiter in Fræcia quædã virgo Ioanna nomine tam Prophetico spiritu, quàm miraculorum potestate, ut putabatur clarens. Hæc enim veste virili semper utebatur, nec ullis Doctõrum quorumcunq; persuasionibus emolliri potuit, ut tales deponeret vestes, fæmineis contenta, præsertim cum se palam virginem, & fæminam esse protestaretur. Sub hoc inquit habitu virili in signum futura victoriæ, ut verbo prædicam & habitu, à Deo missa sum iuuare verum Francorum Regem Carolum & in suo firmare regno, à quo eum fugare nituntur Rex Angliæ &*

Dux Burgundia. Pro tunc enim hi iuncti mutuò cadibus & armis Franciam premebant gravissimè. Igitur cum suo Domino Ioanna continuò velut miles equitabat, futura & fausta multa prædicebat, victorijs bellicis intererat, & alia mirabilia perpetrabat: de quibus ne dum Francia, sed omnia Christianorum regna stupebant.

Non dissimilia Ioannes Naucerus Præpositus Tubingensis qui in secundo volumine chronographiæ, generatione 48. sic habet. *Anno Domini 1429. venit ad Regem Carolum in Franciam, quædam Puella plebeia ex Lotharingia, quæ asseruit se missam à Deo, ut per ipsam dictum regnum quo Rex erat ferè destitutus, ad eius obedientiam reducatur. Erat raso capite admodum viri & volens ad tumultus bellicos exire, vestibus & armis virilibus induebatur, rediens autem de bello, habitum muliebrem reassumpsit. Rex in tanta perturbatione faciliter credulus, Marescalcum & nonnullos alios sibi adiunxit, auxilium laturus Aurelianis obsessis, ubi*

VIII.

Puella Anglicos ab obsidione repulit, & quendam magnum Angliæ Capitaneum occidit. Aurelianis liberatis, Anglicos Frāci insequuntur duce Puella, & oppidum Gergeum capiunt, Anglos trucidant, deinde Talebotum Capitaneum supremum abeuntem insequuntur, & commisso prælio territi Anglici fugiunt, ac sternuntur. Rex Carolus deinde multo nobilium & Baronum comitatu stipatus ingreditur Rhemos, & illic coronatur, in regemq; inungitur. Post coronationem Soisson, Castrum Thierri, & alia loca usq; ad S. Dionysium in Francia, per Anglos occupata ad obediētiam reducit: nā Dux de Bethford pro Anglicis locum tenens iuerat Rothomagum, pro munienda Nortmannia. Itaq; Rex etiam S. Dionysium recuperat, & tunc laesa fuit puella iuxta Parisios, rex deinde ibat versus Bituriges. Anno Domini 1430. obsessio Compendio capta est puella supradicta, per quendam Picardū qui vendidit eam Anglicis & Anglici eam Rothomagi occiderunt incineratam.

Sed & de Gallis & de Gallorum adiutrice Ioanna, multò etiam honorificentius, Magister Henricus de Gorckein in principio libri primi de puella militari Francorum ita scribit: *Tulit me Dominus cum sequerer gregem, & dixit mihi Vade & prophetiza ad populum meum, Israhel, Amos 7. Populus Israel populus regni Franciæ non incongruè potest spiritualiter nuncupari, quem fide Dei & cultu Christianæ religionis notum est semper floruisse. Ad Caroli VI. Regis filiũ quadã inuẽcula pastoris cuiusdã filia, quæ & ipsa gregem ouium secuta fertur, accessit, asserens se missam à Deo quatenus per ipsum dictum regnum ad eius obedientiam reducatur. Ne autem ipsius assertio reputetur temeraria, etiam signis supernaturalibus utitur, sicuti reuelare occulta cordium, & futura contingentia prauidere. Refertur insuper quod sit rasò capite ad modum viri, & volens ad actus bellicos procedere vestibus & armis virilibus induta, ascendit equum, quæ dum in equo est, ferens vexillum, sta-*

tim mirabili viget industria, quasi peritus Dux exercitus, ad artificiosam exercitus institutionem. Tunc quoq; sui efficiuntur animosi: è contra vero aduersarij timidi, quasi viribus destituti. Ubi autem de equo descendit, solitum habitum reassumens, fit simplicissima, negotiorum secularium, quasi innocens agnus imperita. Fertur etiam quod vixit in castitate, sobrietate, & continentia, Deo deuota, prohibens fieri occisiones, rapinas, ceterasq; violentias, omnibus his, qui ad dictam obedientiam se volunt exhibere. Propter hæc ergo & similia, ciuitates, oppida & castra se submitunt regio filio, fidelitatem sibi promittentes.

Et paulò postidem Magister Henricus de eadem Puella loquens hanc assertionem subiicit: *Hanc filiam à Deo specialiter missam ad ea quæ non humanitus sed diuinitus sunt opera, cui fides est adhibenda.*

x.

Præclarissimè autem maximèque ad Theologicas rationes Dei in re nostra consilia

consilia explicans, Iacobus Meyerus Ba-
liolanus & Sacerdos Brugenſis, lib. 16. an-
naliaum Flandriæ rem & iudicium ſuum
ſic adſcribit. *Principio Martij anni 1428.*

acceſſit ad Carolum Regem apud Chinonẽ

Ioanna
puella
Franciæ.

*agentem Ioanna illa virgo Gallica annos
nata circiter 18. dicta ob intactum pudo-
rem Puella, equiſonis inſtar ſolita cuſtodi-
re & adaquare equos, pauper tamen &
modicis orta parentibus. Hæc ſe diuinitus*

Eiuſdem
promiſſa.

*aſſlatam dicebat, pulſuram ſe Anglos ab
urbe Aurelianenſi Regemq; perducturam
in Remos ad ſacram vñctionem. Irriſa
primum habitaq; pro fatua: tandem ta-
men, morum ſuorum ſanctimonia ac pru-
dentia fidem fecit, ac quidquid verbis erat
pollicita factis compleuit. Quis non videt*

Deus mi-
ſertus
Gallorũ
miſit illis
Ioannam
regni via-
dicem.

*hoc Dei fuiſſe opus? Quis dubitare poteſt
quin facta hæc ſint per immenſam Dei cle-
mentiam? Ipſe enim eſt qui non in perpe-
tuum irascitur, neq; in æternum commi-
natur. Regem vehementer pœnituit morũ
anteactæ vitæ, quotidieq; precibus ac la-
chrymis veniã à numine poſtulabat. Cre-*

bras supplicationes per omnes regni Ecclesias indixit. Crediderim per Gallias pios fuisse homines, quorum preces erant ante Deum exaudita. Dederat enim Gallia horrendas pœnas adeò ut à nemine perscribi satis possent. Ostendere Deus Opt. Max. volebat, ab se uno omnem dari victoriam. Eam per fœminam, per sexum, fragilem velle operari, quo vanitatem superbiamq; Gallicæ Anglicæq; gentis retunderet, ne diutius suis duntaxat fiderent viribus, suæ inniterentur prudentiæ, sed à cœlo petere victoriam discerent, eamq; nec sibi nec suæ fortune, sed soli numinis benignitati ascriberent.

Et paucis interiectis, latius in Ioannæ res gestas, tanquam in apertissimum diuinæ gloriæ campum eleganti oratione ingressus eas earumque euenta sic oculis subiicit.

Finis Angli-
cæ fœ-
licitatis.

Hic finem capit fœlicitas Anglorum in Gallijs. Huc usque nemo illorum telis resistere valuit. Hactenus non vinci, sed vincere sueti. Grandis nunc mutatio, in

qua virtus, robur, fortuna, victoriæq; illorum abijt retrò, ut manifesta appareant opera Dei, ut intelligamus, quàm fortes fœlicesq; sint à quibus stant numina, contrà quàm debiles & elumbes quibus cælum non fauet. Aurelianenses verò iam fame propè domiti, ita rerum omnium laborabant penuria, ut in extrema agerent necessitate: quibus omni humano destitutis auxilio, diuina benignitas succurrit: quod homo non potuit, Deus suppleuit. Ioanna virgo Dux Gallorum non ascita, non creata, non electa, sed à Deo data, potestate à Rege accepta, copias quas potest adunat, copiosum omnis generis commeatum iniuitis hostibus, in urbem importat. Dehinc eruptionem fortissimè facit, omnes munitiones, vallos, fossas, palos, aggeres, excitata castella tam multa dissipat, prosternit, incendit, hostes in fugã propellit, urbem obsidione liberat, mense Maio, haud absq; multo hostium sanguine. Inde Magdunũ, Gergellum, Bogenciacum, Genouillam capit, vincit, fundit, fugatq; Anglos. Ad

*Ioanna
Aucilia-
num obsi-
dione li-
berat.*

*Eiusdem
Ioannæ
succellus.*

Patacum in Belsia signis collatis Anglorū exercitum profligat, Ioannem Talbotum summum Ducem cum alijs multis capit interfectis compluribus. Dehinc Altiſſiodorenses, fanum Florentij, Tricasses, Cathalaunosq; recipit, Regemq; Carolum Remos ad sacram vñtionem perducit: quam ubi ab Reginaldo loci Pontif. mense Iulio accepisset, statim veluti altera Pentefilea aut Semiramis Velliacum, Priuinum, Laudunum, Augustam Sueſſionum, Briacastella & oppida, Crespiacum, Compendium, Caesaromagus Bellouacorum victis pulsissq; hostibus recipit. Ad hæc autem perficienda socij adiutoresq; illi fuere Rex ipse Carolus, Carolus item Dux Borbonij, Arturus M. equitum, quanquam hic Remis non aderat, Ioannes Alenconius, Stephanus Hyrus, Poton Santralla, Joannes Aureliensis nothus, Reginaldus Pontifex Remorum idem Cancellarius Gallia, Vindocinensis, Lauallus, Ambrosius Lora, Renatus Barenſis, Gaucuria, Grauilla, Carolus Alebretus, & quidam alij. Henricus

Carolus
VII. Remos per-
ductuseo-
ronatur.

Duces lo-
anorū au-
ziliates.

Cardinalis Angliæ collectum pugnatorum numerum in Boëmiam ducendum, in Galliam adduxit auxilio suis Anglis. Silvanetum puella tentat, sed propter vires Burgundorum à pugna abstinet, non enim eadem illi fœlicitas erat contra Burgundos quæ contra Anglos; unde quidam. Anglos (inquit) vicit, Burgundos vincere nequivit. Sylvanetum tuebantur præter Anglos Ioannes Villerius Adamsus, Ioannes Croiacus, Ioannes Crequiacus, Antonius Betuniensis, Ioannes Fossella, Hugo Alnetanus, Ioannes Alnetanus, Simon Lalanus, Sauosius cum septingentis equitibus. Dubia Ioanna, nunc pugnandum, nunc non pugnandum suavit. Trecenti circiter leuibus prælijs interierunt, & ita discessum. Sed de puella Synchronum puella scriptorem audiamus loquentem.

*Ioanna
Burgûdos
vincere
nequit.*

Ductu (inquit) Puella Franci victoria potiuntur, & lassidas Dux Anglorum submergitur in aquis Ligeris, ex turri in profluentem salire coactus ardente turri. Ductu Ioanna puella Francus unus mille

*Anonymus de
Puella.*

fugavit Anglos, & duo fugauerunt decem millia. Dei voluntas erat victoriam ponere in sexu fragili. Castra hostium expugnata, turres fractæ, Sagittæ Anglorum nihil non ante penetrantes, retusa acie nihil amplius potuerunt. Repentè fortune immutatus cursus, Fræcorum res quæ hætenus deiectæ, prostratæ ac miserrimæ erant, erectæ protinus sunt, affulsitq; diuinitus fœlicitas. Anglorum verò res hætenus secundissimæ retrò dilabi cæperunt.

Nomen
Ioannæ
Anglis
formida-
bile.

Tantus solo Puella nomine eorum animis incessit pavor, ut magno eorum plurimi firmarent Sacramento, quod solo audito eius nomine, aut signis eius conspectis, vires animumq; perderent, ita ut nec arcus tendere, nec iacula vlla mittere valerent, nec ferire hostem (ut soliti erant) haberent potestatem. Mirabilis Deus in Sanctis suis. Ioannes nothus Aureliensis idem Comes Dunensis in Carnutibus, & Ioanna Puella Duces præcipui omnibus in rebus & bellis erant. Angli omnibus locis excussi, fusi, fugati, cæsi. Carolus Rex puellæ ductus

Remis inunctus & coronatus. Trecis Regem honorificè suscepit Ioannes acutus Episcopus loci laudatissimus. Remi, Cathalaunum, Compendium, Bellouacum, Laudunum, Suesiones, Senones, Carnutes, aliæq; ciuitates & populi pulsæ Anglis in fidem redeunt sola Dei gratia & benignitate.

Hæcille. Et paulò postidem Meierus. Puella capto fano Dionysij, urbē regiam, hoc est, Lutetiam Parisiorum oppugnat. Prefectus tum urbis erat loco Bethfordij in Normannia occupati Ludouicus Luceburgius Episcopus Morinorum, sed carnalis magnusq; Satrapa, quem, & Anglorum factio Cancellarium sibi crearat. Simul præsidio ibi erant ex nobilitate Philippi Ioannes Crequiacus, Ioannes Villerius, Simon Lalanus, & Ioannes à bona Valle. Pugnatum egregiè per horas quatuor ad portam Diui Honorati, sed Puella in crure vulnerata postquam benè multos ex suis amisisset ad fanum Dionysij se recepit. Anno sequēte Puella inuadit Anglos ad locum

Oppu-
gnatur
Lutetia à
Puella.

cui nomen Pons Episcopi, cadunt Angli
 XXX. & Galli aliquot. Ioannes Brimaus
 captus à Potone Santralla & magno re-
 demptus. Puella haud procul latiniaco ad-
 amnem Matronam capit Franciscū Atre-
 batem dictum fortissimum Burgundicæ
 partis virum, quem interfectis multis Bur-
 gundis securi percussit. Eum virum ma-
 ximè plangebant Burgundi, cœperuntq;
 ob eam rem puellam magis odisse. Et pridie
 feriarum ascensionis Dominicæ qua tum
 incidit in IX. Calendas Iunias hora quin-
 ta pomeridiana, Ioanna Puella & Poton
 Santralla cum quingentis circiter pugna-
 toribus ex Compendio erumpunt ut apud
 Mariniacum obruāt Bodonem Noiellam:
 sed Angli & Ioannes Lucemburgius qui cū
 cohortibus suis non procul aberant, forti-
 ter Bodoni accurrunt auxilio. Pugnatum
 est acriter apud Clariacum; sed Galli cum
 crescentem hostium suorum numerum per-
 ferre nequirent, Compendium se recipiūt.
 Burgūdiones propter necem Francisci A-
 trebatis puella magis infesti acriter inse-
 quuntur.

Franciscus
 Atrebas
 securi per-
 cutitur à
 puella.

*quuntur illamq₃ suos ante se ducentem pri-
usquam peruenire posset in oppidum equo
deiectam capiunt, ductamq₃ Mariniacum
tradunt suo Duci Joanni Lucemburgensi,
qui primum apud bellum locum, dehinc in
arce Bellorauorio diu illam tenuit capti-
nam. Memorant quidam ab Gulielmo
Flauiacensi oppidi præfecto hostibus ven-
ditam, eamq₃ proditionem suam statim
secuturam mortem puellam prædixisse cõ-
firmant.*

Puella ca-
pitur à
Burgun-
dis.

Sed de ipsius innocentia nos cum Me-
yero atque alijs postea dicemus.

Quo in citandis testibus progredior
longius, eo me consilij mei minus pœni-
tet; adeò singuli aut addunt aliquid alijs
non dictum, aut ab his dictum, fide & di-
ligentia sua confirmant; cuncti certè vnà
positi, mirificum omnium huius historiæ
partium concentum faciunt. Ac quorum
authorum iam testimonia posui, eis quã-
quam videbatur nihil addi posse, tamen
quem illis subijcio multa habuit histori-
cus & grauis & diligens, quæ eruta ex op-

XL

timis antiquitatis monumentis facta & consiliaijs adijceret. Is est Robertus Gaguynus Ordinis sanctæ Trinitatis minister generalis, cuius in historia Caroli VII. est hæc oratio. *Erat illis diebus apud Vallicolorem annos viginti nata Iohanna quæ patre Iacobo Darco: matre Isabella in vico Dampremo genita, ob corporis perpetuam integritatem Puellæ appellationem obtinuit. Ea rerum præsentium aduersitatibus Deo authore compatiens: Robertum Baudricurtum oppidi præfectum: aliosq; complures præsidij equites duce auunculo suo crebrò adibat: eos admonens ut ad Carolū eam deducerent allaturam rebus desperatis non minimam opem. Mulierem Baudricurtus parui à se æstimatam iterū atq; iterum aspernatus: perseverantem demum exaudiuit: datisq; puellæ corporis custodi- bus eam ad Regē duci iubet. Ad Carolum veniens puella: tametsi nullo illum tempore vidisset: ipseq; cæteris aulicis veste minus ornatus ex industria esset: reuerēter tamen atq; urbanè Regem intuita: salve inquit*

Ioannæ
puellæ ad
Carolū
aduentus.

generosissime Rex detq; vitam tibi prosperam Deus. Cui cum se Regem esse Carolus pernegasset: ab inquit Puella: tu ipse Rex es Francorum nobilissimus. Adhac verba spem cepit Rex cuiuspiam fortunæ melioris. Itaq; selectis prudentibus aliquot viris qui eam diligentius probarent: illa se ideo venisse constanter affirmat ut Carolum in regnum restituat: Deum ita decreuisse: ut se duce Aurelianenses obsidione liberentur: & Angli Francia tandem extrudantur: perducturam se Carolum ad Remos: ubi more maiorū sacra vñctione linatur: de quibus omnibus oracula diuinitus accepisset. Tantum copijs opus esse quas illi ducendas Carolus cōmittat. Et dum de alijs arduis & ad religionem Christianā pertinentibus multa accuratè rogaretur: supra fœminæ sensum respondebat. Siue enim de diuinitate siue de bello quæreretur: non muliebriter sed scitè: & quasi perita loquebatur, ita ut mulier admirationi esset multis. Perpenso igitur consilio visum est optimum factu esse: si auspicio eius Carolus ad bellum

uteretur. De importando Aureliam com-
 meatu primum mandatum Puella acce-
 pit: quam Rayus & Delorus aurea mili-
 tia equites valida armatorum manu sti-
 pati comitabantur. Profectis Blesam obuij
 adueniunt Reginaldus Chartus Remorum
 Pontifex Franciæ Cancellarius: Aurelia-
 nensis nothus: Stephanus Hyrus: aliqꝫ non
 pauci electi milites. Commeatu curribus
 imposito & milite instructo: ex Blesis per
 Solonam Iohanna mouet. Atqꝫ postridie
 Aurelianum versus progreditur. Vteba-
 tur Puella in expeditionibus gladio, quem
 hoc modo nacta erat. Est templum in agro
 Turonensi diuæ Catharinæ dicatum: gen-
 ti regionis illius plurimum venerabile ubi
 donaria plurima atqꝫ vetustissima visun-
 tur. In eo templo antiquum ensẽ inter sa-
 cras oblationes utraqꝫ parte lilijs insculptũ
 extare Carolo Iohanna patefacit: petens
 ut misso ad templum armorum fabro gla-
 dium illi dono perferat. Admiratus Ca-
 rolus si templum illud aliquando Iohanna
 inuississet; percontatur mulierem qualiter

Ioannæ
 gladius.

idnorit. Neq³ inquit Puella locum noui,
neq³ humano ad hoc authore vſa ſum, Deus
eſt qui reuelauit. Mittit Rex opificem qui
inuentum ad ſe gladium ferat. Proſectus
ad templum faber enſem inter ſqualentia
alia arma rubiginofum ad Carolum per-
fert. Quo mox Iohannam Rex donauit.
Sed de Anglis orationem perſequamur.

Angli qui ad propugnaculum ſancti
Iohannis Blanci erant Francos venire au-
dientes loco deſerto ad Fratrum Auguſti-
nenſiũ ades quæ ad extremũ pōtem in Diui
Laurentij ſuburbio ſpectant, ſe receperunt.
Puella verò per medios hoſtes flumine tra-
iecto, quem vehebat cōmeatum in urbem
importauit. At quandoquidem victualia
tenuia erant, Rayus & Delorus cum ſuis
Bleſam remeantes ciuitatis periculũ Can-
cellario narrant: cui niſi ſuccurratur ven-
turam eſſe in hoſtium poteſtatem. Et Iohā-
nes Aurelianenſis nothus magnoperè ora-
bat laborantibus ciuibus ſuppetiatum iri.
Stetit omnium ſententia copioſiſſimũ com-
meatum ad obſeſſos ferre & iter facere per

Belsiam qua parte obsidio ciuitatem magis urgebat. Copijs igitur vecturisq; ritè ad iter ordinatis, Franci (dimidia quæ est inter Blesam Aurelianumq; via confecta) castra ponentes restiterunt: se suaq; corpora curantes. Crastino diluculo insequentis diei cum ad duo passuum millia ciuitati successissent, Iohanna assumptis aliquot cū valida manu præfectis urbe egressa: venientibus obuiam pergit: atq; ita exercitibus coniunctis cum Franci inferiores hoste non essent: in conspectu Anglorum prætereuntes in ciuitatem recepti sunt. Victualibus ciuitate confortata Iohanna armis egregiè instructa ad propugnaculum quod sancti Lupi appellabatur, mouens Anglos qui in eo erant potenter oppugnat atq; vincit: nemine superstitie qui vel occisus vel captus non fuerit. Hæc cum in conspectu maioris propugnaculi gererentur: tentauere hostes eruptionē facere & suis auxiliari: sed mox in propugnaculum se receperunt. Franci propugnaculo dissoluto postquam in urbem rediere multis coitionibus clam habitis an

*Londonias propugnaculum oppugnatum
irent: communicato tandem cum Iohanna
consilio, illa succensens; nihil me inquit pro-
ceres celaueritis, potis sum hac & maiora
animo condita meo silere: tacuerant siqui-
dem Proceres ne muliebri leuitate res in
vulgum prodiret: quod propugnaculum
oppugnandum simularent: ut Anglos qui
Salonam versus in obsidione erant, in alte-
ram Ligeris ripam allicerent dum suis au-
xilium venire festinarent: quibus à sua sessi-
one mouentibus Franci eorum stationes
occuparent. Nec iram Iohanna posuit:
donec Ioannes Aurelianus nothus id quod
consilio definitum esset illi enarrauit. Co-
gnito decreto sentētiam inquit Puella lau-
do si opus reuera asit. Nam cum cordata
esset & confidens Deo mulier: multa quæ à
Præfectis de bello consulebantur improba-
bat: nihil obsidionis tempore sinistrè aut in-
felicitè gerens. Aderat enim prælianti-
bus suis armis instructa: equo usque potenti
& animoso: in quem expeditè instar expe-
diti militis conscendebat. Igitur multa ani-*

mo cogitans; opere pretium censeat si hostem inuadat qui ad extremum pontem sancti Laurentij suburbana sedebat: erant in flumine naues non pauca muris ciuitatis deligatae: in eis multo milite imposito Ligerim transmittit, copiasq; in continentem exponit: insultũ factura in hostem. Pugnatum illic est donec occumbente ferè Sole receptui signum Puella dat: regredientes in naues Francos Anglos adoritur. Eam ob rem Puella suos cohortata hosti restitit: propulsatque persequens eum usq; ad Augustinensium ades: quas licet Anglus munitissimas fecisset: captas tamen fugato hoste Franci occupauerunt. Erat ad eum quem dixi pontem proximè Augustinenses turris ex quadrato lapide cum propugnaculo & fossa: in eo loco fugiens Anglus se recepit. Ubi excubias continua nocte habès Ioanna cum illuxisset propugnaculum oppugnare iubet: asserens tempus proximè adesse cum Anglus vincendus atq; regno expellendus erat. Dum hinc Francus instat: illinc hostis acriter se tuetur: Ioanna in humero scorpione ex pro-

ex propugnaculo misso vulneratur: quo vulnere neq, tristior neq, negligentior fuit: stans continenter ad fossæ labrum & militem fortiter agere admonens. Continuata obsidione cum ad vesperasceret: Francus in fossam omnibus partibus dilapsus in propugnaculum scandens vi expugnat: quadringentis Anglis interemptis: cum præfatis tribus Mollino, Ioanne Pommaro, & Guillermo Glasida. Ceteri omnes capti in potestatem venere Francorum. Hæc à Ioanna gesta, hostis qui Belsiam versus grande propugnaculum habebat prospicere facile poterat. Casu igitur suorum perterriti hostes postquam ab urbe campanas toto classico velut in communi lætitia pulsari exaudiunt: mane factò Magdunum (deserta obsidione) confugiunt. Ad hunc modum dissoluta obsidio est, & ciuitas ab hostis potestate erepta: quod maximum momentum ad Caroli fortunam fuit. Talibotus autem agrè ferens se Aurelianensi circunvallatione frustratum damnum compensaturus Lauallum aggreditur ar-

cem oppidumq; nocturno furto inuadens. Cepit ibidem Lauallum comitem: quē donec quinque & viginti scutorum millia illi exsoluisset in vinculis habuit. Interim Ioanna Carolum Regem sollicitat maiores copias cogere & sibi recuperare quæ in agro Aurelianensi ab hoste occupabantur. Vocato propterea ad se Alenconij duce Carolus Gergeum petere. Adfuerunt mox Johannes Aurelianensis nothus: Boussacus Mareſcallus, Graulla, Culantus Admiralus: Ambrosius Delorus, Vignolus Hyrus, & Guillelmus Brussacus, qui tametsi stipendio regio non iuuarentur, visenda tamen Ioannæ causa quam diuinitus missam arbitrabantur: militare non recusabant. Itaq; Gergeum Præfecti oppidū post octauum obsidionis diem expugnant. Nec multis interpositis post diebus Magdunum auctis copijs Carolo iubente mouentes: pontem cum turri capiunt: positog; præsidio, Bogentium protinus contendere. Audito Francorum aduentu Angli relicto oppido in arcem quæ est ad pontem supra Ligerim am-

nem confugiunt: quam (dimissis liberè abire Anglis) Franci receperunt. Recepta arcerumor per Francorum castra increbuit Tallebotum & Ioannem Fastolum cum quinque Anglorum millibus apud Ienuillam in Belsia visos esse, qui Magdunum proficisceretur. Missis exploratoribus postquam id verum esse Franci cognouerunt: composito agmine in hostem mouent, & apud Patayum propter templum quod illic munitissimum erat castra metantur. Stabant in excubijs Belmanorus, Ambrosius Delorus, Hyrus, Potonusq; hostis aduentum explorantes. Quos non longè cum iusto exercitu sequebantur, Aléconius dux, Richemontus Connestabilis Vindocinensis comes; Ioannes Aurelianensis nothus & Ioanna Puella. Angli verò dum viam pergunt: conspectis Francis ad proximum nemus iter conuertunt pugnandi locum sibi idoneum captantes. At qui in excubijs erāt nullo se colligendi spatio hosti dato, prælium commisere; ita ut equitatum omnem Anglorum in fugam coëgerint, pedites quidem

visa equitum fuga in nemus & viculum
 qui iuxta erat dilapsi: nemoris beneficio ut
 quisq; poterat se tuebantur. Interim Alen-
 conij Dux acie instructa aduenit. Tria
 circiter millia hostium in ea pugna cecide-
 re. Captis ex Anglorum nobilitate cum
 Talleboto quamplurimis. Tum in Caroli
 potestatem venit Ienuilla & alia quedam
 per Belsiam loca. Mense Iunio insequentis
 anni qui fuit Christiana gratia quadrin-
 gentesimus vigesimus nonus supra mille:
 Ioanna Puella Carolum conueniens: iam
 inquit Serenissime Rex hoste superior esse
 incipis. Multas urbes atq; arces ex Anglis
 ereptas tibi audientes videmus: nunc tuæ
 consecrationis tempus aduenit: diuina di-
 gnationi placet ad Rhemos proficiscaris,
 ubi more maiorum sacra unctione delibu-
 tus dyadema suscipias. Qua una re vene-
 rabilius Franco populo tuum nomen erit,
 & hosti formidabile. Nihil te perterreat
 quod Campania & reliquæ ferè Belgæ om-
 nes ab hoste tenentur: viam tibi propitia-
 tore Deo parabimus. tantum copias con-

Anglorū
 cades.

Tallebo-
 tus capi-
 tur.

Initium
 consecra-
 tionis Ca-
 roli VII.

trahere, & Dei decretum exequamur. Hæc Ioannæ verba spem omnibus magnam faciebant: propterea quod vitæ puritate puella præ se ferebat sanctitatem: & nihil muliebriter agebat aut loquebatur. Enimvero sacerdotali confessione quaq; ferè hebdomade conscientiam purgabat: & diuinam Eucharistiam desumebat. Igitur collecto apud Gyen non mediocri exercitu. Carolus Remos per Campaniam petere constituit: præmissa cum aliquot præfectis Ioanna puella: qui obstantem fortè hostem impedirent. Proximè Antissiodorum Carolus cum venisset, prodire illi obviam aliquot ciues: sed in ciuitatem non admiserunt. Erat illis Trimolus qui multa apud Regem authoritate habebatur. Hunc ab Antissiodorensibus pecuniam accepisse constans fama fuit: ut illisliceret induciarum beneficio frui. Itaq; ciuitati nihil incommodatum est: cibos exercitui ministrantibus incolis: dum pretium solueretur. Præterita Antissiodoro: Carolus sanctum Florentinum recepit: oppidanis se liberè deditibus. Tre-

cas inde profectus: post sextum diem quam illic desperata deditione sedisset. Laboratū est in exercitu fame: ita ut pleriq³ fabis & triticeis spicis tantum milites vescerentur. Rerum penuria cognita Carolus Primores exercitus ad concionem vocans petit quid ipsi faciendum esse censerent. Nemo omnium fuit qui reducendum exercitum esse non diceret cum neq³ commeatus neque stipendium militi sufficeret. Vnus tamen Robertus Massonus quanquam ab hac sententia non abhorreret, Vellem inquit Ioannam de hac re audire: quæ enim presentis expeditionis auctor fuit: ipsa suis consilijs paratum fortè auxilium feret. Igitur vocata Ioanna rogataq³ sententiam, ad Carolum conuersa: Si ego inquit, quod verum teneo eloquar: an mihi Rex credideris? id cum secundo quæreret. Tibi inquit Rex si quod profuturum sit dicas credam. Trecenses, inquit Puella, tui sunt, & intra proximum biduum se ciuitatemq³ tibi dedent. Credulus fœminæ Rex stare loco copias iubet. At Ioanna confestim equum

inſcendens quemqꝫ militem cogit, ea qua
ad oppugnationem neceſſaria erāt ad mu-
ros importare. Quod animaduertentes
Trecenſes loci antiſtitem cum ciuibus ali-
quot: & militum quibuſdam Prefectis ad
Carolū legāt: ciuitatem dedituros ſi mi-
les Anglus inde abire cum ijs quos captiuos
habebat liberè permittatur. Conditione
accepta: Rex poſtridie Trecas ingreditur.
Egredientes vrbe hoſtes Ioanna captiuos
abducere vetat. Quorum redemptionis
pretium, ne fidei & poſitæ cum hoſte legi de-
traheret Rex exſoluit. Ordinatis apud
Trecas magiſtratibus, Cathalaunos petit,
qui eum communi omnium letitia excipi-
entes miniſtros reipublicæ quos Carolus in-
ſtituit admiferunt. Inde Remos qui An-
glo parebant adoritur quos nulla vi rece-
pit, latius proculdubio ciuibus ſuum Regem
excipere. Eò veniēre Dux Barrenſis & Lo-
tharingiæ: Commerciēſis quoqꝫ Dominus
non paruas copias ducentes, vt Regi inſer-
uirent. Itaqꝫ Carolus & vnctus & coro-
natus eſt à Reginaldo Chartrenſi Remorū

*Antistite, assistente Puella qua militare
 vexillum manu gerebat: nimirum exul-
 tans quod se una hortante Carolus regni
 dyadema & sacram unctionem loco cele-
 bri atq; huiusmodi sacris multos per annos
 ad id muneris designato recepisset. Sacra-
 tione absoluta: relictis Remis Vellium iter
 agens oppido liberè potitus est. Nec Sueßio-
 nes signum ullum rebellionis ostenderunt.
 Simili quoq; modo per Briam nonnulla
 fortia loca fecere deditioem. Priuino op-
 pido cum Carolus ageret: Bethfortus cum
 duodecim armatorum millibus ex Parisijs
 ducens Corbolloium accessit animo (ut ipse
 iactabat) pugna cum Carolo conferendi:
 id ubi Regi cognitum est, Priuino discedēs
 ad castellum cui Mota nomē est exercitum
 duxit, non ob aliam causam quàm ut An-
 glo pugnandi faceret potestatem. At Beth-
 fortomens fuit Parisios repetendi. Consti-
 tuerat Carolus Sequana amne traiecto
 Brayum proficisci promittentibus oppida-
 nis transitum se concessuros. Sed Francis
 Anglisq; concurrentibus eodem tempore ad
 ripam*

ripam ut traicerent: leui commisso pralio Carolus suos transire prohibuit. Exactis post non multis diebus Castrumthiericum profectus: mox per Vallesium Crespeiumq; prateriens: castra in campo iuxta Dammartinum ponit; spe animoq; erectus Parisum recuperandi. Cognito quod ad se Carolus aduentaret Bethfortus ad vicum Mitriacum copias educit: sex à Dāmarto millibus passuum distantem. Vbi loco natura munitissimo militem continet. Premissis aliquot equitibus duce Stephano Hyro qui Anglos adequitarent: ubi rescivit hostem loci munitionibus considerare: Carolus suos ultrà progredi vetat. Bethfortus autem Parisum citissimè reuersus est: miserat per hos dies Carolus ad Compendium Beluacensesq; nonnullos ex suis fidiissimos exploratum quo in se animo incolæ essent: cognoueratq; illos cupere maximè ab Anglorum seruitute liberari: eiq; obtemperare qui verus Rex esset. Proinde Baron Siluanectensis agri vicum ut Compendium peteret profectus: cognoscit Bethfortum

maioribus copijs auctum in se ducere. Patruelis siquidem Henrici Anglorum Regis per superiores dies Romanus Cardinalis à Pontifice Romano legationem ad Anglos receperat pecuniam militemq; cogendi aduersus Bohemos: qui de Christi doctrina & fide non rectè crederent. Qui millibus quatuor armatorum in Galliam traductis secum Bethforto cōiunxerat in Francos arma conuertens quæ in Christianæ religionis hostes simularat accepisse. Igitur ut de Bethforti accessu certior Carolus redderetur: Ambrosium Delorū cum viginti tantum equitibus exploratum quid apud hostem geratur mittit, qui iter ingressus videt procul densissimum puluerem in aërem ferri: nec dubius fuit id progredientis agminis indicium esse: moxq; paulò ultra pergens Anglos manifestè conspicatur: idq; per caduceatorem Carolo festinanter renunciat. Ea recognita Carolus acie ordinata Siluanectum iter facere constituens apud montem Piliolum qui mons contemplationis aliquando dictus est cum venisset: rede-

ante Ambrosio Deloro : accepit Anglos Barronem ducere per riuum qui ex Siluaneſto perfluit : ſed eos magnopere impediri vadi anguſtia per quod vix bini poſſent euadere. In ea traiſciendi difficultateratus Carolus hoſtem intercipi poſſe ; primam aciem incedere iubet. Sed iam magnam ſui exercitus partem Anglus tranſmiſerat : quamobrem Carolus ſuas acies in cōſpectu habuit : moxqꝫ leuibus commiſſis digladiationibus ; cum Sol ſe condere inciperet : Angli ad ripam fluenti caſtra poſuere : agger, vallo, ſudibusque ſe ſe munientes. Habentes præterea à tergo lacum. Rex autem in monte Piliolo ſuos continuit. Poſtridie cum illuxiſſet : Carolus quaterna acie inſtructus in Anglos ducit. Primam Alenconiꝝ Dux & Vindocinenſis comes adminiſtrabant. Secunda præerat Dux Barri. Tertiã ducebat Rayus & Bouſſacus Frãcia Mareſcalli. Quartam quæ ad excuſiones inſtituta erat & cui frequenter locum mutare neceſſe eſſet moderabantur Albrechtus Ioannes Aurelianenſis nothus, Ioanna

Puella & Hyrus. Sagittariorum Balistariorumq; curam gerebant Grauiilla & Iohannes Foucaudus Lemonicensis. Regis custodiam Borboniorum dux Trimolusq; receperāt. Aciebus ad hunc modum instructis, decretum erat Anglos adoriri. Sed cognito quantum illis locus adiumento esset, lenibus aliquot pralijs ante castra utring; commissis, cum neq; conuitijs neq; prouocationibus è castris excitari hostis posset: Francus tandem ad hostium castra proximè profectus: manu tam diu conseruit, donec ad uesperascente & multo puluere cælo caligante fuerit prælio desistere coactus. Mane factò Rex Crespeyum: Bethfortus Parisium petijt. Biduo post recepit Carolus Compendium: ubi præfectum posuit Guillerum Flauium loci indigenam. Eò quoq; Beluacenses conuenere Regis potestati se permittētes. Idem fecere Siluancētes qui misso ad Carolum suo cum aliquot ciuibus Antistite ciuitatem dedere quò rex paulò post seipse contulit. Bethfortus præuidens animo quod benignior fortuna Ca-

roli rebus arrideret: Parisio abire constituens Ludonicum Luxemburgum Morinorum Episcopum quem Francie Cancellarium Anglorum factio appellabat, & Joannem Rachetum equitem Anglum unum cum Symone Morhiero Parisianum prætorem ciuitati administratorem preposuit cum duobus armatorum millibus ad præsidium relictis. Reliquum verò exercitum ad Normānos profectus compluribus sue factionis locis dispartiuit. Igitur cognito Bethforti discessu: Carolus ad sanctū Dionysium ex Siluanectō mouēs oppidum (excipientibus eum ciuibz) ingressus est. Tercio post die Franci Caroli iussu ad vicum cui capelle appellatio est castris constitutis: cum ibi pernoctasset, eruptione in eos à Parisiacis facta crebris prælijs concertarunt: non secus ac si præludia quedam armorū agitarent. Repetentibus tandem ciuitatem Parisianis, Franci Duce Aleconio ad sancti Honorati portam copias promouere: expugnātes confestim propugnaculū quod pro porta extructum erat. Qua spe addu-

*Et a Joanna, ciuitatem quoq³ oppugnare
 prater omnium opinionem constituit. Est
 ab ea parte duplex fossa & inter utramq³
 agger. In priorem neq³ aqua neq³ luto im-
 peditam cum facile Franci descendissent:
 alteram fossam superare labor fuit, pro-
 pterea quod latior & aqua affatim plena
 esset. Importatam undiq³ materiam cum
 Ioanna in fossam opplendam iacit: è muro
 sagitta in crure percutitur, nec eo tardius
 in opere perseuerat: commilitones perseue-
 rare cohortans. Nec potuit inderenuocari
 donec Alenconius negociosam mulierem
 per se reduxit. Signo receptui dato Franci
 ad sanctum Dyonisium iter conuerterunt.
 Et paulò postidem Gaguinus ait. His die-
 bus Puella cum Latiniacum accessisset, co-
 gnito quod quadringenti ex Anglorum co-
 pīs non procul à Latiniaco in Franciam
 contenderent: assumpto Foucaudo & Ioan-
 ne de sancto Albino & alijs ex Latiniaci
 presidio hostem adoritur, omnes ad unum
 necans. Sed non multis post diebus dissimi-
 lis apud Compendium fortuna illi fuit.*

Nam Anglis Burgundionibusq; in Compendij obsidione sedentibus: Ioanna subsidium obsessis ferens: cum oppidum ingressa esset: & paulò post eruptione in hostem facta res non prosperè sibi succederet: dum oppidum repetit & militum pressura adiutum precluderet, capitur à Ioanne Luxemburgo qui eam Anglis venundedit: à quibus hostiliter habita Rothomagi cremata est odio videlicet nominis Franci: & quod virili veste fœmina usa esset. Prius tamen quam sententiam diceret hostis: frequenti foro & crebris consultationibus Puellam tentat: de fide atq; religione Christi multa scrutatus. Arbitrabatur enim mulierem magia aliqua edoctam à Carolo Rege assumptam esse: & propterea à Catholica veritate aberrasse: indignumq; esse cui regnū deberetur. Sed supra fœmina vires fuit: pluribus cum hoste (ut est nonnullorum mos) per assentationem sentientibus prauallere: quanquam se & quaq; gessisset Apostolica sedis examini permitteret. Hactenus Gaguinus.

*mala apud
Compen-
dium*

xii.

Cui ac superioribus non ab similibus Ioannes Laziardus Cælestinus in cap. 274. epitomatum historiæ vniuersalis. *Carolus* (inquit) *huius nominis septimus post Carolum sextum regno Francorum successit: quo in tempore tantis calamitatibus Franci vexabantur, ut his attritus populus & obstupescens quorum partes sequi deberet, ignoraret. Itaq; Regi Carolo Bituriges tantum parebant ceteris Francis: modo ad Anglos, modo ad Burgundiones spectantibus. Eo enim tempore Henricus Henrici filius regnum Franciæ occupabat: quod diceret ex pacto illud sibi deberi. Carolus vero compassus suum armis defendere semper animo agitabat. Vnde & Franci milites in armis parati aduersus Anglos repentina prælia committebāt. Varijs igitur prælijs commissis, modo Angli, modo Franci superantur. Verum feliciter gestis aduersus Anglos multis bellis etiā & Frācis auxiliores Scetorum quinque millia aduenerunt, quos per benignè & beneuolæ affectu Rex suscepit. Eisdem temporibus*
Angli

Angli multas vrbes receperunt atq; non sine multo Francorum damno, adeò ut vno praelio apud Vernolium commisso Bethfortus Anglorum dux quinque millia Francorum occiderit, captusq; est Alenconius Dux cum alijs pluribus Francia nobilitatis Proceribus. Hac victoria lati Angli multa alia oppida receperunt. Tum Aurelianos obsidens Tallebotus cum Salseberrienſi comite quatuor per gyrum munitiones extruxit, quibus in urbem quicquam inferri vetabat. Aurelianenſes verò ſemper erectiore animo ſe ſuaq; acerrimè tuebantur. Aderat etiã & illis ſubſidio quàm maximè poterat Carolus Rex. Multa tamen diuturna q; obſidione preſſi conſilium capiunt de deditiōe faciēda, eo pacto ut vrbs Burgundo Duci permitteretur. Legatos itaq; ad Burgundum mittentes eum de eare certiorē reddunt, quibus reſpondit Burgundus ſe perquam libenter urbem recepturum, ſi Bethfortus aſſentiat. Itaq; Bethfortum legati adēunt quibus reſpondit Aurelianenſes in gratiam non receptis.

rum, quoad omnem belli impensam persol-
uissent, suaq; voluntati eos subdidisset. Eo-
dem tempore Ioanna, cui Puella ob integri-
tatem corporis cognomento fuit, annos vi-
ginti nata ad Carolum Regem veniens il-
lum breui in regnum se restitutam polli-
cita est. Erat enim hac Virgo excelsi animi,
nihil muliebriter agens, sacerdotali confes-
sione, quaq; ferè hebdomada conscientiam
purgans, diuinamq; Eucharistiam deuotè
sumens. Huic itaq; postquam à Rege hostes
expugnandi negotium datum est, tanta vi
Anglos expugnauit ut non modò Aureli-
anos ab obsidione remouerit, sed & omnes
à regno Francie deturbauit, multis occisis,
multisq; viuis in prædā captis. Huius præ-
clara gesta satis ab Historicis Francis de-
scripta sunt. Hæc autem post multas An-
glorum cedes tandem apud Compendium
dum suis opem ferre studeret, à Ioanne Lu-
xemburgo capitur, qui eam Anglis vānun-
dedit. A quibus hostiliter habita apud Ro-
thomagum cremata est, quod dicerent eam
virili habitu indutam, ac pro Francis de-

Ioanna
facta præ-
clara.

Ioanna
dolosè
capitur.

certasse, nullam mortis causam in ea inuenientes. Erubescant igitur Angli se à scæmina & quidem Catholica regno pulsos, nec deinceps apud exteras gentes suum robur iactent, sed per abrupta fugientes posteris enarrent, Puellam nomine Ioannam non quidem vi armorum sed proditione deceptam morte mulctasse. Ab hoc igitur tempore Angli animo tabescentes mala fortuna semper vsi sunt. Nam dum Compendium obsiderent, dum se à Francis mactari conspiciunt castra deserentes in sua ut quisq; poterat fugiebat. Atq; eo pacto arces & oppida à Francis recepta sunt: multaq; millia Burgundionum & Anglorum occisa.

Iam nostra ætate clarissimum Theologiae atque historiae lumen Gilbertus Genebrardus Parisiensis Theologus diuinarum & Hebraicarum literarum Professor Regius & postmodum Aquensis Archiepiscopus lib. 4. Chronographiae Puellam hanc nostram his verbis posteritati commendat. *Ioanna Darcia Puella siue Vir-*

XIII.

go in Lotharingorum Dampremo pago orta, anno ætatis circiter 20. Aureliam urbem obsidione Anglorum qui Lutetiã magnamq; Gallia partem possidebant, liberat anno 1429. eius auspicijs multa prælia fœliciter à Francis gesta sunt. Trecas, Lutetiamq; cepit, inter primos milites muros ascendens, ab Anglist tandem capta Rothomagi ut maga combusta est. Aurelianienses accepti beneficij & tantæ fortitudinis memores, edito in loco ad pontem quem Ligeris subterlabitur, statuam Puellæ locauere, quam anniuersarijs laudibus, singulari pietate concelebrant. Pius 2. Pontifex Max. & Antoninus Florentinus Antistes, Puellæ supra sexum virtutem admirantur. Sedatis tandem Francicis rebus, iudicio quo damnata fuerat nullius patrocinio defensa & hoste iudice retractato, omnium sententia famæ restituitur Ioanna Darcia anno 1456. die 7. Iulij.

XIV.

Genebrardo scientia, fide, & auctoritate coniunctissimus Hubertus, Morus Parisiensis Theologus, Rhemensis Ec-

clesiastes ac S. Deodati in Lotharingia canonicus & Decanus, libro de sacris vñtionibus tertio sub finem. *Nec certè hic lubens omiserim, inquit, quod bellicosa illa Virago, quam Ioannam Puellam nostri nominant, ad regnum non tam conseruandum, quàm restituendum legitimo heredi Carolo septimo diuinitus excitata, vel, vt verbis Meyeri Flandri scriptoris utar, nō ascita, non creata, non electa, sed à Deo data, vt vitæ sanctitas, animi generositas, & in bello fœlicitas vel inuidos fateri cogunt, nunquam eum, nisi post consecrationem, Regem, sed tantum Delphinum, sicut ab aliquot seculis solemus Regiū nostrorum primogenitos, vocare audita est; quodque nunquam cessarit, donec illum quamprimum Rhemos vngendum etiam contra multorum opinionem deduceret, se vt id faceret, cœlitus admonitam asserēs. Haud dubiè omnipotens Deus mirabilia operatur, ubi, quando, & quomodo vult: & qui quondam in manu castissimæ viduæ superbum hostem populi sui strauit Holo-*

phernem, non est absurdum, nec maiestate, nec misericordia illius indignum, si manu quoq; Puella innocentis Regi Francorum, fidelissimo cultori suo regnum ut legitime debitum vindicare dignatus est. Et omnes annales Anglis ferè semper aduersa, Francis verò prospera ab eo tempore quo Rex sacrosanctam suscepit unctionem contigisse testantur: adeo ut illi intra paucos annos, sicut illa initio prædixerat, toto Gallia regno, cedere coacti sint.

xv.

Denique Ioannes Mariana Hispanus extremo libro vigesimo: de rebus Hispaniæ de re nostra hæc habet. *Septimum, mensem Aurelia obsidebatur ad Ligerim, nobilissima ciuitas, obsessi rerum omnium inopia laborabant, ac vix mœnibus hostilem vim propulsabant: Ioanna puella annorum octodecim aut circiter, rebus saluti fuit. Remigij nata qui pagus in agro Tullensi apud Leucos est, patre Iacobo Darcio, matre Isabella, atq; à prima etate paternas oues pascere solita veniens in castra Gallica diuino se monitu missam ait ad*

*Aureliam periculo, Galliam liberandam
Anglico imperio. Varijs & multis interro-
gationibus versata, ubi fides abs Rege &
Proceribus est habita, per hostium muni-
tiones impetu facto, auxilia & cōmeatum
in urbem infert, civibus cum spe defensio-
nis crevit animus, crebrisq; ex urbe irru-
ptionibus obsidio dissipata est ad sextum
Kalend. Junias, circumiecta oppida rece-
pta: levia tantummodò praelia facta, neq;
uniuersi certaminis fortuna tentata, dum
vincendi consuetudine Gallorum vires &
animi confirmarentur. Rex Gallus per me-
dios hostes, Remos (quod factum non erat)
ad sacrum chrisma regniq; insigne suscipi-
endum abiit. Author consilij Puella. Sic au-
gustior suis, hosti formidolosior est factus.
Multis receptis urbibus, Lutetia tentata
capi non potuit; quin ad D. Honorati por-
tam puella vulnus inflictum est. Belli im-
petus versus aliò. Compendium obsideba-
tur ab Anglis, Puella successu fidetior ani-
mo, suorum cuneo facto in urbem irrum-
pit, sed fortuna tandem in medio cursu de-*

serente, eruptione facta in potestatem hostium redacta Rhotomagi magica superstitionis rea causa dicta igne combusta est. Petrus Cauchonnius Bellouacorum Pontifex præcipuus concitator, nemine pro captiua contra hiscere auso, tametsi plerisque persuasum erat, Virginem eam iniuria fuisse damnatam. Aeternum Gallie decus, omnibus sæculis nobile, uti dati in causa iudices à Calixto Romano Pontifice pronunciarunt, quæ acta in scrinio summi Templi Lutetie cum fide seruantur. Ærea virginis statua, armati militis habitu in medio Aurelie ponte cernitur, accepti beneficii monumentum.

Jurifcon-
sulti.

Theologiæ consultissimos viros, excipient magni nominis & authoritatis Iurifconsulti.

1. Guido Papæus oculatus testis & Præses Senatus Gratianopolitani in 84. quæst. suarum decisionum asserit, *Eo anno quo Doctoratus gradum consecutus est, se vidisse Puellam Ioannam nuncupatam quæ inspiratione diuina, arma assumens bellica*
anno

anno Domini 1429. restauravit regnum Franciæ, Anglicos à regno expellendo, vi armata & prefatum Carolum ad regnum suum Franciæ restituendo: quæ puella regnavit tribus vel quatuor annis.

II.

Boërius Senatus Burdegalensis Præses in §. 7. sui tractatus de seditiosis num. 59. & in §. 7. de consuetudine feudi ait, *Predictam Puellam tempore Caroli septimi Regis Francorū purgasse Franciam Anglis.*

Guillelmus Bened. Senatus Tolosani Consiliarius in repetitione capit. Raynut. in verbo duas habens filias, & in verbo, mortuo itaque testatore, i. de Testam. refert & probat ea quæ à Gaguino de iam laudata sæpius Puella describuntur, suntque à nobis ante in medium producta.

III.

Andreas Tiraquellus Senator Regius Parisiensis & bis quindecim librorum & liberum parens (vt de eo quidam Poëta ait) *Ioannam omnibus seculis admirandā* scribit in lege 3. libri legum cōnubialium num. 64.

IV.

Vincentius Sigault in suo tractatu de

V.

factis Principum, inquit: *Quid de Virgine vocata La Pucelle Ieanne diuinitus transmissa dicemus? Diuina fuerunt eius exercitia, & voluit ipse Deus vincere Anglicos per scæmellam cum de scæmella ageretur: quò pertinet quod legitur in primo rotulo Laudayani anonymi Clerici de Sibylla Francica, Nobile regnum Francie ruinam passum est ex superfluitate vite & abundantia panis propter vnius mulieris speciem. Ut autẽ ordo reparationis ex merito respondeat prauaricationi ex delicto, per personam sexu fragilem, vita autem humilem & Deo deuotam, expedit reparari per Virginem quod desertum fuerat per mulierem.*

Taceo Bartholomæum Chassaneum in secunda parte Catalogi gloriæ mundi considerat. 8. Carolum de Grassalio lib. 1. regalium Gallia cap. 17. Neuizanũ Astiensem Iureconsultum lib. 4. Syluæ nupt. Franciscum Polletum Duacensem Iureconsultum lib. 2. historiæ fori, & Petrum Gregorium cap. 24. lib. 34. Syntagmatis

iuris vniuersi, & in cap. vndecimo lib. 7. de Repub. prædictam puellam non mediocriter commendantes: vt ad Stephanum Forcatulum in alma Vniuersitate Tolosana I. V. Professore ordinarium liberius accedam; quem nemo erit, opinor, tam auersus à re Gallica, aut ab eius reparatrice Ioanna, dum aliquantò sit eruditior aure, atque ingenio, quin suauissimè loquentem libentissimè ac iucundissimè audiat. Is verò in lib. 7. de Gallorum imperio & philosophia Lotharenam virginem tot iam scriptorum ac gētium nobilitatam literis atque linguis hoc encomio exornat. *Supereſt fœminei decoris propugnatrix Iana Gallica, vel Anglorū annalibus mirum in modum, ſed non pro meritis laudata, & quam Martem muliebrem dicere iure poſſimus, atq; rebus magnificè geſtis præferre Teſſilla, quæ Argiuorum à Cleomene Laconum Rege afflictorum muros tutata eſt, ſui ſexus freta præſidio, præſenti animo, hoſtium impreſſionē ſuſtinens, nec bellicis exterrita clamoribus.*

VI.

Pausanias in Corinthiacis. Atqui Iana nō modò murorum secura, ambitu Anglōs profligavit, quoad vixit: sed patenti planitie crebrius: tunc maximè subueniens, cum deplorata viderentur res Francorum, interim Anglicæ fortune planè cedentes, postquam ad ipsius curam Caroli septimi Regis boni magis quàm felicitis spectare tutio inceperat. Namq; Henricus V. Anglus, Gallicos agros, viros, & oppida latè possidebat: eòq; angustiarum Carolum perduxerat, ut inter iocos Biturigum Regem ipsum appellitare non erubesceret: quia Gallus tantisper fortune impetum deferuere sperans, Bituriges tanquam arcem tutissimam elegerat: ob unam causam bello petitus, quod Northmaniam & Aquitaniam cum Andibus concedere recusasset Anglo, qui legatos Clarigatum miserat, olim inclyto Carolo VI. patriæ & Septimi huius parenti amabili; Et paulò postidem Forcatulus ait: Nihil verò, si singula percurras, tam firmavit vacillantē Galliam, quàm aduentus Iana Puella fatidica, anno

salutis 1428. ex Lotharingia Gallia suburbana oriunda, velex Vaucolore Barrensis ditionis, nisi cœlestem ciuem malis coniungere: quippe cum supra humanam virtutem, nedum supra sexum, sese bellicis factis dictisq; sapientissimis extulerit. Putasses Spartanam nurum disciplina virili imbutam, aut Camillam alteram Metabi Regis pulsiregno Priuernate filiam in dumis & ferarum lustris nutritam, quia pater in fuga, Dianæ ipsam vouisset.

Vtq; pedum primis infans vestigia plātis
Institerat, iaculo palmas oneravit acuto,
Spiculáq; ex humero parua suspendit, &
arcum:

Pro palla & crinali auro cincta Tigridis
exunijs incescit, ut ait Virgilius lib. II. Æ-
neid. & ibi quo modo ab Arunte vate sit
occisa: frustra petita nuptijs iuuenum exi-
miorum, & virginittatis non minus anxia
custos, quàm fertur Diana extitisse, aut
Iana hæc Gallica, non secus ac Camilla exi-
tum tetrum habitura post assertam iam
Gallia libertatem. Nam & Nigidius per-

quā doctus author Dianam ipsam Ianam
prius fuisse appellatam prodidit, D litera
mox causa decoris addita, ut in verbis re-
deo, redhibeo. Macrob. lib. 1. Saturnal.
cap. 9. Proinde Iana bono Francorum à
Deo edita nihil prius habuit, quàm Caro-
lum Regem adire, mirantem Parisienses,
aliosq; nobiles ciues Anglorum imperium
ferre didicisse, qui antea ne mores quidem
ferre poterant. Cumq; impune paruo comi-
tatu, etiam per hostiles terras, ad Regem
peruenisset, annos nata circiter viginti, fa-
cie non inuenusta, vigore oculorum animi-
que pari, ipsum inter aulicos amictu pre-
tiosiore fulgentes, & dissimulata maiesta-
te, ac ferè cum regni statu mæsto, cognouit,
salutavit venerabunda, & colloquium sa-
lutare petijt: aliter atq; Sysigambis Darij
Persarum Regis mater & captiua, qua pri-
mo congressu Hephæstionē Alexandri Ma-
gni amicum intimū pro Rege supplex adi-
uit, excusante Alexandro comiter impru-
dentis factum, ideò quod Hephæstion alter
Alexander esset. Diod. Sic. lib. de gest. Alex.

At quia sana deligens in cœtu Procerum Regem minimè errasset, id in religionem versum est presentibus, factumq; lubētius ut Puella remotis arbitris in Regis colloquium veniret, admoneretq; futurorum, ac prædiceret se adiutrice fore ut Angli à Francia abigerentur, quæ victoribus passim arma magis quàm animos cesserat. Planè bello conficiēdo non cristis ornatam galeam efflagitavit, nec aureum gladium qualem sibi porrigi ab Ieremia Propheta in somnis vidit Judas ille Israëlitis restitutor, 2. Mach. 15. cap. sed neglectum & iam rubigine obductum, latentemq; inter scuta quadam & tela vilissima in fano Divæ Catharinæ agri Turonici, nullaq; in re amabilem nisi quod flosculis lilij insculptis perplacebat. Quæ res facit ne putem fuisse illum Iulij Cæsaris gladium, quem sibi ab hoste ablatum in Aruernorum templo suspensum cum aspexisset victor, non est tamen passus amoveri. Solebant namq; victoria potiti eorū quos domuerant, adempta arma templis dedicare. Inde Camilla

Aruntem sacerdotem apud Virgilium in pugnam pronocat, quia auro armatus splenderet:

sive ut templis præfigeret arma

Troia, captiuo sive ut se ferret in auro:

Longè secus tamen accidit Arunte acrius bellante,

Hasta sub exertâ donec perlat a papillam

Hæsit virgineūq, altè bibit acta cruorem.

Et ensis Goliath à Dauide superati templo affixus postmodum vsui fuit ipsi victori inermi, ut pote à Sacerdote Achimelech indicatus 1. Reg. cap. 21. Prætereo gladium

Iulij Caesaris in delubro Martis asseruatum donec Galba detractū sibi sumpserit. Sueton. in Galba cap. 8. Nec verisimile est de-

fuisse armis consecratis titulum superbum, rem gestam explicantem cum quandoque

eorum qui vicerant, tela templis addicerentur ut hasta Meleagri qua aprum Ca-

lidonium confecerat, templo Apollinis ut in Corinthiacis scripsit Pausanias. Speci-

mē verò suarum virium & virtutis præ-

buit Jana cum ausa est Aurelianum oppi-
dum

*dum longa obsidionis tadio pressum cōmea-
tu importato iuuare, Anglis prospectanti-
bus & muliebri terrore percitis, ac demi-
rantibus in muliere virilem audaciam,
fœlicitati cōiunctam maximè traiecto flu-
mine cum lectissimis auxilium, quibus
nota vada vel utribus tenui tabulato sub-
iectis, vel patrio nādi usu, se, arma, equos-
que regentium, valde interim obstupefa-
ctis hostibus & nihil inuictum fore duce fœ-
mina suspicantibus si ad manus venire-
tur: Iana verò exigua linterni credita, nisi
armis nitentibus emicuiisset, nantibus præ-
currens alacriter videri poterat; Nec igno-
ta est equestris statua, qua Romani Clæ-
liam virginem donauerunt: quia à Porse-
na Rege Romam obsidente in pacis condi-
tionibus inter obsides accepta, cum castra
illius fortè haud procul à ripa Tyberis lo-
cata essent, dux agminis virginum inter
tela hostium flumē tranauit sospitesq; om-
nes propinquis restituit: atq; ita ex publica
perfidia laudem comparauit, Porsena me-
rito reddita, & in honore habita, ac redire*

domum impunè iussa cum quibus vellet comitibus. Caterùm Iana fallere nescia; pugnare gnara, inter primos gladium sacrum in Anglos vibrabat, & gladio quovis præstantiorem animum: tantisper duce Talboto suos inflammante Gallie fruendæ emolumento, hortante etiam ne mirarentur uni mulierculæ spiritum adesse virilem, cum Galli viri, uti dicebat, se fœminis inferiores præbuisſent. Nihil tamen profecit, quominus Angli dimisso Aureliano castra aliorſum transferrent, civibus Peana Deo canentibus, & Ianam uno ore laudantibus: quam sagitta in crure dextro sauciam vehemēter lugebant. Leve autem fuisse vulnuſculum conijcio, aut repentè sanatum, siquidem paulò poſt Jana prælijs interſuerit, dum urbes Anglis extorquerentur. Nam ad Patayum confligit cum Potone, Loreo & Bemontio cōtra sex Anglorum millia Talboto Duce superbo: ubi pugna maxima ac multiplex legionarijs militibus sagittarijs, equitibus, ancipiti euentu diu dimicantibus, tam auide, ut

*pereundo recreari videretur: nec prius desitum est, quàm Talbotum capi accidit, quem facta cum Potone permutatione Angli recuperarunt. Deferuescebat Talboti iam multis annis inueterata fiducia: præsertim quod ipse iactabundus aliquândo dixerat Henrico Regi, tunc Franciam ab imperio Anglorum ereptum iri, cum Carolus Rex coruum album vidisset. Contigerat autem pueros quosdam lusitantes in vestibulo regiae coruum creta illitum tractare, prospero sanè augurio & spectantibus iu-
cundissimo, præterquam Talboto capto, nec dum in sua præsidia reuerso, & Anglorum fortunam senescere indolente. At è diuerso Franci solito letiores genio sine lasciuia indulgebant, sese accingentes solemnibus Regis Caroli Rhemos cogitantis, ut cælesti oleo more maiorum atq; gaudio perfunderetur: idq; Iana sollicitante & numinis consensionem allegante, non paucis aulicis refragantibus, quibus periculosum putabatur Rhemis Regem credere, adeò circumiecta oppida Anglorum fidei obnoxia*

armis perstrepebant. Porrexere tandem manus sententiae puella Alenconius, Borbonius & Vandomensis Duces: nec pœnituit quippe cum ex animi sententia Rex corona festivum caput cinxerit: milites donatio, populum congiario honoraverit. Quasi triumphans in arcem à templo perductus. Acclamatum est illi. CAROLO REGI FRANCORVM ÆTERNA SALVS. Christus seruet fortem, iustum, bonum Principem, auspiciatissimum regni sui restitutorem, hostium expulsores inuictum, stipatum fidelissimorum clientum numero, maiore virtutum. Verùm quia magnanimitas in otio ringitur plus quàm in negotio, illicò consecrato Rege redintegratum est belligerandi desiderium à Iana subtristi, quodensem, quem tātò operè amabat, fregisset quando paulò violentius, terrendi tantum gratia, quasdam impudicas fœminas quateret, quas procul à castris esse antea edixerat: per experimenta cognoscens, parum armis profici cum Deus victoriarum dispēsator spurcissimè offen-

datur. Cum autem Iana pristinum retinens animum Compendium inisset adiutū ciues longa obsidione molestatos, & penè extrema patientes, dum non potest in arcto contineri, dum audet erumpere, dum ceteris latius equo puncto alam suorū prægreditur, in potestatem cohortis Burgundæ venit, traducta in Anglorum manus, & magna vi auri pensata. Diu deliberatum est Rhotomagi à Primoribus utrum servaretur incolumis. Talboto dicente, si quidem scēminam violassent, invidiosam fore vindictam, non minus quàm fugam olim eorum quibus terrori fuisset. Reclamatum est illi à militibus, Veneficam & præstigijs magicis imbutam Ianam asserētibus: quorum importuno convicio paritum est, puella flammis exusta ut tãquam aurum excoctum splendidiorem animam redderet Deo. Causabantur quidam Ianam, cum sciret Anglos eò vini avidiores, quò magis deficiuntur, captivos quosdam qui nouerant vini copiam Aurelianum aduentare in liberiore custodia habuisse de

industria, ut fugerent, & suos certiores
vini instantis facerent: mox nocte concu-
bia curasse ut carris vinum importaretur
mixto papauere: quod aurigis fugientibus
per Anglos interceptum, somnum profun-
dum illis conciliabat, & somni cognatam
mortem, Francis ex improviso contra so-
pitos per tentoria irruentibus, & pecudum
instar iugulantibus. Idnum Iana bono do-
lo euenerit, an magis hostium malignitate
exprobratum, nolim affirmare. Tantum
habeo admonere morientem illam tãquam
ex testamento Francis reliquisse mœrorem,
& prosperitatem eandem, quam viuens
ijsdem ubiq; attulerat. Nũquam enim de-
sistere pessum ire Anglorũ conatus, & spon-
te sua festinabat ad Francos victoria, rota
exẽplo in præceps labentis. Et fuit gaudiũ
breue ac volucre Henrico Anglo Caroli
Franci ex sorore nepoti, qui Lutetia diade-
mate insignitus, nondum pubes, simulato
cuium studio & clara celebritate, sexto
post anno sensit incenia Parisiorum occu-
passe, non pectora deuota Carolo, quem se-

ria hilaritate receptum tantò ardentius coluerunt, quantò diutius optauerāt. Variè postmodum luctatum est inter Francos Angloſq;. Sed hi adacti ad petendas inducias ſeſquiannales impetrauerunt magis quàm obſervarunt: Et quamvis Græci inducias ^{ἐκχωρησίαν} vocauerint, id eſt, manuum temperationem, quia eo tempore, licet pax non ſit, à pugna tamen abſtineatur: certè Angli ex oppidis Gallie quibus potiebantur, clandestinis incuſſionibus erumpebāt, & predaſ agebant opimas plerunq; noctu aut interdium laruati & terrifici. Hæc Forcatulus.

De Medicorum autem familia Symphorianus Champerius in Francorum Regum genealogia, & in tractatu tertio trophæi Gallorū, & in parallelia Heroum Gallie ita ſcribit: *Afflictis Caroli ſeptimi rebus, ex oppido Valcolore puella circiter annorum viginti cœleſti voce monita, Regem adiit, armisq; virilibus inſtructa, militis obiuit munus. Eius auſpicijs & ductu, Aurelianenſis vrbs ab Anglorum obſidio-*

Medici.
I.

ne eximitur, & aliquibus in locis prosperè pugnatum est. In Gallia quoque Belgica receptæ pleraque ciuitates, & in ijs præcipua Rhemensis, ubi Carolus more maiorum tinctus oleo sacro, regium capitis decus accepit. Interim Puella dum Gallis obsessis apud Compendium subsidio venisset, eruptioneque facta in oppidum se reciperet, insidijs excepta venit in hostium potestatem, quam Ioannes Luxemburgus, Anglis ut ancillam vendidit. Illi Rothomagum deductam ultimo supplicio afficiunt: adiecta causa quod mulier oblita sui sexus, habitum viri sumpsisset.

11. Nicolaus Vignerius Medicus & Historicus regius in tertio tomo bibliothecæ historialis, multis nominibus nostratem puellam, nempe ob virginitatē, strenuitatem, in bello felicitatem, & vitæ probitatem cōmendat, suspicit, & admiratur.

Historici.

I.

Iam ex Historicorum ordine Paulus Æmilius Veronensis, vir sapientiæ & eloquentiæ laude præstans, lib. 10. de rebus gestis Francorum in vita Caroli VII. rem nostram

nostram sic literis comprehendit. *Ioanna Lotharinga Puella duodeviginti circiter annos nata, sub patre oves pascere solita, ad Regem ducitur, prædicans se mente diuinitus admonitam venire, profiteriq; se Anglos Francia exacturam. Mirabundo Rege, multiplici percontatione procerum, versata, semper sibi constitit, nullumq; ei verbum nisi pudicum sanctumq; excidit. Consilio Ducum sanctorumq; non aspernanda res visa; militari ergo habitu, accepto ab Rege exercitu, ducibusq; traiecto flumine, obsessis per intermissas hostium munitiones septimum iam mensem clausis auxilia commeatusq; intulit, crebrisq; eruptionibus obsidionem soluit; circumferendoq; bello, varijs Ducū conatibus circumiecta oppida quæ hostis occuparat, recepit, leuibus prælijs, quæ tamen in summā vniuersæ rei spem proficerent, Anglo fatigato. Ad tria hostium millia in Belsia caesa, anno eius seculi undetricesimo: Nec fortuna se offerenti defuit Francus Rex; utq; augustior suis, hosti formidolosior foret,*

*authore ac duce Puella Rhemos ad sacrũ
 chrisma, regniq; insignia suscipienda pro-
 fectus, &c. Et paulò post. Longè aliã for-
 tunam nacta est Ioanna quàm qua Aure-
 lianum seruarat. In oppidum quidem ir-
 rupit, sed eruptione facta postea, in pote-
 statem hostium venit. Rothomagum du-
 cta, ab Anglis superstitionis falsæq; religio-
 nis infimulata, igne cremata est, hoste iu-
 dice, nemine eo loco pro captiua contra his-
 cere auso. Aurelianenses Puella statuam
 posuere. Eam summis laudibus efferunt &
 admirantur Pius Pontifex maximus, &
 Antoninus Florentinus Pontifex.*

II.

Baptista Fulgosius Dux Genuensis lib.
 3. dictorum factorumq; memorabilium
 cap. II. de fortitudine nostræ Deboræ me-
 ritam hanc laudem aspergit. *Ioanna non
 tutata est solum Galliam, verum etiam
 ex Britannorum manibus recepit, diu an-
 te à Britannis oppressam. Regnante enim
 Carolo VII. cum Parisiorum urbem ma-
 gnâq; Gallici regni partem Britani pos-
 siderent: Ioanna Iacobo Darco patre orta,*

in Lotharingorū pago, qui Dampremum dicitur, cum nondum 15 annum superasset, propter admirandas visiones fatidica putabatur. A Carolo igitur Lotharingorum Principe, ad Robertum Baudricur- tum in Vallicolore militarem Gallorum Ducem, & ab ipso ad Carolum septimum Regem in Gallia designatum missa fuit. Huic cum largè victoriam polliceretur, non ante fides habita fuit, quàm experien- do in multis quæ futura prædicabat, verax inuenta est. Ita fidem indepta, delatam tandem Gallici exercitus summam atque imperium suscepit. Armata igitur atq; ingenti equo insidens cum voce gestusq; a vero militari duce non abesset, ingenti ani- mo Aurelianorum urbem arcta obsidione ab eis oppressam liberavit, ubi pugnando vulnus in humero accepit, nec verò armorum fragor, effususq; in prælio sanguis, & sæva mortis genera, quibus cadere in prælio pugnantes intuebatur, virginis animū terruerunt, sed ceu efferata anima, & Ducis & militis munia implevit; inde exerci-

tu ad Treas perducto, urbem eam contra omnium sententiam adorta cepit. Carolūq; septimum qui designatus Rex erat, diademate ut moris erat Rhemis insigniri ut regem iussit, salutisq; anno quadringentesimo vigesimo nono supra mille, cū Parisiorum urbem oppugnaret inter primos milites in muros ascendit, neq; quanquam crure sagitta traiecto ab incepto destitit, tantumq; formidinis de se Britannorum animis iiecit, ut quemadmodū ante Britannorum Galli conspectum non sustinebāt, ita postea Pulicellam Britanni ferre non possent.

III.

Laonicus Chalcondylas Atheniensis lib. 2. de rebus Turcicis in Ioannæ tempora laudemque delapsus, *Erat (inquit) forma haud illiberali, quæ dicebat sibi cum Deo esse colloquium: hac regebat Gallos, qui ipsam sequebantur, mulier autem cum foret militiæ Dux, indicabat numinis auspicio, se scire, Britannos cum exercitu accedere. Commissa tandem pugna, cum victoriam Angli non essent adepti, in castra se receperunt, postero die freti virtute*

mulieris, quæ exercitum dūctabat, prælii potestatem faciunt. Eo in prælio hostes fugarunt fugientesq; persecuti sunt. Et Galli cum recepissent animos, iamq; fortitudinis collegissent famam, fortiter cōtra Britannos dimicantes, vrbes suas recuperarunt, regnumq; tutati sunt: quamuis plurimi & maximi exercitus è Britannia in Galliam transfirent, tamen Galli semper victoriam pugnantes inuenere, hostes fugere coegerunt Caledam, tandemq; penitus eos è Gallia pepulerunt.

Marcus Antonius Coccius Sabellicus in tertio libro X. Enneadis ait. *In hæc tempora incidisse crediderim Ioannæ Gallicæ virginis facinus illud omni æuo memorabile, quum Gallorum opes Anglicis bellis fracta iacerent. Puella cœlesti voce monita (ut creditur) virili habitu armisq; instructa dūctare cœpit exercitum, dein cum hostibus sæpius congressa inter primos dimicans, multo maximam Francorum regni partem ex Anglis recepit.*

Bonfinius lib. 8. decadis 3. *Ioanna Gal-*

IV.

v.

*lica Puella dum oues pascit, tempestate co-
acta in proximum sacellum confugit : ibi
obdormiens liberandæ Galliaë mandatum
diuinitus accepit.*

VI. Paulus Constantinus Phrigio in chro-
nico regum regnorumq; omniū. *Tem-
poribus istis ex oppido Valcolore, puella an-
norum circiter viginti, Joanna nomine
armis instructa, militis subibat munus, cu-
ius auspicijs multis in locis prosperè pugna-
tum est, Remisq; recepta, Aurelia obsidio-
ne liberata, Carolus Remis unctus est &
coronatus, Ioanna capta & Rothomagi
cremata.*

VII. Henricus Pantaleon Physicus Basili-
ensis, S. Lateranensis Palatij atque Cæsa-
rei consistorij Comes, libro 5. diarij Histo-
rici scribit, *Ioannam puellam Lotharin-
gam Aurelianenses sexto mense obsessos li-
berauisse, & hostes profligasse.*

YIII. Pontus Heuterus Delfius Præpositus
Arnhemensis, libro 4. rerum Burgundi-
carum in vita Philippi Boni historiam
puellæ sic bellissimè describit. *Huc usq;*

Anglis fortuna, contra Francos favere, hic insignium victoriarum triumphorumque finem facere, ac quas immenso sanguine urbes acquisierant, veteribus tradere possessoribus, Francorumque populum externo pressum iugo respirare, resumptoque iam tandem animo, Anglicum excutere imperium voluit, non ductu nec auspicijs alterius Caesaris, Alexãdri, Pompeij, aut Caroli, non prudentia tot Principum primæ nobilitatis, non fortium Præfectorum bellandi peritia clarorum opera, sed quod omnium veterum memorabilia superat exempla ac facinora, ductu ignotæ, ignobilis ac rusticæ puellæ octodecim annorum, quæ ad hoc usque tempus in patria sua Lotharingia, vaccas, boves, ac oves pascere erat solita, nullo quã Ioannæ nota nomine, quæ à Deo se Regi in auxilium missam dicens, in eius consilijque sui conspectum admissa, tam præsentis animo, ac prudenter causam aduentus sui exposuit, ut statim sexcētis præficeretur equitibus; quodque nullus Regiorum Præfectorum hætenus potuerat, inuitis Anglis, dictis

cum equitibus Aureliam intrat, com meatuq₃ ciues ad extremam inopiam redactos iuuat, erumpensq₃ cum presidarijs, ac instar viri armata equo insidens, inter primos pugnam ciet, tria castella opportunis locis ab Anglis erecta expugnat, omnibusq₃ qui intus erant iugulatis, tandem relinquere obsidionem cogit, qua victoria fidem penes Regem nacta, eundem in Rhemos ducit, sacro ibi oleo veterum Francorum more hoc anno inungi facit, multaq₃ alia oppida munitaq₃ loca, eius ductu Rex Carolus recuperat, cogiturq₃ puella huius timore Bethfordius legatos in Flandriam ad Philippum Bonum mittere, quo communi consilio ac viribus, viri Principes belloq₃ docti, rustica puella resisteret. Venit octingentis stipatus equitibus, veteresq₃ fœderis conditiones cum Anglis renouat, iurantes se Carolum Valesium Biturigum Regem (sic enim per cōtumeliam Angli Carolum VII. vocitabant) iunctis viribus persecuturos, nec pacem alterum sine alterius consensu facturos. Et paulò post idem au-

thor

thor scribit. Cumq; Puella Ioanna quingentis comitata equitibus obsessis Compengis auxilio venisset, secundo die praesidiarijs ciuibsq; eductis, castellum cui Bando Noiellus præerat expugnasset, nisi ex omnibus castris in auxilium aduolassent. Puella multis utrinq; interfectis ac vulneratis urbem repetere cogitur: cūq; inter postremos pugnans ceteris euadendi locum faceret, è signo militari ac veste quam supra arma ferebat agnita (erat autem ea purpurea byssina auro argētoq; intertexto flauescēs) à robusto equite qui vestem apprehenderat equo detrahitur; & quamuis Franci extrema vi pro ea liberanda decertarent, pulsī, dedere sese Ioanna cum Pontone æconomi sui fratre filio Notho Vandomme domini cogitur, ductaq; Marignium magno Francorum cum dolore Anglorumq; gaudio, arcta custodia traditur. Nemine enim è Regis Caroli Praefectis Angli magis verebantur. Bonus quum eam esset allocutus, Ioanni Lutzenburgio commendat, qui Baulium, indeq; Baurenorium eam per-

Ioannæ
vestis mi-
litaris.

ducit, ubi fermè biennium detenta tādē Anglorum Regi (cum eam importunis indefinenter verbis diu petijſſet) traditur, eiſq; iuſſu inſtātibus Iunij Cal. anno 1431. Rothomageſi in foro exuritur, magis odio iraq; (quod ab ignobili puella tot clades viri bello illuſtres accepiſſent) quā quod aliquideis de tam indigna ſeuſq; mortis merito conſtaret. Accuſabant eam veneficij, quodq; malignorum ſpirituum opera tractaſſet bella, ac proinde à religionis Chriſtiane decretis & veritate deſeciſſet, quemadmodum Rex Henricus, qui hoc tempore in Franciam appulerat, ſua manu Bono perſcripſit. Sunt qui fabulam, quæ de Puella Ioanna ſcribimus, putent. Sed præterquam quod recentioris ſit memoria, omniumq; ſcriptorum libri, qui tum vixerunt, mentionem de ea præclaram faciāt, vidi ego meis oculis in ponte Aureliano trās Ligerim ædificato erectam huius Puellæ æneam imaginem, coma decorè per dorſum fluente, utroq; genu coram æneo crucifixi Chriſti ſimulachronixam, cum inſcriptio-

ne positam fuisse hoc tempore, opera sumptuq; Virginum ac Matronarum Aurelianensium, in memoriam liberata ab ea urbis Anglorum obsidione. Adhæc habebam, dum hæc scriberem, historiam lingua Gallica manu scriptam Georgij Castellani, qui eleganter, exactèq; vitam Philippi Boni exaravit, testaturq; aliquot locis sese hoc tempore vixisse, ac puellam Ioannam vidisse, quæ ex ignota, rusticaq; puella bellicis facinoribus eò peruenisset, ut ei Rex Carolus sumptus, quibus Comitis familiæ æquaret, suppeteret, ne apud viros militares per causam inopie vilesceret. Conspiciebatur enim eius in comitatu præter nobiles puellas, Procurator domus, Stabuli Præfectus, nobiles adolescentes pueri à manibus, à pedibus, à cubiculis, colebaturq; à Rege, Proceribus ac imprimis à populo instar Diæ habebatur.

Ioannæ comitatus à Rege concessus.

Georgius Lilius Britannus in Anglorum Regum chronico anno 1428. *Joanna Puella armata Aurelianenses obsessos com meatu iuvat, coactisq; hostibus obsidio-*

IX

nem relinquere ad VIII. Idus Maij Anglos viriliter expulit. Et paulò post. Puella Carolum Regem Remis consecrandum ducit. Deinde, Puella Compendium obsessum vi & astu ingressa, cum in hostes eruptionem faceret, a Io. Lucemburgensi capitur, Rothomagumq; ad Ducem Somersfertensem mittitur, dein magicæ damnata exuritur.

x.

Polydorus Vergilius lib. 23. Anglicæ historiæ in vita Henrici sexti. *Dum pacificatorijs legationibus Aurelianenses cum hoste agunt, Carolus copias undiq; arcessendas, Principes Francos ab Anglorum amicitia omnibus pollicitationibus alienandos curabat: Item commeatum quem ad obsessos Aurelianenses mittere, studio parabat, cum ad eum puella quædam nomine Ioanna, viginti circiter annos nata ducitur. Hæc ob servatam virginitatem, Puella dicta, & singulari prædita animo ac fatidica, cum ad Carolum adiunisset, eum primo vestitu regalem personam dissimulantem internouisse, deinde ita salutasse fer-*

tur: Bono Rex animo es, atq₃ mitte timorē, vinces enim, & me ducē, patriamq₃ tandem in libertatem pristinam vindicabis, si non maiestate indignum arbitrare fœmina opera uti. Carolus qui rebus suis iam affectis valde timebat, facile dictis credidit, in spem bonam omnino ingressus, ut qui iam tum aliquid diuinitatis in mente Puellæ sibi persuadebat inesse, ex eo, quod vestitu non regio indutus ab ea fuisset Rex salutatus. Sed aliud fuit, quam obrem in eam spem venerit: Puella enim petijt gladium, quem diuinitus, uti aiebat, erat facta certior in templo diuæ Catharinæ in Turonibus, inter antiqua donaria pendere. Miratus Carolus, gladium inquiri, ac inuentum protinus Puellæ afferri iussit, & periculi potius eius virtutis faciundi causa, quàm quod magnoperè consideret facinus aliquod egregium à fœmina edi posse, armatorum manum cum parte com meatu attribuit, ut obsessos subleuatum iret. Puella ita armata, dux agminis Aurelianum proficiscitur, ac sine frustrata

custodes, siue numine diuino tecta, noctis silentio inter tela hostium in urbem intrauit, cibariaq, intulit, sine ullo suorum incommodo. Angli interea qui certum habebant ciues ob rei frumētariae inopiam, non posse diutius obsidionem ferre, remissius solito urgebant, negligentiusq, excubias ducebant: sed ubi cognouerunt Ioannam puellam commeatum supportasse, etsi cōtemptui habebant fœminam, quæ militaria munera obiret, tamē obmissum subsidium ira accensi, acrius multo hostem premedandum statuunt: Itaq, Duces suos cohortati ut aliquādo pro tantis laboribus, fructum victoriæ caperent, ijs qui primi in murum ascendissent, premia proponunt. Qua re pronuntiata, subito ex omnibus partibus euolant, murumq, complēt simul tormentis cuiusq, generis, simul telis hostes à defensione murorum arcentes, idq, sine intermissione faciunt. Hostes quamuis re noua perterriti, sese tamen non deserebant, nec animo dimittebant, cum Ioannes Notus per nuntios celeriter Carolo significauit,

ciuitatem inopia rei frumentaria premi, ac usq; eò hostem urgere ut non possent, vires cuiusquam satis esse, atq; rem deniq; in tali periculo versari, ut breui male casura esset, & ne id accideret, positum in eius diligentia atq; virtute. Quibus rebus cognitis, Carolus quàm celerrimè potuit & subsidium & commeatus copiam misit. Exercitus Aurelianum ductus, ac castra propè ad millia passuum duo posita. Tum Franci de suo aduentu Puellam quæ Aureliani erat admonent, rogantq; ut postero die cū electa suorum manu obuiam veniat, seque tutò intromittendos curet. Quod ubi per Anglum fieri licuit, qui ex usu suo fore ducebat, si quam plurimi in vrbe essent, in qua iam fames dominaretur, postridie illius diei omnes uno momento, contendentes de vrbe erumpunt, proximumq; propugnaculum continenti impetu petunt, quod post multam factam utrinq; stragem capiunt, atq; incendunt, deinde maioribus animis aliud longè maius oppugnant. Hic quia benè magna defensorum manus ade-

rat, vehemētius depugnatur. Francus qui numero præstabat, facta corona, undique urgebat. Anglus vitio munitionis, quæ iam frangi cœperat, omnibus rebus premebatur, agrèq; sustinebat, cui ita laborātine Talbotus quidem qui in propinquo erat & tertium tenebat propugnaculum, subsidio ire poterat, veritus ne se absente, ea quoq; munitio amitteretur. His igitur difficultatibus Angli aliquandiu pressi, ad ultimum loco summoventur, qui factorepente cuneo ad Talbotum in tertium propugnaculum se receperunt. Talbotus nulla facta mora, cum expedito exercitu adversus multitudinem contendit, qui non mediocriterrore illato, & suos firmavit, ut se ex magno timore colligerent, & hostes compressit adeò ut protinùs se intra mœnia coniecerint. Cædes ab Anglo minor facta, quod munitio minus firma fuerat, in qua primum crumpentium impetum excepit. Haud ita multò post Talbotus conuocato cōcilio, causas quàm multas docet, quamobrem obsidionem ciuitatis diu oppressa,

oppressa, & perinde quasi ope diuina defensa, aut modis omnibus relinquendā, aut in aliud tēpus reijciēdam existimet, cū meliore omine id opus tētari licuerit, ut ne tempus teratur, quo hyeme iam confecta, ad bellum magis necessarium eatur. Probata non tam libenter quān necessario generatim à cunctis sententia, & dato profectio-
nis signo, Magdunum pergunt. Discessu Anglorum omnia repentē apud Aureli-
anenses letitia & cōgratulatione plena sunt, quod tantum periculum vitassent: quare id beneficij Deo acceptum referentes, in plu-
res dies supplicationibus decretis, orarunt ad cuncta Diuorum templa, communem
victoriam exposcentes. Hinc profectō vi-
deamus licet, illum aliquoties minus con-
sequi, qui plus nimio poscit: equidem An-
gli vincere potuerunt, sed existimantes sua
dignitatis non esse, admittere Aurelianen-
sium deditionem, aliter atq; petebant fa-
ctam, neglexere victoriam, perinde quasi
in manu esset: verū tantum post abfuit,
ut Aureliani potiti sint, ut eos necessitas

ab incœpto auerterit. Franci autem ob pulsum hostem gloriantes, reliqui negotij gerendi facultatem nequaquam dimittendam statuunt, qui continuo per omnem agrum Aurelianensem percurrunt, oppida quæ hostis præsidijs tenebat, recuperandi causa, & primum Gergeum petunt, paucisq; post diebus capiunt, amplius ducentis Anglis interfectis, & quadraginta captis: ex suis verò militibus trecentos desiderarunt. Alia utriusque exercitus egregia facinora persequitur idem Polydorus, qui quamvis Anglorum fuerit stipendiarius, tamen non ausus fuit Ioannam damnare, sed eius virtuti & innocentiae suffragatur, & tandem ait, sententiam latam in Ioannam visam profectò fuisse post homines natos durissimam, quæ neq; molliri, neque mitigari tempore potuit. Sanè fœmina pro patria ad virilia decora excitata, digna favore videbatur, cum præsertim per multa extarent parcendi exempla, & illud potissimum à Porsena Hetruscorum Rege editum: is enim composita cum Romanis

pace, cum obsides accepisset, & in ijs Clæliam Virginem, & illa dux agminis aliarum virginum, frustrata custodes inter tela hostium Tyberim tranasset, ad suosq; confugisset, ac inde ex fœdere restituta fuisset, nō affecit Virginem pœna sed collaudatam & parte obsidum donavit, & domum remisit. Hæc Polydorus.

Accommodè cum proximis hisce duobus rerum Anglicarum scriptoribus, conspirant Scotorum Historici duo, Hector Boëthius Deidonanus Scotus vir ornatissimus, & singulari doctrina præditus, qui in libro XVI. historiæ Scotorum num. 10. 20. & 30. de eadem Ioanna sic scribit. *Clades longè maxima Francis fuit undiq; post victoriam, & Anglis & Burgundionibus Franciam invadentibus, ac simul Aureliam obsidentibus. Actumq; prorsus de Franco tum nomine fuisset nisi virgo quædam Ioāna nomine virili vestitu induta, armisq; egregiè exercitata Carolum propè desperantem erexisset, atq; ad meliora excitasset. Quod numine diuino*

X I.

factum non absurdum est credere. Itaq³ omni ope destitutū humana Carolum cum Ioanna per Campaniam Rhemos contendentem, omnes eum Campani excepere volentes, reiecto Anglorum iugo, omniaq³ oppida, arces, castellaq³ illi tradiderunt. Rhemos quoq³ accedentem quæ tum Anglorum partibus fauebat, lata excepit ciuitas, Regemq³ solemni ritu salutarunt. Inde Ioanna Duce varias Francia partes adiens, magnam regni partem ab hostibus occupatam recepit. Fœlix undiq³ ac prosper successus fuit, donec eruptione, Ioanna cum bastium copijs pugnans, dum victa cum suis à premente multitudine portam Compendij oppidi ingredi prohiberetur, à Ioanne Luxemburgensi à Burgundionibus stante capta est: qui illam continuo Anglis vendidit. Angli verò ex templo Rothomagum eam ducentes accusarūt, quod violatis humani generis legibus, armis ac veste virili fœmina uteretur, ac præterea magicis artibus ab humano usu prohibitis operam daret: ac dum in foro se excusare conare-

tur subiecto igne concremata est.

Ioannes Ferrerius Pedemontanus libro 18. historiæ Scotorum num. 70. Puella Henrico sexto & Francia Angliæ Rege salutato, orta discordia inter Burgūdos Anglosq;, tum Franciam armis occupatā opprimentes, Comite Sarisburiensi incerto machinæ bellicæ quam bombardam vocāt, ictu occiso, aduersa uti fortuna cæpere. Franci ex occasione animum recipiētes duce fœmina (Galli vocant Puellam Ioannam nomine) ut non sine diuino fieri numine appareret, fortissimè non modò Anglos sustinuerunt sed etiam omnibus fermè prælijs cæperunt esse superiores.

XII.

Author opusculi doctrina refertissimi de illustribus fœminis. Regnante apud Gallos Carolo septimo, quum Angli omnia populabundi passim irrumperent, & iam prospero fortunæ Zephiro adiuti, nihil sibi non pollicerentur, desperatis Gallorum rebus adfuit Ioanna magni spiritus virguncula, quæ attritos Gallos animās ad ultionem & libertatis gloriā, prima belli cam-

XIII.

pum ingressa, non prius suos hortari & ipsa certare desinit, quàm hostem in fugam verterit reportata victoria.

§IV.

Ioannes Tillius Meldensis Episcopus, in Chronico de Regibus Francorum à Pharamundo vsque ad Henricum secundum. In rebus anni 1429. inquit; Aurelianienses omni auxilio miserè destituti Burgundioni dedere se statuerant, sed contentione Anglorum Ducum res infecta fuit. Quod agerrimè Burgundio tulit. Joanna Puella armata obsessos iuvat coactis hostibus obsidionem relinquere, ad octauum Id. Maij, eosq; virtute minimè puellari expellit. Frācis deinde res melius ac fœlicius procedere cœperunt. Ioannes Nothus Aurelianiensis. Pataiense in Belsia prælium. Cæsis Anglis Ioannes Talbotus capitur. Puella armis per loca ab hostibus occupata Regem Carolum Rhemis consecrandum ducit, multasq; in itinere vrbes recipit. Bedfordiensis Anglus prælio dimicare velle simulans, Regem Parisios rectà contendentem remoratur. In oppugnatione Lutetia ad

portam D. Honorati Puella vulnerata, exercitus serecepit, quæ illum in alias partes Gallia ducens aduersus Anglos, ob successus & victorias semper celebratur. Compendium obsessum vi & astu ingressa, cum aliquando in hostes eruptionem faceret, à Ioanne Lucemburgensi capitur, Rothomagumq; ad Ducem Sommersetensem mittitur, deinde inuidia & iniuria artis magiæ damnata exurit.

Ioannes Tillius superioris frater & actuarius in suprema Curia Parisiensi libro primo Commentariorum & disquisitionum de rebus Gallicis ad nostram historiã hæc scribit. *Carolus septimus fuit Rex parentis obitu: sed quia Angli & Burgundiones hostes agrum Campaniensem, Veromandum, finitimosq; obtinebāt, non potuit Remis coronari nisi decimo septimo Iulij, anno 1428. quo viam armis sibi aperuit, & consilio Joannæ Aræ (quæ dicitur Virgo) filia Iacobi Aræ & Isabelle Valteuria nata Dumprinij ad Mosam in Tullensi diœcesi. Hæc enim Regem dedu-*

xit, & armata coronationi astitit, vexillum album manu gerens, cui inerat figura Christi lirinum florem gestantis manu, monita (ut aiebat) cœlesti viso. Venerat autem sub tempus Ascensionis anno 1428. cum patruo quodam suo ad Vallemcoloriam, ubi Baudricortensem Præfectum, Vallicoloria (qui postea fuit Mareschallus Franciæ) oravit ut se ad Regem mitteret, cui visiones certas retegeret & officium exhiberet: deinde verò ineunte quadragesima ad Vallemcoloriam eadem de causa reuersa est, cui Baudricortensis impulsus ex sententia consilij adiunxit Bertrandum Poladium armigerum, Ioannem Metensem, Colletum Viennensem, & Richardum Arcuarium, duces itineris. Hæc itaq; mutatis vestibus suis puellaribus & rubris, ut commodius iter conficeret, virilia induit vestimenta: ita de nocte solum cum suo comitatu pergens per regiones ab hostibus occupatas, exponebat quæ via tenenda essent, quamuis à suo pago nunquam discessisset procul. Ita ad Regem perducta est Chino-

nium,

nium, ubi questione habita fuit armata, & ad suppetias Aurelianis ferendas ablegata: qua obsidione soluta & Rege coronato Remis, illa in officio pergens eruptionem è Compendiensibus fecit, in qua per satellitem quendam Comitis Lignij capta anno 1430. in castellum Bellorouorij abducta, & ibi tres menses detenta est, posteaq; demum tradita Regi Angliæ numeratis mille libris Turonēsis & tercentenis libris in prouentum annuum attributis. Sed quia fuerat in diœcesi Bellouacensi rapta, Petrus Caucho Bellouacensis Episcopus Anglicarum Burgundarumq; partiū, questionem de ea in arce Rotomagensi habuit: cumq; inspectione facta Virgo deprehensa esset, tanquā si fuisset maga, & propterea quod viriles vestes tulerat, sententia lata in abiurationem & perpetuum carcerem damnata est, adiecto interdicto ne viriles vestes porro sibi indueret: cum tamen alias neq; darent ei, neq; dari paterentur quàm eas ipsas viriles quibus vsa fuerat. Ita post octiduum, altera sentētia ab Episcopo Bel-

louacensi lata in crimen iudicata est recidisse, & commissa brachio (ut vocant) seculari, à magistratu in ignem damnata, & in foro vetere Rotomagensi vsta est. Atque hac quidem occasione visum est infamiam Regi Carolo inurere, ac si ad rem militarem viros adhibuisset male sentientes de fide; quod alienum erat à Rege Christianissimo. Hanc verò maculam ut elueret Rex, die vigesimo septimo Nouembris, anno 1455. in eade Lutetiana stiterunt semater Joannæ, & fratres ipsius Ioannes ac Petrus Araus, coram Ioanne Rhemensi Archiepiscopo, Guilhelmo Parisiorū & Richardo Constantiæ Episcopo, quos Papa Calixtus tertius indices dederat, ut de inanitate & vanitate questionis habita, & sententiæ in defunctam latæ cognoscerent atque statuerent. Quod efficientes die octauo Iulij 1456. sententiā latā irritā questionem totā & sententiā condemnationis pronuntiarunt: præterea ut Ioannā defunctā absoluerent, statuerunt crucem in foro vetere erigi ad iniuste executionis

monimentum. Atq; hoc quidem auxilium damnant leuiore quidam, alij ducum certorum astutia acceptum ferunt, exempla Debora, Iaëlis, & Iudithæ minimè recordantes: sed non est decurtata manus domini, cui placuit Puella opera restituere victoriam Regi. Omnibus enim notum est, quàm breui exercita & armis assueta fuerit, hostes verò ex quo se ad arma contulit hæc virgo, magis ac magis inclinasse.

Franciscus de Rosiers Archidiaconus Tullensis tomo quinto stemmatum Lotharingiæ Ducum. Dum Francia iam peritura crederetur, Iana puella Lotharinga pascendis pecoribus sub ferula paternæ assueta ad Regem perducitur, quæ se à numine monitam dicens, breui Anglos exæturam è Francia profitebatur. Ea licet multiplici percōtatione obuersata esset, non destitit tamen à se ipsa, sancte, pudicèq; loquuta. Rex mirabundus, procereq; rem diuinitus patefactam non aspernandam arbitrati, chlamide, militariq; habitu puellam induunt, copiasq; ac duces illi cōmit-

XVI.

Iana puella Lotharinga.

Carolus
VII. ab-
lata recu-
perat.

tunt. Breui crebris velitationibus initis, commeatus, nempe septimo, postquam obsidebatur, mense, Aureliam inuexit, liberavit, Anglumq; fatigavit. Rex demum ad sacrum Rhemenſe cum Iana proficiſcitur, fanum Florentini munitio- nibus, fir- mauitq; praſidio, Trecenſes recepit, Cata- launumq; ſubinde nullam dedēdi moram fecit. Rhemi continuo fidem dedere, Sueſſi- onesq; in regiam manu rediere. Dux Beth- fortis cum exercitu occurrēs Regi incaſſum tempus triuit, Lutetiamq; eodem progreſſu regius miles fruſtra perduc- tus. Nam Beth- fordienſi reuerſo ad urbem defendendam, omnis nauata eſt opera, quin Iana vulne- re affecta Petri monaſterium eripuit hoſti. Is Compendium eodem tempore circumdu- cit, quò cum Iana ſe contuliſſet, irruptione facta, hoſtis poteſtati ſubmittitur. Tum capta Rhotomagumque ducta, religionis adulterina inſimulatur vnaq; comburi- tur. Aureliani ſtatua diuæ memoriæ cō- ſecrarunt.

addat nobilis vir Petrus Opmeerus Amstelrodamus Batauus in opere chronographico orbisvniuersi iure à nobis suum hic sibi locum vendicat. Is posteaquam annotauit Ioannam Lotharingam Aurelianenses obsessos liberaſſe & hostes profligasse; Carolum septimum patri succedentem & Biturigibus se cōtinentem, ab aduersarijs suis Regem Biturigum fuisse appellatum, ita loquitur. *Attamen ipse titulum Regis Francia & sigillum usurpabat, quamuis non esset Rhemis consecratus. Porro cum undiq; Rex ab Anglis vexaretur; venit ad eum Puella octodecim annorum nomine Ioanna, patre Iacobo Darco, & matre Isabella Damprema Lotharingia pago orta, atq; oues pascere solita, dicens se missam diuinitus ad Regem ut ei indicet gladium esse in eade Domina Catharina Fourbonſi apud Turones, quo accincta esset Aureliam obsidione solutura. Itaq; virilibus induta indumentis & armis Gallicas ducebat acies, & ex Anglorum manibus magna ex parte, prima inter primos*

pugnans victoriam eripuit, atq; urbem obsidione semestri liberavit. Gratitude ergo posuere Regi Ioannaq; aras statuas in ponte Ligeris S.P.Q. Aurelianus. Deduxit verò & Carolum Rhemos, ubi decimo sexto Kalendas Augusti unxit eum Reginaldus Episcopus in Francia Regē. Cum verò Burgundos Compendium obsidentes vellet abigere; capta fuit nono Kalendas Iunij & vendita Anglis. Qui eam dicentes magam combusserunt Rothomagi in foro. Scripsitq; pro ea apologiam Ioānes Gerson Theologus Cancellarius Parisiensis: similiter & Henricus Gorcomius Batavus.

XVIII. Nicolaus Vignierius in rerum Burgundicarum chronico, ad annum 1429. *Aurelianum ab Anglis & Burgundis diu obsessum auspicijs & ductu unius puella nomine Ioanna liberatur, & ab eo tempore Francis res melius ac feliciter procedere cœperunt.*

XIX. Sebastianus Veronius lib. 3. Christianæ ætatis sæculo 15. *Gallia ab Anglis & Burgundis maxima clade afficitur, Carolo se-*

ptimo qui anno 1422. Carolo VI. successerat propemodum regno exuto, ac apud Bituriges tantisper delitescere coaëto, quo ad à Ioanna Virgine Aurelianensi militari manu ereptus ac Rhemos ut coronaretur deductus est; Parisijs interea proclamato in summo templo Rege Henrico sexto Anglo.

Aubertus Miræus Bruxellësis in chronico rerû toto orbe gestarum anno 1428. scripsit, quæ Pap. Mallonus in vita Caroli 7. & Ioan. Mariana lib. 20. de rebus Hisp. referunt. xx.

Ioannes Funccius Norimbergensis in chronologia annotat, *Ioannam puellam, annorum 20. arma cepisse, Regemq; Carolum contra Anglos & Burgundiones magnificè defendisse, & captam tandè ab Anglis Rothomagi crematam esse.* xxi.

Eadè Conradus Lycosthenes in chronico prodigiorum ac oïentorum ad annum 1428. xxii.

In secunda parte promptuarij Iconum insigniorum à sæculo hominum in vita xxiii.

Caroli VII. habentur hæc verba. *Ioanna Puella armis instructa militis subit munus, obsessos Aurelianenses iuuat, hostes cogit obsidionem soluere, per loca ab hostibus occupata Regem Carolum Remis consecrandum ducit, multasq; in itinere vrbes recipit, tandem ab hostibus capta Rothomagi exurit. Lutetia Francorum armis Angli pelluntur.*

XXIV.

Georgius Braun & Franciscus Hogéburgius in indice libri secundi & tertij de præcipuis totius vniuersi vrbibus. *Aurelia, florentissima Gallia vrbs, loco admodum opportuno sita, diues, ciuibus armis exercitatis potens, munitissima, non in Gallia modo, sed tota etiam Europa clarissima. De memorabili, post omnium hominum memoriam, obsidione eius, qua Carolo VII. eius nominis Rege, anno 1428. ab Anglis cincta fuit, & miraculosè ab Ioanna Lotharinga virgine belli duce liberata; Vide benigne lector, integrum libellum, Ioannis Ludouici Micquelli Ludimagistri Aurelianensis ad Carolum Lotharingum Cardina-*

Cardinalem. Res enim paucis, ut hic locus postulat referri non potest. In eius liberationis perpetuam memoriam, octauo die Maij, quotannis totus urbis magistratus, uniuersa plebs & omnes Ecclesiasticorum ordines, generali processione gratulabundi obire ciuitatem consueuere.

Ioannes Auentinus in fine lib. 7. annalium Boyorum. *Carolus septimus Gallijs expulit Anglos, victricibus ubiq; armis Virgineis auspicijs, Puella Duce cœlitus demissa, paternum principatum recuperavit.* XXV.

Similia Ioannes Besnardus Reginae Angliæ Secretarius in summario annalium & chronicorum Angliæ in originali manuscripto in Bibliotheca regia Parisiensi asseruato, prout me ibidem legisse sanctè assero, testorque. XXVI.

AC ne longior pedestris oratio, quam Poëtæ.
 Aquam est à nobis insigniter variata,
 tædium cuiquam, & satietatem afferat,
 placet Poëtas, sed qui arma Ducesque ca-

nere nouerint, inducere huc tantisper
numeris modisque personantes.

- I. Hubertus Momoretana, is qui Ioan-
næ Puellæ vitam septem libris bellorum
Britannicorum bellissimè descripsit, pul-
chrè libro sexto tum eam ostendit ab An-
gelo aditam animatamque vt Galliæ re-
bus deploratis opem ferret, tum honori-
ficentissimis titulis cohonestat. Locum
alacrius vt legas lector tibi eius principiū
delibo, quod obiter supra retulimus.

*Virgo pudicitia specimē; gratissima mūdo,
Grata polo: quā blāda Ven⁹ mollisq; Cupido
Flectere non potuit, tincta in Phlegetonte*

figitta

*Metibi ab astri feri mittit regionibus orbis,
Quæ genuit natura Deū: iubet arma ca-
pessas*

*Rebus in angustis, subitā allatura salutem.
Illa animum, viresq; dabit: sume horrida
sume*

*Pro pensis forti arma manus; clypeumque
micantem*

Nervosis obnube humeris: Carloq; potenti

(*Sic superis Maria que placet*) succurre: fe-
rosq;

*Iam non fœmineo mucrone repelle Britan-
nos. &c.*

Valerandus Varanius Doctor Theo- 11.
logus Parisiensis, præclara Ioannæ faci-
nora carmine heroico libris quatuor cō-
plexus, quos & inscripsit *de Gestis Ioannæ
Virginis egregiæ Bellatricis, & Anglorum
expultricis*; in ijs bellicosæ huius puellæ
ortum, studia, mores, vitam, mortem ele-
ganter recenset, ac principio statim ope-
ris Angelum sic loquentem inducit.

*Salve Barriceæ lux & nova gloria terræ:
Omnipotens rector (qui res alternat: & esse
Diversos iubet influxus, ut tristia latis,
Letaq; succedant lugubribus) æthere sūmo
Melabi voluit: qui talia voce referrem.*

*Gallia iādudum luctu intabescit amaro:
Astra onerat votis, & thure fatigat acer-
Possit ut hoc tādē bellorū fasce leuari. (ras:
Audytor antem summi clementia patris:
Direpti miseret regni, Carliq; iacentis.
Persequitur: puerū (quāq; natura reclamatione)*

Declara-
tur Caroli
VII. ad-
uersa for-
tuna.

*Anglorū exitiale odiū: profugoq; supersunt
Vix lacera sedes angustaq; portio regni.*

*Militat aduersis dudū Normania signis:
Nobilisq; priscos q̄ nominat insula Frācos.
Adde q; Aquitanā, gentē Phæboq; cadenti
Expositas vrbes: vicinaq; nereos arua:*

Apud Bi-
turiges
Carolus
educatur.

*Cetera pene in idem genus inclinata ruina
In pradā veniūt hosti, q; p̄scribitur heres:*

*Quē Losci Aruerniq; fœuent, agrēq; tuētur.
O jælix Virgo q; fœlicibus edita fatis:*

*Quæ post tot clades q; belli fulmina, pacem
Restitues: tibi perpetuos sacrabit honores
Posteritas: dira succede tyrannidis ultrix
Armipotēs succede operi, te acclamat olym.*

pus.

Ioannæ
parentes
nobiles
facti sunt
ante igno-
biles.

*Quin genus oē tuū numero cēsebitur olim
Nobilium, tu prima feres insignia clari
Stēmatīs, q; delebis on° seruile parētū. q; c.*

III.

*Sed & Ioannis Salmonij Macrini in
Valerandi Varanij puellam peruenustum
est hoc hendecasyllabum.*

*I fausto omine dexteroq; cælo,
I Francos sacra Virgo per Penates
Vrbatim simul q; domesticatim:*

*Nemo non cupiet tuam videre
Firmatam Latio ore sanctitatem.
Nemo non cupiet tuas videre,
Mamillas tenere sororientes
Loricæ assiduo labore fessas.
Nemo non cupiet tuum videre
Crinem incompositum comatulumq.,
Errabundum humeris decenter ipsis,
Pressum casside, Martijsq. cristis.
Nemo non cupiet tuos videre
Urgentes celerem pedes caballum:
Munitos ocreis laboriosis,
Thibialibus insitos malignis,
Ægrè vel Phrygio Hæctori ferendis.
Seu tu fulmineum rotabis ensem:
Seu telum validis ages lacertis:
Vel sternacis equi ferocitatem
Coges in medium potenter hostem
Thermodontiacæ propagis instar:
Applaudet strepitu tibi sonoro
Presso & pollice gesta prosequetur
Galli concio copiosa circi:
Et quis unq. odio caret sinistro.
I fausto omine dexteroq. cælo,*

*I Francos sacra Virgo per penates
 Urbatim simul & domesticatim.
 Te Varanius ille litteratus
 Romana iubar & decus camena:
 Actæ decus & iubar Minervæ
 Abstrusam latebris tenebricosis
 Sepultam tenebris latebricosis
 In lucem retulit sereniorē.
 Et peplis Latialibus venustans,
 Vestiuit tunica Maroniana:
 Ut quocunq; feras pedem videri
 Possis splendidior decoriorq;
 Osores metuens nihil procaces
 Dentatos nihil atq; virulentos
 Arcendos scuticatrimuirali.
 I fausto omine dexteroq; cælo,
 I Francos sacra Virgo per penates
 Urbatim simul & domesticatim.*

14. Præclarum autem illud, & iusta in ob-
 trectatores nostræ Virginis indignatione
 ardens, tetrastichon illud viri ornatissimi,
 studiosique meritorum eius defensoris,
 Stephani Paschasij Iurisconsulti Parisien-
 sis ac in supremo Galliarum Senatu Pa-

troni in libro sexto Epigrammatum; epigrammate de Iana quam vulgò virginem Aureliam vocant.

Iana vocor, genabo numē, medea Britānis,

His meretrix, alijs fabula cauta Numæ:

Viva ego quæ laceri stabiliui mœnia regni,

Hei mihi, ꝑ meritis mortua nūc laceror.

Claudam hanc testium, siue astrictâ, v.
siue solutâ oratione, numerositatem, parte Epistolæ clarissimi illorum temporum scriptoris, in qua tametsi Ioannæ nomen non commemorat, res tamen ab ea gestas diuino numini adscribit. Is est Philelphus Eques auratus & Poëta laureatus qui tempore Ioannæ viuebat, Caroloq; ipsi VII. in epistola vltima libri octauæ epistolarum diuini numinis salutarem manum gratulans, monensque de diuino beneficio religiosè agnoscendo, sic eum soluta oratione compellat. *Dolendum profectò erat bonis omnibus (Rex Carole) quod Christianissimum genus hominum te Rege pientissimo tam diu, tam grauitè, tanta malorum mole premeretur. At ego cum*

meipsum colligo: & mente diligentius rem
voluto: facile videor intelligere id omne di-
uino quodam consilio factum esse. Ostende-
re Deus voluit (ut opinor) nullam esse hu-
manam potentiam, quæ proprijs consilijs
atq; adminiculis, aut perpetua esse possit
aut diuturna, si diuino prasidio careat.
Quamobrem idcirco paululum veluti à
Francis secedere visus est, quo & per fide-
lissimi populi flagella, infidelibus cunctis
minitaretur interitum: & cum te Francis
venerabiliorem, tum vniuersis tuis suis
hostibus formidabiliorem efficeret. Tua
certè pietate & diuina quadam ope & au-
xilium factum est: ut eos omnes qui perinde
atq; stulti & amentes à te defecerant, ad
sanitatem tuam cum gloria videas rediisse.
Deo ipso Duce, Imperatore vexillifero, non
modò patritum atq; auitum regnum cum
immortalitatis nomine recuperasti: sed lō-
gè id admodum amplificasti, stabilisti, or-
nasti. Nam si magna res est ferocissimos
Anglorum impetus sustinere, quanto ma-
ior censeretur debet Anglos superare, proster-
nere.

*nere, interimere; Has autem tales tantaſq;
victorias in rebus præſertim deſperatis &
perditis exiſtimare debes neq; tuis, neq; ullis
humanis opibus te adeptum; ſed diuina po-
tius quadam mente; quæ Chriſtiana ſuaq;
Reip. diuturna agrotatione morboq; con-
fecta; tuo fœliciſſimo ductu, tuis ſecundiſſi-
mis auſpicijs iam tandem ſuccurrere me-
derique conſtituit. Et circa finem eiuf-
dem epistolæ ſic eidem Carolo ſcribit
idem Philelphus. Vt reliquis Chriſtianis
Principibus ac Regibus dignitate præſtas,
ita tibi omni ope atq; opera ſtudendum eſt,
ut abſolutiſſima virtute his omnibus, &
vera gloria ſis ſuperior. Vicisti Anglos,
recuperasti patriam &c. Et pulchrum id
certè fuit & laudabile. Iuſtitia enim mu-
nus in teipſum tuosq; contuliſti. &c.*

Plura huius hiftoriæ firmamenta ac te-
ſtimonia, ſi quis requirat, cōſulat, cenſeo,

Librum Ioannæ Puellæ hiftoriam cō-
tinentem in cœnobio S. Viſtoris Pariſ.
Alanum aurigam in hiftoria Caroli VII.
Nicolaum Agidium ibidem.

A quam-
pletimis
eſt hono-
rica loq-
nemētio.

Papirium Maſſonum ibidem.

Belleforeſtium ibidē. & in Coſmograph.

Du Haillan ibidem. & lib. 2. ſtatus negotiorum Gallia.

De Serres ibidem.

Wasbourg in annalibus Gallia Belgica.

Bouchet in annalibus Aquitania.

Historiam nouem Carolorum.

Benedictum Curium in hiſtoria Mediolanenſi.

Ioānem de Eſpinoſa lib. de laudibus mulierum.

Hartmannum Schedel Doctorem in regiſtro libri Chronicorum.

Tomum primū theatri vitæ humanæ in tit de fortitudine mulierum.

Georgium Caſtellanum in vita Philippi Boni Burgundia Ducis.

Regiſtrum annorum præteritorum.

Enguerranum de Monſtreſ. in 2. volumine chronicorum.

Mare hiſtoriarum.

Mirabiles victorias ſeminarū orbis noui.

Thomā Boſſ. lib. 8. de notis Eccleſ. & in

cap.8. libri de robore bellico aduersus
Macchiauellum.

Micquellum in obsidione ciuitatis Aure-
lianensis.

Legend. Flandrorum.

Andream Eborēsem Lusitanum in 2. to-
mo dictorum & factorum memorabi-
lium tit. de fortitud.

Guillelmum du Bellay in cap. 9. libri 2. dif-
ciplinæ militaris.

Glossam pragmaticæ sanct. in principio
procemij in verb. gratia.

Paponium in principio 3. tomi notarior.

Renatum Chopinum lib. 1. de Iurisd. An-
deg. cap. 76.

Librum factorum memorabilium.

Ægidiū Corrozetū lib. dictorum memorab.

Rauisiū Textorem in primo tomo officii-
næ dū de mulieribus bellicosis & maf-
culæ virtutis differit.

Historiarum electionem.

Richardum Dynothū. lib. de rebus & fa-
ctis memorabilibus.

F. Petrum Crespet Cælestinum in secūdo

tomo horti recreationis spiritualis in tractatu excellentiæ virginitatis.

Gaillard. in sūmario temporū, & in methodo leg. hist.

Lib. puellæ Aurelianensis restitutæ per Beroaldum Veruillanum.

Historiam tragicam eiusdem puellæ.

Historiam obsidionis Aurelianensis.

Ioannæ Darcie obsidionis Aurelianæ liberatricis res gestas, imaginem & iudicium.

Stephanum Paschas. in epistolis. & cap. 8. lib. V. disquis. Gall.

P. Matthæum in additionibus ad 84. decis. Guidonis Pap.

Theuetum de viris illustribus nempe in cap. 25. lib. quarti.

L. Triputium Cons. Reg. Aurel. in syluula antiquitatum Aureliarum.

Guillelmū Paradinū in annalib Burgūd.

Ludouicum Gollut ibidem.

Philippum Camerarium I. C. Norimbergensem Consiliarium in cap. XI. libri secundi meditationum historicarum.

Crimina
in eam
intenta.

Quatuor in eam intenta sunt crimina, virilis habitus, magia, hæresis, simulata virginitas; vanæ omnes & frigidaë criminationes; sed facis illius quæ funerali eius rogo veros ignes subiecit, id est, inuidiæ ac malevolentiaë, speciosa apud homines integumenta. Et verò vt vetere & imperatorio verbo vtar, *Ecquis innocens esse poterit, si accusare sufficiet?* Quanquã mendaciorum vanitas sic aperta est interdum, vt neque ijs probabilia sint qui ea valere velint maximè. Itaque neque Ioannæ inimici, calumniam de magia, hæresi, pudore prodito, probare vnquam; credo, neque ex animi sui sententia, sed ad odij sui duntaxat defensionem aliquam, in iudicio vrgere potuerunt. De veste virili, quã ad bellum proficiscens sibi induere solita est, deponere autem rêcepto muliebri habitu (sic enim accepimus) cum belli vsus non erat, institère quidem ampliùs, & religionem mouere studuerunt. Sed causas Ioanna eas dixit ab religione & castimonia, quibus resistere ipsi meritò non pos-

sent. Defensa est etiā ijs Theologorum ac
præfulū literis & decretis, ijs prodigijs euē-
tisq; cœlestibus, quæ omnē animi dubita-
tionē facilè eximūt. Purgabo singula cri-
mina certis temporum illorum monu-
mentis iudicijsque, cum rem summatim
omnē Meyeri Belgæ historici verbis re-
præsentauero, eo iustius quod acerbiorē
alioquin in Gallos animo, veritatis quam
adulandi Anglis amantior, innocentem
eam morti ab ijs addictam confitetur. Sūt
autem eius hæc verba.

*Anno Domini 1431, tertio Cal. Iu-
nias pridie feriarum sanctissimi Corporis
Christi Rothomagi in veteri foro rerum
venalium cremata igni est Ioanna puella,
ob nullam quidem iustam causam, sed per
odium solum Anglorum. Ausus est Petrus
Cochon Anglus genere, Bellouacorū Epif-
copus in gratiam Bethfordij Rectoris Gal-
liæ innocentem virginem morti adiudica-
re. Quidenim non designant tales Episcopi,
seu umbræ potius Episcoporum? Ecclesia
Rothomagensis Episcopo tunc carebat. Pu-*

Ioanna
Puella
immeritò
ab Anglis
cōburnitur

Petrus
Cochon
episcopus
iniqui iu-
dicii Præ-
ses.

Sūmaria
Ioannæ
defensio.

Ioannæ
simplex
prudētia.

ella nec aduocatum nec Patronum sua in causa habere licebat. Simplicem ac illiteratam Virginem multis Episcopus eiusq; collega interrogationibus de fide Catholica fatigabant, uti illaquearent ac circumuenirent illam aliquo in lapsu, sed frustra hac omnia. Respondet enim sapienter valde, & Catholicè. Et quanquam famam spargerent magam esse & maleficam, nihil tamen tale poterant in illa deprehendere. Sed illud in crimen vocabant quod virili uteretur veste: quod tamen facile purgauit, nec v̄sa est eo amictu nisi solū in rebus bellicis quemadmodum diuinitus dicebat sibi præceptū. Habebat sibi assessores ille Episcopus Aegidium Abbatē Ficicampi Theologum, Nicolaum Abbatē Gemeticensem Iureconsultum, Petrum Priorem Longauilla & alios complures: quorum nemo ne hiscere quidem ausus est contra Anglorum voluntatem. At inquisitor fidei per Franciam frater Ioannes cognomento magistri, scrupulo conscientie prohibitus, sapienter ab horum confessa abstinuit. Bethfordius autē

ut

ut Philippum Burgundia Ducem placaret, hæc adeum scripsit mēdacia. Ioannam neminem super terram voluisse agnoscere præter solum Deum & Sanctos paradisi. Reiecisse statuta Papæ, & iudicia conciliaq; Ecclesiæ, cumq; videret se morituram, cōfessam esse spiritus illos qui sæpè illi apparuerāt, mendaces & falsos esse. Per eos spiritus se esse deceptam qui polliciti erant eam liberare. Est qui refert proditam ab ipsis Gallis propterea quod quicquid illi gloriōse gererent, fœmina adscriberetur. Sic perijt vindex Galliarum. Nobiliter olim Porfena Rex qui Chlæliam virginem Romanam obsidum liberatricem non interfecit, sed muneribus donatam domum remisit: laudata virtute eius ac pietate in patriam. Cineres crematæ virginis sparserūt in flumen: nec unquā ea ex die victoriam aliquam insignem retulerunt ex Gallis. Hæc Meyerus.

Causa pro
ditionis
Ioannæ

Re sic commodè informata, pedem iam pressius cum aduersarijs cōferamus, sigillatim ab ijs obiecta crimina diluam⁹.

Refutata
singulæ
crimina-
tiones.

Magiam
que hære-
sis.

Magam atque hæreticam appellarunt, sanè vt vlttricibus flammis digna ipsorum iudicio videretur. At quæ in eius vita horum suspicio? quod subsidio Galliæ misfam se diuinitus dicebat, quod supra puellæ vires, supraq; muliebres animos imò supra viros multa gerebat: quod arma tractare, bellare virili habitu, iussam se à Deo confirmabat? Quodnam hîc hæresis aut magiæ vestigium? Nempe, inquiunt, mādāta ista, aut à se conficta, aut à dæmone profecta, Deo adscribebat: Deum cuius est ea lex Deuteronomij 22. *Mulier non induetur veste virili*, mētiebatur virilem vestē sibi mulieri virgini imperasse. Deus bone! hæccine ingēntia illa crimina propter quæ illi pereundum fuit? Certè hæc ipsa sunt quæ historia testis antiquitatis renūciat ab eius inimicis dissipata in vulgus fuisse, quò in hæresis, magiæ, aut sortilegij suspensionem eam vocarent. Ac de veste quidem virili seorsim paulò post à nobis dicetur: libet antea de eius missione (quoniam id rei caput est) rebusque

supra humanum morem ab ea gestis respondere.

Prædicabat Ioanna se Carolo septimo, cuius in Gallia per externum hostem, iniquissimo loco res erant, diuinitus subsidio missam: Negarunt ij, qui tum aut Carolo inimici noluerunt de ea istud credere, ne de se credere cogerentur, diuinitus se regno Galliæ exturbari: aut de Ioannæ ipsius gloria non potuerunt, ignoratione aut maleuolentia impediti, tam magnificè cogitare. Vtra verior oratio est? Illiusne quæ eius qui secū loquebatur sensum habere & scientiam potuit, an eorū qui animi sui coniecturis & perturbationibus obsecuti, seipso alieni facti iudices stauerunt? Quāto incorruptius ij qui rem vestigijs indagantes, ex integerrimis puellæ moribus, ex eius studijs, ex castimonia, quam & seruabat ipsa, & alijs suo aspectu aspirabat; ex consiliorum eius felicitate ac prudentia, ex præsentione rerum futurarum, ex alienarum cogitationum perspicientia, ex miraculis, ex iudicijs prudē-

tum, ex publico Galliæ sensu, ex diuino hostium terrore, ex rerum euentu, alijsq; id genus indicatijs diuinum hîc quidpiam agnouerunt?

Gerson quidem, sapiētissimus illa ætate grauissimusque almæ Vniuersitatis Parisiensis Doctor & Cancellarius, Christianæ huius Amazonis coætaneus, quique Confessario Caroli VII. Francorum Regis tractatum inscripsit de considerationibus quas debet habere Princeps, in defensione huius virginis, tractatu cui titulus est, *De mirabili victoria cuiusdam puella, de post fœtantes receptæ in Ducem belli exercitus Regis Francorum contra Anglicos*, multa in rem præfatus, ita statuit: *Concludendum est tandem ex præmissis, quod piè & salubriter potest de pietate fidei & deuotionis sustineri factum illius puella.*

Benè habet, quòd iudicium tenemus tanti viri. At cedo quæ sic iudicandi causæ illi fuerint. Principiò, rei totius iustissimus finis, eiusdemque fœlicissimus euentus.

Sustineri, inquit, factum id potest circumstantijs attentis cum effectu patenti preferatim ex causa finali quæ iustissima est, scilicet restitutio Regis ad regnum suum, & pertinacissimorum inimicorum suorum iustissima repulsio seu debellatio. Deinde, in suscipiendis gerendisque rebus integritas. Addito, inquit, quod in observationibus suis hæc puella non reperitur uti sortilegijs, ab Ecclesia prohibitis, neq; superstitionibus palam reprobatis, neq; cautelis hominum fraudulentis, neq; ad quæstum proprium vel aliquid tale subdolum, cum in attestationem suæ fidei exponat extremo periculo suum corpus. Hæc cene igitur aut maga aut hæretica? Nec ignarus quā multi multa de hac integerrima virgine peiorem in partē spargerent, Si multi, inquit, multa loquantur & referant pro garrulitate suā & leuitate aut dolo sitate, aut alio sinistro favore vel odio, subuenit illud Catonis,

Arbitrij non est nostri quid quisq; loquatur.

Re sic ex causis euentisque bellè constituta, iterum eam ex circumstantijs disceptat magnis certè diuinæ missionis argumentis. Earum prima est, quòd Regi Galliæ, Ducibusque eius ac Principibus persuadere potuit, vt se belli Ducem, viri fœminam, principes pastoritiam puellam sequeretur, præsertim formidolosissimo Galliæ tēpore cui nisi diligentissimè prouideretur de re Gallica actum videri potuit. *Iungantur, inquit, ad causam nostrā istæ circumstantiæ; Vna quòd consilium Regis & gentes armorum potuerunt induci ad vocem illius puella taliter credere & obsequi quòd sub ea vel cum ea exposuerint se conspirato animo ad bellica pericula, dedecore omni procul pulso, quod euenire poterat si sub vna muliercula militantes victi fuissent per hostes procacissimos & irrisi apud omnes qui audissent.*

Altera est popularis exultatio quocunque puella aduentasset. *Altera, inquit, quod exultatio popularis, cum pia credulitate, tanta subsequi cernitur ad laudem*

Dei & hostium confusionem.

Tertia, terror eius aduentu, hostium animis sese insinuans, Deo nimirum, qui animis præsidet, intus terrefaciente. *Tertio*, inquit, *quod latentes inimici etiam magni, referuntur in timores varios imò & in languores quasi parturientis cecidisse, iuxta imprecationem cantici illius à Maria sorore Moysis tympanizati in choro ludentium; Cantemus Domino gloriosè, &c. irruat super eos formido & pavor.*

Quarta circūstantia, prudentia temeritatis expers, *Ponderandum est*, inquit, *quod hæc Puella & adherentes sibi militares non dimittunt vias humanæ prudentiæ, faciendo quod in se est, quod appareat (nempe cum id non fit) tentari Deus ultra quàm necesse est.*

Quinta, Puellæ modesta sapiëntia, non superba, & pertinax; *Constat*, inquit, *hæc Puellam non esse pertinacem in adhesionem proprii capitis, ultra quàm à Deo habere se monitiones seu instinctus.*

Sexta, certa explorataque eius à teneris

probitas. *Possent, ait, super addi multa circumstantia de vita eius à puero, quæ interrogata sunt & cognita diu & multum & permultos, de quibus hic nihil inseritur.*

Septima, exempla antiquitatis. *Exempla, inquit, possunt induci de sancta Barbara & de Diua Catharina in conuersione non minus miraculosa Rhetorum, & alijs multis, ut de Iudith & de Iuda (Machabæo) in quibus, ut communiter, miscetur semper aliquid naturale.*

At enim, si missa erat diuinitus, cur nō prosperè semper cum ea est actum, qui factū est ut in potestatem veniret hostiū à quibus capta, damnata, tandem exusta est? Scribebat Gerson antequam re ipsa hæc euenissent; vidit tamen vir in rebus humanis earumque à Deo cōuersione exercitatus, posse re ipsa eiusmodi aliquid euenire, quod ne hominum animos, cū euenisset, de istius Puellæ diuina electione, missioneq; malè dubios faceret, hac oratione anteuertit. *Neg, sequitur, inquit, semper post primum miraculum quidquid ab hominibus*

*hominibus expectatur vel expectabi ur. Præterea si frustraretur ab omni expectatione sua & nostra (quod absit) prædicta Puella , non oportebit concludere , ea quæ facta sunt , à maligno spiritu vel non à Deo facta esse ; sed vel propter nostram ingratitude vel blasphemias , aut aliunde iusto Dei iudicio licet occulto , posset contingere frustratio expectationis nostræ in ira Dei , quam auertat à nobis & benè omnia veritat. Et quidem , an ideo Iudas Machabæus , diuinitus ad suæ gentis salutem excitatus non est , quia hostium manu dolisque in acie occubuit ? aut quia Samsonem eadem quæ Philistæos ruina obruit , minus ideo Christi morientis figuræ , minus ipse Deo carus fuerit ? Sæpè magnis viris violenta inter hostes gloriosior mors fuit , quàm domi dulcis fuisset , inter , hinc parentes , hinc liberos . Sed & magni parique multa humanitus omnes peccamus , quæ honestè suscepta mors illa expiat . Certè , genus id mortis , vita martyrum est . Rectè denique Gerson , *A Domino factum est**

istud, & est mirabile in oculis nostris. Psal. CXVII.

Coniūgam Gersoni scriptori illius seculi, scriptorem eiusdem ætatis alterum. Is est Magister Henricus de Gorckeim, ex quo rerum istarum perhonorifica narratio ante posita est, in qua præfatus puel- lam istam asseruisse se à Deo missam, subiungit. *Ne autem ipsius assertio putetur temeraria etiam signis supernaturalibus utitur, sicuti reuelare occulta cordium, & futura contingentia prævidere.* Etiam illa addit, *Cum in equo esset, militare vexillum præferens,* (Nos autem ex historia didicimus vexillum illud Christi effigie imprefsum, Iesu & Mariæ nominibus inscriptū fuisse) *tunc ipsam quidem mirifica armorum scientia viguisse, eius verò copias militari alacritate compleri solitas, hostes timore dissolui: vixisse autem à teneris castè ac piè.* Hæccine verò sunt magiæ indicia?

At enim, cur militari tempore atque habitu maiore erat vi ac scientia? Respō- debo eius verbis in collatiuo opere de

hac puella militari, quod Gersoni ab aliquibus ascriptum Gersoniano superiori tractatui proximè anteit. In eo, propositione sexta, *Nec mirum*, inquit, *si in statu equestri sit alterius luminis, quàm in solito statu muliebri, quia etiã David volēs Dominũ cõsulere, induebat Ephod, & sumpsit psalteriũ, & Moyses dum virgã gestabat, mirabilia faciebat, quia (sicut dicit Gregorius) Spiritus sanctus frequenter se interius conformat exterioribus concurrentibus.* Idem ipse propositione quinta eiusdem operis. *Ad nutum*, inquit, *habet hæc puella usum donorum supernaturalium, in manifestando occulta, & prænunciando futura, suo ministerio deseruiencia, prohibendo insuper fieri occisiones & cætera vitia, exhortando ad virtutes & cætera probitatis opera, in quibus Deus glorificatur. Sicut ergo in spiritu Dei præmissus est Ioseph ante patrem, & fratres in Ægyptũ, & Moyses ad populi Israël liberationem, & Gedeon, &c. Pari modo hanc iuuenulam non est incongruum connumerari ho-*

nis specialiter à Deo missis, praesertim cum nec munera quærat & ad bonum pacis tota deuotione laboret: hoc enim non est opus mali spiritus qui potius est author dissensionis quàm pacis. Et propositione quarta; Sacris consonat literis per fragilem sexum, & innocentem aetatem exhibitam à Deo fuisse populis & regnis latam salutem. Hæc propositio patet, quia teste Apostolo Deus eligit infirma mundi ut fortia quæq; confundat. Hinc exemplariter procedendo legitur de Delbora, Hester, & Iudith, impetratam fuisse populo Dei salutem, & Daniele in pueritia suscitatum ad liberationem Susanne. Sic David in iuuentute Goliam prostravit. Nec immeritò quia hoc modo fit evidentior diuina pietatis affluentia, ne homo suis viribus adscribat sed Deo potius gratiarum actiones referat. Sic enim per humilem virginem totius generis humani redemptio orta est. Igitur &c.

At enim liberabo etiam eam criminibus magiæ & hereseos, verbis ijsdem quibus apud Meyerum cōtemporaneus vir-

gini Anonymus latinus scriptor eam liberat. Est verò illius hæc oratio. *Compendiū ab Anglis obsidetur, Puella eruptionem facit, & capitur, ducta Rothomagum ubi tunc erat Rex Henricus adolescens. Petrus Cauchon Bellouacorum tunc erat Episcopus Consiliarius precipuus Regis Angliæ. In eius diœcesi quoniam capta puella erat, conuenit ut ipse inquisitionem faceret de Puella quam maleficam esse per inuidiam insimulabant & hereticam. Quæstio habitata à multis Theologis & Iureconsultis Lutetia euocatis: per multos dies interrogationes & responsa ab tabellionibus diligenter conscripta. Admirationi omnibus erat, quod puella rusticana de fidei rebus tam sapienter, tamq³ Catholicè loquebatur, & respondebat. Hoc autem inquisitores (qui Anglicæ erant omnes factionis) curabāt, ut callidis, versutis, & fucatis verbis, & inquisitionibus & interrogationibus captiosis, sanctam Christi virginem caperēt, & de heresi accusarent: sed non potuerunt. Data sunt illi à Domino verba quæ loque-*

Anony-
mus de
Ioanna
virgine.

retur, nec spiritui eius qui loquebatur potuerunt resistere.

Prodit
pudoris
calumnia
diluta.

Commodè autem idem prodiu pudoris calumniam diluit his verbis. *Insuper Angli per obstetrices suæ etiam factionis inspicere curabant virginem. Nec mulieres illæ quamvis maximè cuperent, ac virgini grauissima hostes essent, aliud potuere affirmare quàm quod intemerata claustra virginalia seruata in illa reperirent. Dicitur enim suam integritatem Deo vouisse, cum adhuc patris sui gregem in agris pasceret, quibus in agris ad eam religionem erat addicta ut quoties sonitum audiret campanæ de consecratione Corporis Domini religiosissimè prosterneret se in terram, diu multumq; orans, laudans, ac benedicens Deum. Hæc ille.*

Meyero pudicitiam Ioannæ defendenti astipulantur quamplurimi integræ fidei viri superius adducti, è quorum numero minimè omittendus est Papirius Massonus qui lib. 4. annal. in Car. VII. refert Ioannem Comitem Dunensem (qui

sub Ioanna militauerat, vt testatur Theuetus in eius vita) *super eius pudicitia iubente Calixto Pontifice interrogatum respondisse, nullum à quoquam nisi castæ & pudicæ modestæq; virginis signum in ea deprehensum: idemq; affirmasse alios magno numero productos testes idoneos & omni exceptione maiores.* Nouissimè autem P. Ioannes Candela Soc. IES V, in cap. 2. discurs. 13. de felicitate & bono status virg. asserit, *præfatam Ioannam virginem quã Amazonem Gallicam nominat, & magnoperè commendat, ideò à Deo ad restituendum Gallicum regnum fuisse electam, quod Virgo castissima esset.*

An verò illa libidine arderet, de qua Belleforestio teste in Carolo VII. audiebantur commemorare Duces ac milites, eos qui cum illa versarentur, quiue oculos in eam intendissent, non solum nullo tãgi libidinis sensu, sed veneratione quadam compleri solitos, quasi in ea quiddã homine augustius cernerent.

Mirabilis
Ioannæ
castitas
eiusque
corporis
integritas

Hoc & de eadem ad ipsius corporis in-

tegritatem probandam ab eodem Belleforestio asseritur, eam communi mulierum morbo obnoxia minimè fuisse, sed prorsus ab eo liberam.

Virilis habitus excusatio.

Vera mortis puellæ causa, hostilibus inuidia.

De virili habitu mox dicā. Nunc anonymi illius apud Meyerum breui oratione respondebo. *Virilem*, inquit, *habitum excusauit, ne scilicet militum incontinentia pronocari in illā posset, si fæmineo vasa fuisset habitu.* Vnde igitur mors innocentis? ab odio atque inuidia. Synchronus quanquam anonymus. *Vna nihilominus omnium Anglorū sententia erat, & vox vulgaris, nunquam se posse fœliciter cum Gallis dimicare aut victoriam reportare, quamdiu Puella illa, quam veneficam & sortilegam vocabant, viueret. Tollendam esse de terra. Hostes eius iudices erant. Pars eius aduersa qui eam accusarat, tulit sententiam. Squalore carceris & inedia eam macerabant. Ferunt eam tandem ab iudicibus adductam ut si vellet abiurare reuelationes quas assererat sibi factas, eam absoluerent, & abire permetterent; quod fecisse*

cisse eam tradunt: sed cum tamen non dimitteretur, valde increpitam fuisse se dixisse, quod reuelationes abnegasset; Iterum sibi in carcere apparuisse scilicet Diuam Agnetem, Margaritam & Catharinā, ab illisque quod hoc fecisset obiurgatam. Hæc fuit causa mortis Dicebant hostes eius qui iudices erant, relapsam esse in abiuratā heresim, adduxerant enim eam ut iuraret se ultra non dicturam sibi reuelationes factas esse. Data brachio seculari Rothomagi combusta Collecti cineres vniuersi & de ponte in Sequanam demersi, ne quid forte reliquiarum seruari aut coli possit.

Reuelationes Ioannæ hæc.

At dicet aliquis, Virum veste mentita est, virili veste mulier in castris versata est, virilem vestem Deo mulieri prohibente. Hoc igitur illud crimen est quod morte est in eam vindicatum? Atqui nemo in historia scribenda tam fuit impudens, qui sexum eam mentitam esse diceret: semper virginem puellā, semper foeminam præ se tulit: viro similis cum ad fortia virorum facta in aciem pugnamue descen-

Ioannæ virili veste non viū mentita sed Deo obsequuta.

deret, reuerſa ad muliebrem cultum, vbi militari opera opus non fuit.

At in bello ſaltem violata fuerit ab ea diuina lex. Enimuero vnde id poteſteſſe conſequens? Capeſſit arma ſolo Dei iuſſu, cui ad arma, virorum inſtar, vocare eam placuit, ab eodem ſummo imperatore Deo, ad viri interim ſpeciem veſtemque vocata eſt. Sic enim à Deo ſibi præſcriptū ſanctè teſtata eſt; ſic Hiſtorici nobis ab ea acceptum tradiderunt.

Nouo more geſtum id ab ea imperatumque eſt à Deo fateor; at repugnante Dei lege factum inficior. Nam de vetere ac Moſaica lege quod adducitur, id non efficit, vt ſi quando Deus, ſi qua temporis periculiue vitandi neceſſitas, ſi qua aliquid gerēdi neceſſaria atque honeſta lex, huiuſmodi mutationem veſtis imperet, mutari honeſtè non poſſit. Turpitudini lex illa atque impietati reſiſtit, non religioni & honeſtati.

Itaque grauis in Theologia Doct̃or Ioannes Gerſo, Ioannæ hoc factum triplici,

ut vocat, veritate defendit.

Prima est, *Lex vetus*, prohibens mulierem uti veste virili, & virum veste muliebri, pro quanto est purè iudicialis, non obligat in noua lege, quia secundum veritatem tenendam de necessitate salutis iudicialia antiquæ legis ablata sunt, nec obligant in noua, ut talia sunt, nisi nouiter per superiores ea institui seu confirmari cōtingat.

Secunda veritas, *Lex huiusmodi* continebat aliquod morale, quod stabile est in omni lege, & illud possumus exprimere prohibitionem indecentis habitus, tam in viro quàm in muliere contra medium virtutis, quod obseruare debet circūstantias omnes, ut quando oportet, cur oportet, qualiter oportet, & ita de reliquis ut sapiens indicabit.

Tertia veritas, *Lex huiusmodi* nec ut iudicialis nec ut moralis damnat vsum vestis virilis & militaris in puella nostra virili & militari, quam ex certis signis elegit Rex cœlestis omnium, tanquam vexilliferam ad conterendos hostes iustitiae, & ami-

cos subleuandos, ut in manu fœmina puel-
laris & virginis confundat fortia iniqui-
tatis arma auxiliantibus Angelis, quibus
virginitas amica est & cognata secundum
Hieronymum, & in sacris historijs frequen-
ter apparuit, sicut in Cœcilia visibiliter cū
coronis ex rosis & lilijs. Rursus per hoc sal-
uatur attonsis crinium, quam Apostolus
prohibere videtur in fœmina.

Obstruatur ergo & cesset os loquentium
iniqua, quia ubi diuina virtus operatur,
media secundum finis exigentiam dispo-
nuntur, ita ut iam non sit securum detra-
here, vel culpæ ausu temerario; ea quæ à
Deo sunt, secundum Apostolum ordinata
sunt. Deniq; possent particularitates addi
multæ, & exēpla de historijs sacris & gen-
tilium sicut de Camilla & Amazonibus.
Sicut præterea in casibus vel necessitatis
ueleuidentis utilitatis, vel approbatæ con-
suetudinis, vel ex auctoritate seu dispen-
satione superiorum. Sed ista pro breuitate
sufficiant & veritate. Tantummodo ca-
ueat pars habens iustam causam, ne per in-

credulitatem, & ingratitude, vel alias iniustitias faciat irritum diuinum tam patenter & mirabiliter auxilium inchoatum, prout in Moyse & filiis Israhel post collata diuinitus tot promissa legimus contigisse. Deus enim etsi non consilium, sententiam tamen mutat pro mutatione meritorum. Hæc Gerfo.

Pereruditè autem Lyranus ad illud capituli 22. Deuteron. *Mulier non induetur veste virili, &c.* Hoc, inquit, exponunt Doctores aliqui, & benè, ut credo, quòd hoc intelligitur de armis quibus viri utuntur; (id verò ille ex Hebraica lectione cōprobat) Prohibetur autem in dicto cap. quod mulier non portet arma viri, tum quia indecens mulieri & presumptuosum: tum quod pro tunc erat superstitiosum, quia gentiles mulieres in sacris Martis, portabant arma viri: & in sacris Veneris, viri portabant ornamenta mulierum & instrumenta earum, utpote colum, fuscum, & similia: ideo subditur abominabilis est apud Deum qui hoc fecit. Abominatio

enim in sacra scriptura communiter capitur pro idolatria, seu pro aliquo ad idolatriam pertinente. Si autem prædicta litera intelligatur de veste communi, prohibetur, hic talis usus, vel potius abusus, quia est occasio libidinis, quia mulier in veste virili posset licentius cum hominibus luxuriam exercere: & similiter vir in veste mulieris, quia liberius posset secreta mulierum ingredi. Hæc hæcenus ipsissimis verbis Nicolaus de Lyra.

Paria Cardinalis Cusanus libro secundo exercitationum in sermone, Ibant Magi.

Nauarrus item enchiridij cap. 23. num. 12. *Nullatenus etiã peccare ait, sceminam qua veste virili se vestit, nec virum qui scemineæ, iusta de causa velutine ab inimicis agnoscat, aut quia alia veste caret, vel ob honestam sui aut alterius oblectationem secundum S. Thomam, neq; plusquã venialiter si ob lenitatem hoc faciat absq; fine & circumstantia mortali, iuxta Caietanũ in 2. 2. q. 169. artic. 2. ad 3.*

Quibus rationibus & autoritatibus permotus Philippus Camerarius Iuriscōsultus, & Reip. Noricæ à consilijs, *Ioannam ob susceptum habitum virilem iure excusandam censet*, cap. 17. libri quarti, tertij voluminis meditationum historicarū. Nec obest canon si qua mulier 6, 30. dist. *Si qua mulier suo proposito*, inquit, *utile indicās ut virili veste utatur*, propter hoc *virilem habitum imitetur*, anathema sit. *Perspicuum enim est propositum illud mulieris non pietatis esse propositum sed luxurie.* Glossa in illo canone propositū suum scilicet mulieris explicat, *quia magis est habilis & magis parata in scissa veste quā in clausa ad meretricandum*; Cum malus ergo est animus, vestis mutatio mala est, non ipsa sola mutatio, maximè si consuetudo sit, ut mulier certo habitu virili uti possit. Quemadmodū in cap. 2. de testam. refertur de Abbatissis quæ habentur pro monialibus quæ tamen non induerant habitum monachalē, sed in vestibus quibus utebantur loci illius presbyteri per-

manferant. Quid, quòd Vlpianus Iurif-consultus in l. vestis 23. §. vestimenta omnia ff. de aur. & arg. leg. constituit alia esse vestimenta virilia, muliebria, puerilia, alia his communia quibus promiscuè utitur mulier cum viro; veluti si eiusmodi penula palliumque est & reliqua huiusmodi quibus sine reprehensione vel vir vel vxor, seu mulier vtatur. Reprehensionem ibi definit ex vsu non recepto, quare vsus ipse, vel honesta vel inhonesta facit vestimenta.

Quod verò mulier sine peccato virile habitum deferre possit, necessitate aut rationabili causa inducta tenet etiam Beatus Thomas in summa 2. 2 q. 169. art. 2.

Plores vir-
gines quã-
bis virili
vestitu in-
duta: et
men lau-
de dignis-
sime.

Neque verò Ecclesia ideò minus inter sanctas & Deo acceptas, laudeque ac veneratione dignas habuit Theodorā Alexandrinam, quæ diu in monasterio sub monachi nomine & vestitu latuit pœnitentiam agens, & Deo seruiens, vt ait Marcus Marullus lib. V. de religiosè viuendi institutione. Marinam virginem natione Græcam

Græcam scribit Volateranus sexum dissimulasse honesta de causa, ut admitteretur in cœnobium, quo soli viri recipiebantur, ubi ad mortem usque sanctissimè vixit nomine Marini. Fecere eadē Euphrosyna virgo Alexandrina, Pelagia Antiochena aliæque sanctimonix laude commendatæ.

Deniq; ut istius puellæ acta institutaq; à Deo illi præscripta, Deo accepta fuisse credā, duo me præterea magnoperè inducūt. miracula diuina, & diuina humanaq; in eius hostes atque iniquos iudices ultio.

Ioannæ
miracula
inq; eius
hostes di-
uina hu-
manaque
ultio.

Miracula: Nam ut taceam quod ipsa per se magnum & insigne miraculū fuit, duo præcipuè memorantur. Primum est, fuscitatus ipsius precibus puer mortuus. Valerandus Varanius sub finem lib. quarti de gestis Ioannæ virginis egregiæ bellatrix, & Anglorum expultricis meminit, his versibus.

Puer sus-
citatus
precibus
Ioannæ

*Cumq; Latiniaci prodisset matris ab aluo
Exanimis fœtus, multis comitata puellis
Virgo subit tēplū, & corā puoluitur aris,*

*Vt redeant gelidos vita spiracula in artus:
Vagit & ora mouet, baptismaq; suscipit
infans.*

Cor Ioan-
næ inuen-
tum est in
medijs ci-
neribus
integrum
& plenum
sanguine.

Alterum est cum iam cadauer puellæ depastus esset rogos, inuentum illius cor integrum atque illibatum. Cecinit hoc idem.

*Postremò enituit pietas in morte puellæ:
In cinerē cunctos dñs flāma resoluerat artus
Illasq; cor habet venas (mirabile dictu)
Nec synceri animi temerāt incēdia sedem.
Albaq; tum visa est orbi prodire columba,
Et petere athereos multis spectātibus orbes.*

Diuina humanaq; in hostes ultio. Primum, res Anglicæ ante puellæ mortem turbari cœptæ, post tam iniquam & crudelem necem, conspicuè in deterius labi sunt visæ: Burgundionem, qui maximè Anglis aderat, pœnituit rerum antea ctarum, illoque Anglos deferente Lutetia Carolum Regem admisit: reliquæ ciuitates Parisiorum exemplū sunt secutæ, paucorumque annorum spatio Carolus represso, victo, expulsoque Anglo; res suas

è calamitosis prosperas, è desperatis certas, ex abiectis florentissimas vidit, vt refert Papirius Massonus lib. 4. annal. in Car. VII. Meyerus autem lib. 16. *Tādem Galli, inquit, Rothomago potiti sunt, victis extrusisq, ubiq, Anglis, quibus omnia cessere infelicitè, postquā virginem illam Ioannam, diuinitus missam tam fædo supplicio necassent: nam & in Scotia bis eodem tempore fuere victi, &c.*

Causa infelicitatis Anglorū.

Deinde rescissa est doctissimorum hominum responsis supremaque Ecclesiæ authoritate, iniqui in eam iudicij sententia.

Martinus Delrio secundo tomo magicarum disquisitionum lib. quarto, cap. primo, quæstione tertia, sectione sexta, proposita regula septima qua veræ reuelationes à falsis dignosci queunt, nempe si ex omni parte, etiā vsque ad minimam propositionem sint veræ, eueniantque omnia ita vt prædicuntur. *Hinc probantur, inquit, diuina fuisse reuelationes Ioanne illius virginis Lotharingica qua di-*

Diuinæ reuelationes Ioannæ factæ.

et a Gallis La pucelle Ieanne quæ Carolum VII. Francorum Regem in regnum unde Anglorum fuerat armis deiectus restituit circiter annum millesimum quadringentesimum vigesimum octauum, quam pari inuidia, crudelitate, calumnia, & iniustitia, sæpè ab illa victi profligatiq; Angli cū in pugna viuam cœpissent, flammis ferilibus quasi maleficam combusserunt. Sed postmodum anno 1456. Calixtus Romanus Pontifex, aut iuxta alios Pius secundus causæ cognitionem Archiepiscopo Rhemensi Ioanni, & Guillelmo Parisiensi delegauit, his verò innumeris testibus omni exceptione maioribus de innocentia, modestia, castitate & religione Ioannæ auditis, eius innocentiam & sententiæ illius iniustitiam declararunt. Iudicij acta Parisiis asseruari ea in urbenatus Papyrius Masson testatur; idq; apud Victorinos Canonicos regulares iuxta Belleforestum in vita Caroli VII. fauent eiusdem innocentie non Franci modò scriptores, quos ut suspectos Britanni reijciunt, sed & alienigenæ Itali,

Innocentia Ioannæ & iniustitia sententiæ contra eam lata declaratur à iudicibus S. A.

Graciq, sed & Belga Meyerus lib. 16. annal. Fland. parum aliàs in Francos benignus. Et Hispanus Mariana de reb⁹ Hisp. lib. XX

Denique qui eam iniquè traduxerant, damnauerantque, alij diuinitus turpi aut repentina morte affecti, alij etiam hominum sententia probrosè & effossi & exusti sunt. Valerandus Varanius Theologus Parisiensis.

Nec superi voluere ignes impune relictos.

Medeus siquidem longo sermone profatus Medeus punitur.

Astruit esse scelus flāmis & morte piādum,

Multaq, adulādi studio cōfinxit ut Anglos

Sic sibi conciliet: sed paucis inde diebus

Corpus tabifico respergitur ulcere lepræ.

Alter in immundo reuolutus stercore vitā Guilelm⁹ Estiuetus promotor contra lo-

Finijt: arguerat plerunq, in carcere ficti annam po-

Criminis insontem, pendenti lite puellam. stea punitur.

Sic & Calceonus, qui cēsuit esse cremandā, Petrus Calceon⁹ punitur.

Pédula dum tonsor secat excremēt a capilli,

Expirans cadit & gelida tellure cadauer

Decubat, ultrices sic pēdūt crimina pœnas.

Tandem collatis patres ultroq, citroq,

*Articulis, flāmas sub iniquo iudice passam
Darcida concordi decernunt ore: modūq;
Angligenas violasse fori iurisq; tenorem.*

Delrius loco proximè indicato. *Philippus Bergomensis*, (nos autem huius *Philippit* testimonium fuisse ante produximus) ait tum duos adhuc ex iniquis *Joanna* iudicibus fuisse superstites citatos, & legitime conuictos, damnatosq; & combustos, duorum verò aliorū iudicum mortuorum ossa effossa, & similiter concremata fuisse, & iussu Rothomagi, ubi virgo fuerat cōbusta, templum cōstrui, & ex reliquis prædictorum bonis, quæ per sententiam confiscata fuerant, ibidem ad Dei honorem & defunctæ propitiationem sacrificium quotidianum institui, sic honor immeritæ detractus tandem vix vicesimo post mortem anno iudicio Pontificio restitutus.

Cuius iudicij summa est habenda ratio propter authoritatem Sedis Apostolicæ, quæ omnes iudicat, & à nemine iudicatur, can. cuncta per mundum 9. q. 3. Quod si res iudicata à secularibus iudicibus pro

veritate accipitur vt ait Vlpianus in l. ingenuum ff. de stat. hom. & in l. res iudicata. ff. de reg. iur. multo magis iudicium à summo Pontifice prolatum qui Christi vicarius est cap. quanto de trāslat. ep. longè æquissimum est cēsendum, quod idem de Delegatis à summo Pontifice dicendū est, præsertim cum illius vices gerant cap. sanè. 2. de off. iud. deleg. & tum Pontifex tum ipsi legitima authoritate vtētes non hominis sed Dei iudicium exerceant, cap. 19. libri secundi paralipom.

Sed quàm attentè & grauiter, quantaque disquisitione & diligentia, ad laborante Carolo VII. spectati prudentia & religione viri, incubuerint ad causam Ioānæ cognoscendam; quàm religioso ac celebri iudicio, cōperta eius innocentia, damnationis eius acta resciderint, testes nobis sunt huius historiæ scriptores, præsertim illius temporis; testis sententia ipsa, quæ pro innocēte solemni ritu ac cæremonia pronunciata est. De Scriptoribus autem illius temporis placet illo potissimum vti,

Iniquæ in
Ieannam
sententiæ
diligens
recogni-
tio.

latino anonymo, ex quo rem describit Meyerus: & placet ideo, quòd vnus fuit ex ijs quos Carolus VII. de Ioannæ causa consuluit, quique lectis pronunciati in eā iudicij actis, cognitisque criminationum causis omnib⁹, libellos de re tota suæ sententiæ indices ad eum dederunt, verba illius hæc sunt. *Postquam Normānia pulsis Anglis in fidem rediisset, vidimus eius processum & examinauimus: ex quo quidē processu, non sufficienter constabat, ipsam de alicuius erronei dogmatis contra veritatem doctrinæ Catholica assertione conuictam, vel in iure confessam: & per hoc heresis, atq; relapsus satis manifestè fuisse fundamentum: quāquam enim præter hoc poterat processus huiusmodi ex multis capitibus argui vitiosus, corā capitalibus inimicis, sæpè per eā recusatis, denegato etiam ei omni consilio, quæ simplex puella erat, factus, & habitus: quem admodū ex libello quem desuper ab eodem Carolo, expetito à nobis consilio edidimus, si cui ad cuius venerit manus legere vacauerit: latius poterit*

Processus
seu causa
Puellæ à
Gallis re
tractata.

Libellus
anonymi
de puellæ
innocētia

rit patere. Pulsis enim de Normannia Anglis, idem Carolus Rex per plures regni sui prelatos, & diuini atq; humani iuris Doctos homines diligenter processum prædictum examinari & discuti fecit, & de ea materia plures ad eum libellos conscripserunt, quibus coram certis, à Sede Apostolica ad cognoscendum & iudicandum de huiusmodi materia, iudicibus delegatis, exhibitis & maturè perlectis per eosdem iudices in sententiam quam prædiximus extitit condescensum. Et sententia contra eam data sub Anglorum imperio cassata & reuocata.

Sententi
Anglorū
legitimè
& reuocata

Postea subiicitur ab eodem. Missa erat à Deo Puella ne quis ponat carnē brachiū suum. Ne Anglorum superbia suis nimium fideret viribus. Gloriabantur in suis viribus. Deo non attribuebant suas victorias. Ostendere illis Deus voluit, quod stultè & impiè fecerunt suis duntaxat fidentes viribus, & victoriam ostendit in sexu fragili, sicuti in Delbora, Iudith, Hester. Hæc & plura de virgine ille anonymus Synchronus Puella.

Denique, sanctissimo iure atque ordine dicta pro innocente ab Apostolicis iudicibus sententia, quæ asseruata in thesauro sacrosanctæ Capellæ Palatij Regij Parisiensis vt à me diligenter ibidem inspecta, sic fideliter à me hic reddetur.

IN NOMINE SANCTÆ ET INDIVIDUÆ TRINITATIS, PATRIS ET FILII ET
spiritus sancti. Amen.

Delegato
rum ab
Apostoli-
ca sede de
Ioannæ
innocentia
sententia
atque au-
thoritas.

Æterne maiestatis prouidentia Saluator Christus Dominus Deus & homo beatum Petrum, & Apostolicos successores, ad suæ militantis Ecclesiæ regimen instituit speculatores precipuos, qui luce veritatis aperta, iustitiæ semitas incedere docerent, uniuersos bonos amplexantes, releuantes oppressos, & declinantes ad deuia, per iudicium rationis, reducentes ad vias rectas. Hac autem authoritate fungentes, in hac parte nos Ioannes Remensis, Guilielmus Parisiensis, Richardus Constantiensis Dei gratia Archiepiscopus, & Episcopi: ac Ioannes Brehal de ordine fratrum Prædicatorum, sacre Theologiæ Professor,

heretica prauitatis in regno Franciæ alter inquisitor, iudices à sanctissimo Domino nostro Papa moderno specialiter delegati. Viso processu coram nobis solemniter agitato in vim suscepti per nos reuerenter mandati Apostolici nobis directi pro parte honestæ viduæ Isabellæ Darc olim matris, ac Petri & Ioannis dictorum Darc fratrum Germanorum, naturalium & legitimorum bonæ memoriæ Ioannæ Darc vulgariter dictæ la Pucelle defunctæ, suorumq; parètum nominibus actorum. Contra & aduersus inquisitorem heretica prauitatis in Diocesi Beluacensi constitutum; contra promotorem negotiorum criminalium Episcopalis curiæ Beluacensis, nec non contra Reuerendum in Christo patrem dominum Guilielmum de Hellenda, Episcopum Beluacensem, ceterosq; uniuersos & singulos sua hac in parte interesse credentes respectiue, tam coniunctim quam diuissim reos. Visa imprimis peremptoria euocatione, & executione eiusdem ad ipsorum actorum, simulq; nostri promotoris ex officio nostro in

hac causa per nos instituti, iurati, & creati instantiam, per nos decreta aduersus dictos reos visuros; rescriptum ipsum executioni mandari dicturos in, aduersus, respōsurosq₃, & processuros prout ratio suaderet. Visa petitione ipsorum actorum, factaq₃ rationibus conclusionibus eorum in scriptis redactis per formam articulorum concludentium, tendentium ad nullitatis, falsitatis, iniquitatis & doli declarationē, cuiusdam prætensi processus in fidei materia olim contra dictam defunctam in hac ciuitate per defunctos Dominum Petrum Cauchon tunc Beluacensem Episcopum, Joannem Magistri, Subinquisitorem prætensum in eadem diocesi, & Ioannem de Estiueto promotorem, aut pro promotore ibidem se gerentem, facti & executioni demandati, saltem ad eiusdem cassationem, & ad nullationem, adiurationem sententiarumq₃, ac omnium inde secutorum, & adeiusq₃ defunctæ expurgationem, & fines alios ibidem expressos. Visi quoq₃ sepius, perlectis, & examinatis libris originalibus,

*instrumentis, munimentis & actis, notu-
lis, & protocolis processus antedicti nobis in
vim nostrarum compulsoriarū literarum
à notarijs, & alijs traditis & ostensis, si-
gnisq; & scripturis eorum in presentia no-
strarecognitis, longaq; super eis cum dictis
notarijs & officiarijs in dicto processu con-
stitutis, & consiliarijs ad dictum processum
euocatis, quorum presentiam habere po-
tuimus, communicatione, ipsorumq; libro-
rum, & notarum abbreviatarum collati-
one, & cōparatione prehabitis. Visis etiā
informationibus preparatorijs tā per re-
uerendissimum in Christo patrem Domi-
num Guilielmum tituli sancti Martini in
montibus presbiterum Cardinalem sanctæ
sedis Apostolicæ in regno Franciæ tunc lega-
tum, vocato secum nobis inquisitore post
visitationem eorundem librorum, & in-
strumentorum eisdem presentatorum, quā
etiam per nos, & commissarios nostros in
huiusmodi processus exordio confectis. In-
spectis etiam & consideratis varijs tracta-
tibus Prelatorum, Doctorem & practi-*

corum solemniū, & probatissimorū, qui libris, & instrumentis antedicti processus ad longum visitatis, dubia elucidanda duxerunt, & ex eiusdem Reuerendissimi patris ordinatione & nostra editis, & compositis. Visisq; articulis & interrogatorijs prefatis pro parte actorum, & promotoris nobis presentatis, & post plures euocationes ad probandum admissis, attentisq; testium depositionibus, & attestationibus tam super cōuersatione, & egressu eiusdem defunctæ à loco originis, quam super examinatione ipsius in presentia plurimorum Prelatorum, Doctorum, & peritorum, & præsertim Reuerendissimi Patris Reginaldoli Archiepiscopi Remensis dicti tunc Episcopi Beluacensis metropolitani, Pictavis & alibi facta diebus iteratis, quam super admiranda liberatione ciuitatis Aurelianensis, progressuq; ad ciuitatem Remensem, & coronationem regiam, quam circa circumstantias ipsius processus, qualitates iudicium, & procedendi medium. Visisq; etiam alijs literis, instrumentis, &

munimentis ultra dictas literas: depositiones, & attestations in termino ad procedendum traditis & productis, præclusio- neq; dicendi contra huiusmodi producta: nostrog; deinde audito promotore, qui vi- sis eisdem productis dictisq; actoribus, ple- nariè se adiunxit, ac pro, & nomine officij nostri, præfata omnia iam producta pro sua parte reproduxit, ad fines in scripturis dictorum actorum iam expressis sub certis protestationibus, alijsq; requestis, & reser- vationibus, pro parte sua, & dictorum actorum factis, & per nos admissis unà cum quibusdam motiuis iuris sub breuibus scripturis valëtibus animum nostrum ad- uertere, per nos receptis; Postq; in Christi nomine in causa concluso, & die hodierno ad audiendum nostram sententiam assi- gnato. Visis maturèq; reuolutis, & atten- tis omnibus, & singulis superius expressis, unà cum certis articulis incipientibus, QVAEDAM FOEMINA, quos post dictũ pri- mum processum iudicantes prætenderunt extractos fore ex confessionibus dictæ Puel-

la defunctæ, & ad quamplurimas solemnes personas ad opinandum transmiserunt, & quos ante dicti promotor, & actores impugnarunt tanquam iniquos, falsos, & à dictis confessionibus alienos, & mendosè confictos multipliciter. De DEI vultu nostrum præsens prodeat iudicium, qui spirituum ponderator est, & solus reuelationum suarum perfectus est cognitor, & iudicator verissimus, qui ubi vult, spirat, & quandoq; infirma eligit, ut fortia quaq; confundat non deserens sperantes in se, sed adiutor eorum in opportunitatibus & tribulatione. Habitamatura deliberatione tam circa preparatoria, quam circa decisionem causæ, cum peritis pariter, & probatis, ac timoratis viris. Visiq; solemnibus eorum determinationibus tam in tractatibus magna cum reuolutione librorum editis, & compositionibus multorum; Visiq; opinionibus verbo pariter atq; scripto tam super forma, quàm super materia præfati processus traditis, atq; dictis, quibus facta dictæ defunctæ magis admiratione,

tione, quam condemnatione digna existimant reprobatorium, & determinatoriū contra eam datum iudicium, & forma & naturæ ratione plurimum admirantes, & difficillimum dicentes de talibus determinatum præbere iudicium, beato Paulo de suis reuelationibus propriis dicente, an eas in corpore, vel in spiritu habuerit se nescire, & Deo super hoc se referre. Imprimis dicimus, atque inslitia mediante decernimus articulos ipsos incipientes, Quadam femina in processu prætenso, & instrumēto prætenсарum sententiarum contra dictam defunctam latarum, descriptos fore, fuisse, & esse corruptè, dolosè, calumniosè, fraudulēter, & malitiosè ex ipsis prætensis processu, & confessione dictæ defunctæ extractos tacta veritate, & expressa falsitate in pluribus punctis substantialibus, & ex quibus deliberantium & indicantiū animus poterat in aliam deliberationem pertrahi, plurimasque circumstantias aggrauātes in processu, & confessione præfatus, non contentas, indebite adycentes, & nonnullas cir-

cunstantias releuantes & iustificantes in pluribus subticentes, formamq; verborum qua sententiam immutat, alterādo. Quapropter ipsos articulos, tanquam falsos, calumniose, dolosè extractos, & à confessione eadem diffformes cassamus, irritamus, & adnullamus, ipsosq; quos in adiecto processu extrahi fecimus hic iudicialiter decernimus lacerandos. Insuper alijs eiusdem processus partibus diligenter inspectis, & praesertim duabus prætensis in eodem processu contentis sententijs, quas lapsus & relapsus iudicantes appellant: pēsata etiam diutius qualitate iudicantium prædictorum, & eorum sub quibus, & in quorum custodia dicta Ioanna detinebatur; Visisq; recusationibus, submissionibus, appellationibus, ac requisitione multiplici, per quam dicta Ioanna ad sanctam sedem Apostolicam & sanctissimum Dominū nostrum summum Pontificem, se, omniaq; dicta pariter & facta ipsius, ac processum trāsmittere sepius & instantissimè requisivit, se, & prædicta omnia eidem submittendo; Attentiq; circa

dicti processus materiam quadam abiuratione prætensa, falsa, subdola, & per vim & metum præsentia tortoris & comminatio ignis crematione extorta, & per dictā defunctam minimè præuisa & intellecta: Nec non præfatis tractatibus, & opinionibus Prelatorum ac solemniū Doctorum in iure diuino pariter & humano peritorum, crimina dictæ Joannæ imposita in præfatis prætensis sententijs expressa ex serie processus non dependere, aut colligi posse dicentium, & multa elegantissimè de nullitate & iniustitia in hoc, & alijs determinantium, ceterisq; omnibus, & singulis diligenter attentis quæ in hac parte attendenda & videnda erant pro tribunali sedentes, Deum solum præ oculis habentes, per hanc nostram definitiuam sententiā quam pro tribunali sedentes ferimus in his scriptis. Dicimus, & pronunciamus, decernimus, & declaramus dictos processus & sententias, dolum, calumniam, iniquitatem, repugnantiam, iurisq; & facti errorem continentes manifestum cum abiuratione

præfata executionibus & omnibus inde sequutis, fuisse, fore, & esse nullos, et nullas, inuálidos et inuálidas, irritas, et inanes. Et nihilominus quantum opus est, ratione iubente, ipsos, et ipsas cassamus, irritamus, et adnullamus, ac viribus omninò vacuamus, dictamq; Ioannam, ac ipsos actores, et parentes eiusdem nullam notam infamie seu maculam occasione præmissorum cōtraxisse, seu incurrisse immunemq; à præmissis, et expurgatam fore et esse declarantes, et in quantum opus est, penitus expurgantes. Ordinantes nostra huiusmodi sententiæ executionem seu solemnem intimationem in hac ciuitate protinus fieri in locis duobus. Altero videlicet in promptu in platea sancti Andreni, generali Processione præcedente, et in sermone generali: et alio die crastina in veteri foro: in loco scilicet in quo dicta Ioanna crudeli, et horrenda crematione suffocata est, cum solemni ibidem predicatione, et affixione Crucis honesta ad memoriam perpetuam, ac eiusdem et aliorum defunctorum exorandas

salutes, ulterio rem dictæ nostræ sententia executionem, intimationem, & pro futura memoria notabilem significationem, in ciuitatibus, & huius regni locis insignibus, prout viderimus expedire, & si quæ alia supersunt peragenda, nostræ dispositioni, & ex causa reseruando.

Lata, lecta, & promulgata fuit hæc præsens sententia per dominos Iudices, præsentibus Reuerendo Patre Domino Episcopo Hectore de Quoquerel, Nicolao du bois, Alano Oliuier, Joanne du Bec, Ioanne du Gouys, Gulielmo Roussel, Laurentio Sue-ray Canonicis, Martino Laduennu, Ioanne Roussel, Thoma de Fanoullieres: de quibus omnibus Magister Simon Chapitault promotor, Joannes Darc, & Prenosteau, pro alijs petierunt instrumentum.

Acta fuerunt hæc in palatio Archiepiscopali Rothomagensi, Anno Domini 1456. die septima mensis Iulij.

Porro in eodem sacrosanctæ Capellæ palatij regij Parisiensis thesauro, eodẽque in volumine in quo præfatam delegato-

rum à sede Apostolica iudicum sententiam vidi & legi, extant varia in honorem puellæ scripta, atque in primis opus Domini Helix Episcopi Petragoricensis. Secundo, tractatus magistri Roberti Cyboli Academiæ Parisiensis Cancellarij. Tertiò opusculum F. Ioannis Brehalli ordinis fratrum Prædicatorũ, quibus animi magnitudo, & constantia Ioannæ puellæ mirificè prædicatur, ipsiusque probitas ac integritas ab hostium, & maledicorum calumnijs insigniter vindicatur. Atque hæcenus, cuius fortissimæ virginis defensionem laudemque mihi proposui, eam iustis laudibus ornata, contra obrectatorum cõuitia generatim atque absolutè defendi. Verùm quia inter scriptores nostræ ætate modestia & doctrina claros, inuentus est non nemo, qui de puellæ istius virtute & constantia parum commodè sentiens, possit fortassè incautiores nonnullos sua authoritate in errorem inducere. Respondebo ei modestè atque amicè, quòd quem hominem suspicio pro sua

virtute & doctrina, in eum acerbo animo neque debeo esse, neque possum. Is est ad mores accomodationis literaturæ cultor eximius Iustus Lipsius: qui vt in censendis veterum libris accuratus & industrius, ita in colligendis politicis præceptis politus & solers, vellem eadem cura qua cætera tractauit, rebus etiam Caroli septimi accisis missum è cœlo remedium suscepisset. Non inter superstitionis exempla, Ioannæ in Franciam aduētum recensuisset, non ad extremum vacillasse vaticinij fidem scriptum reliquisset. Lipsius igitur in suis politicis, lib. i. cap. 3. cum ex Curtio retulisset, quòd nulla res efficacius regeret multitudinem quàm superstitio, addit in suis ad id caput notis, vfos vel abufos superstitione sæpè viros principes, ad res magnas scilicet gerendas. Exempla pauca ex antiquitate refert Scipionis qui Iouem in Capitolio consulebat; Sertorij qui ceruam circumducebat; Marij qui Syram fatidicam; Syllæ qui sigillum Apollinis in prælijs ostentare solebat. Exempla

In Lipsiū
pro Ioan-
na velita-
tio.

plura, inquit, sed illud Caroli septimi Galliarum Regis eximium, cuius res accisas valde reparauit hoc commentum, deinde narrationem virgunculæ Ioannæ Lotharingæ subtextit, & ad oram paginæ virginis Gallicanæ enthusiasmum siue dolū notat. Dubius est Lipsius Deo an dolo Galliae liberationem à Puella factam tribuat. Commentum vocat: eius opera & ductu tamen, multa fortiter ac foeliciter gesta fatetur. Tandem vacillasse vaticinij fidem ait, cum ab Anglis capta exusta est vt præstigiatrix. Hic iudicium syncerum in viro syncero desidero. Veteres illos duces superstitione vsos in rebus bellicis, idque successisse foeliciter nō abnuo. Nempe illi puriorem religionem nullā agnoscebant, qua fortitudinem labantium militum excitarent. Idem Carolum septimū factitalse, nec verum, nec vero simile: Etenim testantur scriptores etiam Burgundicæ factionis Carolum è solutiore vita ad meliorem conuersum vbi spem in Deo collocasset, diuinum præsens auxilium

lium sensisse, ductuque Ioannæ non sine diuino numine eum adeuntis, aduersus Angli dominatum regnum auitum in libertatem asseruisse. Non est superstitioni, sed religioni tribuendum, quod conuersis & pœnitentibus prosperè euenit. Vera religio superstitionem sociam non patitur, falsa, mera impietas est, & superstitione tegit impietatem. Superstitione leges suas firmarūt, qui ex colloquio, cum Dijs scilicet habito, illas se habere commenti sunt. Minos quidem cum Ioue, Lycurgus cum Delphico Deo, Numa cum Egeria Nympha, at quis adeò temerarius sit qui ab illorum exemplo argumentetur Mosen Hebræorum Legislatorem quadraginta dierum cum Deo colloquium, finxisse, quò leges suas augustiores Israëlita genti & veneratione digniores faceret? Toto nempe cœlo distant inter se religio, & quæ sub religionis vmbra delitescit superstitio. Quare religiosi & Christianissimi Principis consilium non magis inter commenta Scipionis, Sertorij,

Marij, Syllæ annumerandum, quam Numæ, Lycurgo, Minoi, Moses comparandus. Venit ad Regem puella, non humana aliqua fraude inducta, sed à Deo instincta, sed vocibus è cœlo auditis sæpè admonita : Quodque se diuinitus missam certò sciebat, id ita esse certò & constanter asseruit. Quem in finem dicet aliquis? Ad pellendos è Gallia Anglos: ad Carolū VII. quem legitimo regno exutum ibant, defensum armis, Rhemos ad sacram unctionem perductum, suo in regno stabili & tranquilla sede collocandum. Vt hinc etiam intelligamus totā puellæ historiam miraculū atq; in rebus humanis altū diuinæ prouidentię quasi mysteriū fuisse, id quod sentire se & existimare asserit vir de literis deq; foro meritissimus Stephanus Paschasius Parisiensis Aduocatus, libri quinti conquisitionum Francicarum capite octauo. Et verò, quod sibi mandatum esse dixit, quod facturā promisit, id egregiè præstitit eiusque verba foelicissimus rerum Gallicarum euētus est consecutus.

Sed ne totam historiam retexere velle videar, redeamus ad iudicium & sermonē Lipsij. Ad extremum, inquit, vacillauit vaticinij fides. Quomodo aut quando vacillauit ô Lipsi? Quando capta, igne exusta est vt præstigiatrix. An tu verò præstigiatricem cum Anglis asseris? vide quæso ne qui humanissimus semper es habitus pari crudelitate cum ijs labores, qui famā religiosæ virginis verbo tam irreligiosè perstringas; An fortè præstigiatricem ex Anglorum iudicio non tuo recenses? minùs peccas, peccas tamen cum vacillasse vaticinij fidem accusatoribus credis, & ijs quidem, puellæ contra quam dicunt, inimicis. Meyerum saltem Belgam historicum audisses, qui Bethfordium narrat vt Philippum Burgundiæ Ducem placaret, ea ad illum mēdacia scripsisse, de quibus testimonium ipsius antè posuimus; in quibus splendidum illud est, *Cum videret se morituram, confessam esse spiritus illos qui sæpè illi apparuerant mendaces & falsos esse, per eos spiritus se esse deceptā, qui*

polliciti erant eam liberare. Erras quoque si ab exustione vacillationem arguis. Omnino hæc separata sunt, prædictio futurorum, & immerita mors prædictricis. Prædixerunt aduentū Messiaë Prophetæ, eam ob rem multi ipsorum malè habiti, conuicijs affecti, interfecti, quis ex ipsorum nece prophetiæ fidem conuellat? Morte crudelissima perempti Martyres, dum Christo obsequuntur, dum Christum imitantur, dum fidem ab ipso acceptam constantissimè gentibus prædicant; quis Christianæ fidei professionem, sanguinis innocentis effusione sancitam, nisi ethnicus & paganus ludibrio est habiturus? Et quoniam totius huius negotij disceptatio ex duobus capitibus pendet, ex ijs, si placet, id dijudicemus. Primum est de fide vaticinij, alterum de vaticinantis condensatione & exustione. Fides vaticinij vsq; adeò constitit, vt quæcunq; de rebus Caroli futura prædixerat omnino euenerint. Paschasius antè à me laudatus, *Videte, inquit, vt radijs sancti spiritus per voces è*

cœlo auditas illustrata, multa prædixerit, quæ post contigerunt: nam ut lubens prætermittam, quod in primis Baudricurtiũ, deinde Regem quos ante non viderat, agnouerit: hoc enim fictè ex composito & simulatè gestũ interpretari possit aliquis è vulgo sapiens. Mihi certè deliberatum est credere diuino eã afflatu futura occultaq; cognouisse, qui intelligam nihil vanè ab ea prædictum fuisse, nihil indicatum falsò ac temerè. Dixit illa Regi Carolo se à Deo missam ut Aureliam obsidione liberaret, deinde ut illum Rhemos duceret, ubi sacro oleo inunctus, coronatusq; regio diademate, Christianissimus Rex salutaretur. Nōne hoc utrumq; præstitit? Mox ut ad Carolum peruenit, scripsit Regi Angliæ ut paci intenderet, fore haud multò post ut Rex Carolus recuperatis Gallorum opibus atq; animis, Regio honore Parisios ingrederetur idq; se diuinitus nosse. Nonne hæc postea contigerunt? Testata est apud Iudices Duce[m] Aurelianũ Deo carum esse ac dilectũ, unde id rescire potuit nisi Deo inspirante?

Decimus enim ferè quintus annus agebatur, ex quo afflictus ille Princeps graui custodia detinebatur, minima spe liberationis: paucis tamen post annis liberatus est, senexq; filium genuit, cui postea regni Gallie corona obtigit. Is fuit Ludouicus XII. parens patriæ cognominatus, & è multis Gallia Regibus deliciae Frâncici generis. Dixit & iudicibus fore ut ante elapsum septennium, Angli è Francia exterminarentur. Nonne sexto post anno Carolus victor Lutetiam ingressus, factione Anglicana deleta regni prerogatiuam tulit: interlabenteq; illo tēpore ex alijs regni Gallicani partibus Anglos eiecit? An putamus hanc insanam, quæ iudicibus captiosè interrogantibus summa cōstantia respondit euentura quæ postea summo cum Anglorum infortunio acciderunt? Post igitur tot generosos actus, post tot veras prædictiones, post tot fœlices in causa tam iusta successus, dicemus hæc, diabolicas fraudes? dicemus hominum commenta fuisse? Certè dicunt faciuntque talia comminiscetes,

quod ipse (vt cum Persio loquar)

*Nō sani esse hominis nō sanus iuret Orestes.
Neg, pietatē ullā in p̄cordijs eius habitare
credā qui ausu temerario tā piatā heroica
Puellæ gesta, tam certa vaticinia lancina-
re audeat. Vt non penitus ab re author li-
bri de mirabilibus victorijs fœminarum
orbis noui ita statuatur, eum qui non agnos-
cit ministerio puellæ, Galliæ regnum esse
recuperatum & conseruatum, indignum
esse qui in eo partem aliquam sibi vendi-
cet, seu Princeps, seu subditus sit, teste Io-
an. de Marconuille libro de fœminarum
bonitate & malitia.*

Hæc de fide vaticinij aduersus Lipsia-
nam vacillationem. Nunc ad alterum ca-
put veniendum, de damnatione ad ignem
& exustione puellæ. Quid censes Lipsi?
traculentam hanc Catastrophē, puellæ
præclara facta dehonēstasse? At gloriosis-
simam fuisse mortem iudico, neque ho-
nestiore vitam exitu finire potuisse virgi-
nem innocentem. Quid si medijs in præ-
lijs incautius pugnans cecidisset? Quid si

morbo inglorio decessisset? vnde pudicitia, vnde innocentia ipsius nobis certa esset? Probauit series iudiciaria pudicitiam, probauit iniqui iudicis astutia constantiã, probauit ignis innocentiam. Quærebat omnes calumniandi vias Anglus, nunquam impudicitiam exprobrauit, tametsi medijs in castris versata fuisset, vbi pudicitia plerũque periclitari solet. Nunquam ipsius constantiæ vim attulit, quam etiam nunc admiramur ex generoso illo respõso, malle se Deo quàm hominibus obedire, cum iussu deponere virilem habitum, tradito à iudicibus muliebri, virilem eundem resumpsit. Ex cuius repetitione certissimam sibi mortem impẽdere sciebat. Quid illi facilius quàm iudicum manus effugere si iudicum minis territa, monitis eorum paruisset? Maluit illa mori, quã vel tantillum à diuinis vocibus recedere. Nũquam inuidia labefactare eam potuit, tametsi vt hæreticam, vt relapsam, vt præstigiaticem condemnaret. Talem pronunciauit iniquus iudex & brachio seculari

laripuniendātradidit. Sed ab omni eiufmodi crimine innocentem declararunt Iudices qui ad abolēdam illius iudicij iniquitatem à Calixto summo Pontifice sunt delegati, vt superius relatum fuit,

Scilicet vt fuluū spectatur in ignib' aurū,
sic medio in rogo funebri, puellæ candor,
& simplicitas exploratricibus flāmis probata est. Erectum illi honoris theatrum cum media in vrbe Rotomagensi cunctis risui exposita, Normannorum & Anglorum infanis & ad mendaciū cōpositis vocibus est appetita. Premitur virtus, non opprimitur. Exustum est puellæ corpusculū, cinis in aëra iactatus, sed igne purior effectus animus in sedem æthereā cōmigravit. Ante captā damnatāque puellam nondū Anglus violentæ dominationis licet aliquoties profligatus meritis pœnas dederat: verū vbi condemnata innocentia summæ impietatis reū fecit, res suas omnes pessum & cessim ire sensit. Nimirū plus mortua quā viua Britannis nocuit: ipsiusq; cineribus Albionio san-

guine est parentatum, vt non tantũ ex occupatis per vim & iniuriam vrbibus, sed ijs quoq; quas optimo iure possidere credebatur, nomen Anglicum penitus eijceretur. Non mortis genus, sed mortis causam infamare, dixerunt Iurisperiti *in l. iñtus fustium. ff. de his qui notant. inf.*

Quocirca nec vitam, nec mores, nec præclarè facta, dictaque Ioannæ ex atrocitate supplicij dedecorare quẽquã oportuit, sed ex hostili iudiciũ rabie, & causæ innocentia ea metiri. Faceffant ergo nunc procul qui etiam nũ hodie odio plusquam anglicano vitã, pudicitiam, fortitudinem puellæ dicterijs & maledictis proscindũt: quod virtuti, quod honori, quod gloriæ vertendum fuit, id venenato morfu inficiunt & malitioso probro contaminant.

Hæc de fide vaticinij, hæc de igne non expiatore sceleris alicuius, sed illustratore virtutum puellæ, aduersus illius obtreñtatores dicta sufficiant. Nos hoc vitæ miraculum cum Paschasio admiremur; pudicitiam, quam à pueritia adamatam, media

inter pericula militaria Christi ac cœli miles conseruauit; æquitatem causæ quam fouebat, fortitudinem qua in eadem causa defendenda, est vsa; prudētem simplicitatem qua versutorum iudicū in ipsius necem conspirantium captiosas quæstiones egregiè dissoluit, refutauitque; prædictiones, quas veras euentus demonstra- uit: mortem acerbissimam quam vitare potuit, si vel in speciem, verbo præ se ferret, dæmonum fraude se ad ea quæ gesserat inductam esse. Addamus & cœlitum obiectas species Diui Michaëlis Archangeli, diuarum Catharinæ & Margaritæ, astantisque multitudinis Angelorum; voces deniq; è cœlo auditas, quibus ductricibus, eius ex hac vita ad beatam immortalitatem curriculum est peractum.

Quæ qui omnia colligere volet, intelliget vitam & historiā huius puellæ, totam miraculorum esse plenissimam.

Miraculorum inquam? imò & nobili-
 um Documentorum, quibus cōmunis
 hominum societas, eorumque res & pu-

Documē.
 ta huic hi-
 storiz in-
 fin.

blicæ & priuatæ, quasi iustissimis legibus salubriter temperentur.

Primum
documē-
tum.

In ijs primū illud est, quod in historiæ huius visceribus penitus insidet: REGIBVS COLENDAM ESSE IVSTITIAM; QVÆ CONTRA EAM DOLO AVT ARMIS MOVENTVR, EA DENIQUE, VLTORE DEOSVIS AVCTORIBVS INFELICITER CEDE-RE. Carolū vii. legitimū regni Galliæ hæredē regno pellebat *Anglus*; erat armis humanisque auxilijs Gallo superior: Gallus æquitate causæ, & diuini numinis propugnatione superabat. Vicit Iustitia iniustitiam, Regni inuasorem legitimus hæres, legum sanctitas meditatā in eas fraudem, bellicosos exercitus excitata à Deo puella, humanas vires, tenuis diuinæ dextræ impulsus vicit. Inuadendi regni Galliæ ius, per nuptam sibi Heroinam Francicam *Anglus* contra Salicæ legis columē sibi arrogabat. Vanum hoc ius esse & cōmentitium; lege Salica stare maiestatem Imperij Gallici, declarauit Gallo contra *Anglum* auxilio missa, diuina innuptæ

virginis fortitudo. Dicā clarius. Quia Hēricus sextus Angliæ Rex, è Catharina Frācica nupta Henrico Quinto progenitus erat, adactis per vim à Philippo Burgundia Duce ad id matrimoniū Carolo sexto Rege Gallia, Regina, Catharinaque ipsa Francica, quos in potestatem suam redactos Anglo dederat; dictatisq; eius matrimonij legibus suo arbitratu; in ijsque illā, vt seu Carolo VI. liberi nascerentur seu minimè, qui ex Catharina Francica & Henrico V. filij existerent, ij regni Gallia hæredes essent: ideò inquam, procreatus ex hoc matrimonio Henricus sextus Angliæ Rex, Lutetia id temporis ab Anglis Anglorumque fautoribus regni titulo & diademate ornatur. Angli ius sibi ad regnum Gallia quæsitum esse putant, bello regni possessionem quærunt. At vetabat hoc ius naturæ ac gentium, quod non patitur vt filius non ingratus ex hæres sit: Carolo autem VI. Gallia Regi, filius erat superstes, regnoque aptus Carolus VII. Vetabat lex Salica, Francica coronæ co-

lumen ac fundamētum, quæ dum fœminas à regni hæreditate repellit, repellit & filios qui sola materna origine de genere sunt & sanguine Francico. Certum enim est, exclusa aliqua persona ex ea descendentes excludi, §. *hoc autem notādum de his qui feud. dare pos. & §. ad filias de success. frat. in usib. feud.* Salica autem lex, ut partem ex ea repetam nostro huic instituto congruentem, concepta est his verbis.

Lex Sali-
ca.

Nulla portio hereditatis de terra Salica mulieri veniat, sed ad virilem sexum tota hereditas perveniat. Terra Salica, terra Francico sermone (ut paulò post constabit) regia ac libera, coronæ Francicæ ac domaniij propria.

Sanè autem legem Salicam Gallis propriam fecit, legis cōditor, nominis ratio, regni maiestas, mores & exempla antiquitatis.

Eius con-
ditor.

Legis conditor. Pharamūdu primus Francorum Rex, ratus humanè & sapiēter, non plus humanæ societati imperitādum armis esse, quàm ratione & legibus

præsidendum; rem Gallicam Salicis legibus fundare instituit. Nam cum ad sedes quærendas profecti Franci (sic historiæ memorant) ad Rhenum confedissent, nullisque adhuc legibus admodum viverent, Pharamūdus quatuor ex Sicambris spectatos viros deligit, Vzugastum, Lofogastum, Sologastum & Visogastū, ijs mandatum dat vt leges sanciant scribantque: à quibus scriptam legem Salicam communi cōsensu, regia authoritate promulgat. Sigebertus Gemblac. in chro. Otto Frisingensis, Trithemius, Beat. Rhenanus, Nicolaus Ægidius, Gaguinus, Ioannes Ferrault, Carolus de Grassalio. P. Gregorius, Claudius Prat. & alij complures.

Nominis ratio. Quid sit quod legis Salicæ nomen fecerit, sæpè à multis curiosè quæsitum est. Quibusdā probabile inuentum visum est, à salicibus quasi Salictā Salicam esse appellatam, quia rure inter salices promulgata sit Francis, ante vrbes & oppida, ab ijs condita occupataue. Alij Salicam à sale deriuatam; siue quia leges

Nominis
etymon.

Salicæ primæ fuerunt Francorum leges, sal autem ante reliquas dapes primùm ad mensam apponitur: siue quod primæ illæ leges ad conglutinandos Francorum animos sunt institutæ, haud secus atque ex liquidis & fluentibus aquis sal in solidum, quiddam coalescit. Quid si etiam à sale dictæ ideò sunt, quia ipsarum conditores, perpetuas firmasque esse voluerūt? Nam salis propria incorruptio est, eiisque conditurâ carnes corporaq; id genus, astringi humore exeso, atque à putredine defendi solent. Sal ideò ad leges, ad pacta, ad sacrificia, diuino humanoque more est adhibitus, vt puri atque incorrupti animi symbolum, diuturnæque firmitatis argumentum. Leuitici cap. 2. *Quidquid obtuleris sacrificij, sale condies, nec auferes sal fœderis Dei tui de sacrificio tuo. In omni oblatione offeres sal.* Et. Numer. cap. 18. *Pactum salis est sempiternum coram Domino tibi ac filijs tuis.* Et 2. Paralip. cap. 13. *Nū ignoratis quod Dominus Deus Israhel dederit regnum David super Israhel, in sempiternum.*

ternum, ipsi & filijs eius in pactum salis?
id est in pactum firmum ac sempiternū.

Homerus Ι Α. Ι. πάσῃ δ' ἄλδῃ θείοιο. *inspersit*
sale diuino. Virgil. 2. *Æneid.*

mihi sacra parari,

Et salsa fruges, & circū tempora vitta.

An fortè Salicis legibus nomen à sale est, quia sal prudentiæ sit & sapientiæ symbolum? quippe qui & sapidus sit ipse per sese, & saporem cibus alijs inducat. Apostolus quidem, Coloss. 4. *Sermo vester, inquit, semper in gratia, sale sit conditus.* Nempe qui leges Salicas tulerunt, eas id temporis voluerunt esse prudentiæ politiæque Gallicæ fundamenta. Venustè ista & eleganter. At mihi illorum sententia multò & simplicior videtur & verior, qui legi Salicæ nomē ex eo factū putant, quod lex propria esset Francorum; Francos autem ex omnibus Galliæ populis, Salios esse appellatos refert Ammianus Marcellinus lib. XVII. in Constantio, *Cesar, inquit, petit primos omnium Francos, eos videlicet quos consuetudo Salios appella-*

mit. At vnde, quæso, franci consuetudine sunt appellati? Andreas Althamerus in Tacitum, Francos sic nuncupatos putat à Sala fluuio, quo pars Franciæ orientalis irrigatur: credo à Sala Turingiæ fluuio, illoue etiã Austrasiæ nostræ flumine quod Salia, alliaue vulgò appellatur: de quo Venantius Fortunatus, Metensis vrbis situm & flumina describens lib. 3. poem. 12. ad Villicum episcopum Metensem.

Hic dextra de parte fluit qua Salia fertur,
 et lib. vii. ad Gogonem,

Sen qui Mettin adit, de sale nomen habens.

Verùm, quoniam Ammianus consuetudine sermonis rancos alios appellatos annotat, non à flumine vllò: eapropter haud ægrè Paulo Volzio atque alijs assentior, qui vetere Francorum lingua Salicū idem fuisse interpretātur quod immune ac liberum. Quo vsu obseruauit Beatus Rhenanus salicas terras vocari solere Principum libera prædia atque immunia; & terram salicam in vetustissimis diplomatis Iurisconsulti interpretantur fiscalē

& Regiam. Salij igitur Francique, duo quasi synonyma sunt nomina, cū vtrumque libertatis sit nomen ideoque leges eæ quibus libertatem remque publicam suam, ac regiam authoritatem Franci primo fundauerunt, iure, consuetudine sermonis leges Salicæ sunt appellatæ. Ex quo efficitur maximè id quod hic agimus, vt lex salica vel ex ipsa nominis etymologia, Francorum propria sit.

Regni maiestas. Claruere quidem in omni antiquitate sacra & profana, multæ prudentia, fortitudine, ac rerum administrandarum laude illustres fœminæ. Diuinas literas nemo leget, quin Saras in ijs, Deboras, Iaheles, Abigaëles, Reginas Saba, Iudithas, Eltheres commendatas legat. Quis autem in historia Ecclesiastica non aut Helenam Constantini matrem aut Pulcheriam Theodosij sororem, multis viris anteponat? Quis in re Gallica, aut Blancam vetustiore æuo, aut Catharinam superiore nostra memoria, aut hoc tempore ipso Mariam Medicæam, tres Chri-

Regni
Gallici ac
legis Sali-
cæ maiestas.

stianissimorum maximorūque Regum,
Christianissimas spectatissimasque Con-
iuges & Reginas : tres à virorum obitu,
filiorum adhuc impuberum tutelaria
columina, tres easdem Religione, pru-
dentia, rerum administrandarum laude
præstantissimas ; regni interim & con-
siliij publici, dum filij regno adolescunt,
sapiantissimas moderatrices, non suspi-
ciat atque admiretur ? At sic Franco-
rum tamen animi & ingenia fuerunt,
ea iam ab initio informata ab illis est
regni Francici claritudo, ac maiestas,
vt Regum suorum obitu, nulli nisi
regiæ virili soboli, regni hæreditatem
obtingere voluerint. Quid ita ? dicet
fortasse aliquis. Primum, libertatis au-
di, atque impatientes alieni dominatus,
regnum egregiè Francum, (vt sic lo-
quar) id est, optimo iure modoque li-
berum atque immune, sibi statuere co-
gitarunt. Innatum autem est mulieri
vt sub viri sit potestate ; ei obnoxia, eius
consilio & imperio gubernetur. Nisi

viros igitur liberrimi regni summos Principes , atque hæredes esse noluerunt.

Deinde, cum firmissimum , clarissimumque regnum animo designarent, illud viderunt natura duce , quod scriptis legibus Iurisconsulti tradiderunt, familiarum dignitatem firmitatemque prole mascula conferuari l. i. §. publicè. ff. de vent. insp. & l. pronuntiatio. ff. de verbor. signific. Menander *σύλῳ γὰρ οἴκου παῖδες εἰσὶν ἄρρενες*. Columna domus filijmares. Ac fanè muliere regnum capeffente , quid facilius , quàm vt matrimonio iuncta externo Principi, regnum in eius familiam & gentem donatione aut morte transferat? Quid si amore percita, nubat homini abiecto aut infami? quæ erit imperij illius celsitudo ac dignitas? Qui non in tali populo bellorum motus tam indigna non ferente?

Tertia apud me ratio est; quod qui virorum nomen, præ ceteris populis, fortitudinisque laudem ambiebant, ij me-

ritò viris tantùm , summam imperij sui dignitatem mandandam esse putauerūt.

Quartò, diuinæ ac cœlestes prærogatiuæ quibus regnum Gallicum, Deus præ cæteris orbis atque Ecclesiæ regnis exornauit, Christianissima pietas, numerosissima sanctorum virorum, ac Præfulum, clarissimaque multitudo, Regum augusta maiestas, rerum pro Ecclesia pace ac bello gestarum magnitudo, sacra Ampulla, Lilia, Auriflammula, tria cœlo allata munera; strumarum regio attactu curatio; victoriæ inclytæ, vt Clodouæi Clotildis instinctu Christo vota faciētis; vt hæc ipsa, Puellæ Ioannæ ope parta; Theologiæ, Iurisprudentiæ, Medicinæ, atque omnium honestarum artium domicilia & plurima & celeberrima; Supremæ Curriæ legum ac iustitiæ propugnacula; sacra torquata militia; ipsa imperij celsissima forma ac species; documēto sunt Regnū ac populum Francicum, iam inde à principio singulariter Deo curæ fuisse; singulariter ab eo, in Christianæ Ecclesiæ rem

atque opem erectum & constitutum esse. Quare, vt ad regnum Israëliticum viri duntaxat à Deo electi, viri duntaxat hæreditario iure peruenerunt; sic ad Christiani illius regni, quod Israëlitico regno, & religioso Dei cultu, & sacra vnctione, & duodecim regni Proceribus ac Paribus; & Dei propria cura, ac prouidentia, maximè germanum ac simile est, regni inquã Gallici hæreditatem adire fas viris tantum est, fœminis nequaquam. Quocirca Baldus in cap. 1. de feud. marchię *Săguinem Francia* ait, *esse perpetuum, adeò quod si extaret vnus de sanguine antiquo masculus, excluderet fœmellam in infinitum, etiamsi esset in millesimo gradu*: quod Baldi dictũ plus diuinum quàm aureum esse asserit Vincentius 4ig. in suo tractatu de fact. Princip. cap. 3

Considerate lilia agri (inquit Christus Lucæ 12.) *quomodo crescunt, non laborant neq; nent.* Quibus verbis ferunt, quo tempore Philippus Valesius regnum adeptus est, conclusum esse, contra impugnantes

legem Salicam Lilia Gallorum non deberi nisi nobilibus qui non laborant; non nisi maribus qui non nent. Maneat igitur ex regni legisque Salicæ maiestate certum ac fixum, Catharinam Francicam Caroli VI. filiam, nihil ad regnum Galliæ hæreditarij iuris habuisse: ob eamque rem, etsi ex ea *Anglo* nubere coacta procreatus sit Henricus VI. Rex *Angliæ*, nihil tamen ab ea hæreditarij iuris in regnum Franciæ ad Henricum sextum, aut omnino ad nomen *Anglicum* permanasse. Quare & immerito Hêricum VI. hoc nomine Regem Galliæ esse appellatum: & bella quæ potiundæ idcirco Galliæ ab *Anglis* Burgundisque contra Carolum VII. sunt gestainiquè esse gesta: meritòque Gallis diuinum aduersus *Anglos* auxilium per puellam Ioannam affulxisse.

Legis Salicæ in Galliæ exempla & cōsuetudo.

Quartum legis Salicæ columen, sunt mores & exempla antiquitatis, id est, vno verbo, consuetudo, tum ipsa per se lex, quando honesta est, tum optima legum. interpret l. si de interpretatione. ff. de legib.

gib. cui tanquam matri reuerentia est adhibenda, teste Bald. conf. 185. cum habeat vim decreti veritatis & iustitiæ ex eodem Baldo cap. 1. qui feud. dare pos. & Doctorum communi doctrina in rub. de consuet. & in l. de quibus. ff. de legib.

Tenuit autē hoc semper inter Gallos, vt summi imperij molem, viriles humeri, non fœminei sustinerent. Quo in genere ponam aliquot antiquitatis iudicia & exēpla. Primum; cum Ludouici Hutini filia, vxor Caroli Comitis Ebroicensis, sola patri superstes, paterna regna Gallia & Nauarra, sibi vt soli & legitimæ hæredi peteret, sic ex regnorum iure diuisa iudicij sententia est, vt regni Nauarra, quia iure successionis in hæredes cuiusque sexus transferri solet, hæres & esset & diceretur; Regnum Gallia non ipsi, quippe soli masculæ proli regia, hæreditarium, sed Philippo Longo eius patruo, fratri Ludouici Hutini deferretur. Alterum; Philippo Longo è viuis abeunte, nulla post se relicta virili prole, regnat, non eius filia, sed

Carolus Pulcher, alter ipsius Philippi Lōgi frater. Tertium, cum Carolus Pulcher è vita excessisset, vxore vterum ex eo gestante, Philippus Valesius Interrex, regniue administrator dictus & constitutus est. Post, mortuo posthumo Caroli Pulchri, exclusa Isabella Philippi Pulchri filia, quam Edoardus secundus Angliæ Rex vxorem duxerat; exclusoque eodem iure Edoardo ex ea tertio, Philippus Valesius, Philippi Diui Ludouici filij nepos, supremo Parium Franciæ iudicio, & sententia, Rex Galliæ renunciatus, coronatusque est: esto Isabella esset Carolo Pulchro consanguinitate propinquior, ac soror. Froissard. volumine primo cap. 22. Carolus de Grassalio & Ioannes Ferrault in suis libellis Regalium & priuilegiorū regni Galliæ.

Tenemus igitur consuetudine regni Gallici, legisque Salicæ authoritate, nihil ex matrimonio Catharinæ Francicæ, & Henrici V. Anglorum Regis, causæ fuisse Anglis, cur aut Carolum VII. Caroli VI.

legitimum hæredem, regno Galliaë exclusum vellent, aut id suo Henrico VI. vi & armorum motu asserere quærent. Nihil mirum itaque, si quod contra æquitatem bellum mouebant, id in eorum perniciem recidit, Deo Gallicæ æquitatis propugnatore, vel per teneram puellam eorum arma vlciscente.

At matrimonij inquires, inter Catharinam & Henricum V. Angliæ Regem ea lex dicta erat, vt qui ex ipsis existeret, is regni Galliaë hæres esset. Dicta sanè lex; sed à Philippo Burgundiaë Duce ira & dolore in Gallos inflammato, Regemque ipsum, Reginam, Catharinam eorum filiam, captos deditosque Anglis, in id matrimonium adigente: quod dum historiaë narrant, nimirum legis illius iniquitatē narrant, quæ conuellere legis Salicæ auctoritatem, neque potuit, neque debuit.

Quocirca rectè olim Edoardus tertius Angliæ Rex, natus Isabella Francica, Procerum Franciaë iudicio & sententiæ subscripsit, qua, præterito ipso, regnū Fran-

ciæ Philippo Valesio est demandatum; ei-
dēque se, consentiente Anglia, pro Aq-
uitaniæ Ducatu, sacramento fidelitatis ob-
strinxit, anno millesimo trecentesimo vi-
gesimo nono.

Fecēre etiam Angli cōsultē & sapien-
ter, cum post multas vtrunque clades an-
cipitesque victorias, tandē anno Domini
millesimo quingētesimo decimoquarto,
nubente Maria sorore Regis Angliæ, Lu-
douico XII. Francorum Regi, ius omne
illi remiserunt, quod quacunq; de causa
sibi in regnum Galliæ, aliquando vendi-
carant; idque de Procerū Angliæ cōmuni
consilio & consensu. Carolus de Grassa-
lio lib. 1. regaliū Franciæ. iure 17. circa
medium. Et Petrus Gregorius cap. 4. libri
45. syntagmatis iuris vniuersi.

Secūdam
documē-
tum.

Iam hoc alterum vitæ documentum,
historia ista suppeditat; CRVDELITA-
TEM DEO ET HOMINIBVS INVI-
SAM ESSE; CLEMENTIAM, ETIAM
IN HOSTES ESSE LAVDABILEM.
Ad cætera inhumanitatis exēpla, quæ bel-
li furor, Anglis in Gallos expmēre persua-

fit, illud ad posteros nobilitatū est facinus, quo Ioannā Lotharenā puellā, missam diuinitus subsidio Galliæ, religione, pudicitia, armis, clementia nobile, à qua de pace monita cōsiliaq; per literas acceperāt, bello captā, nullo dānatā iusto crimine, teterimo mortis genere, cōtra oē ius belli iudicijque pēmerūt; cremati corporis cines, ne qua eius pars inter homines superesset, in profluentē proiecerūt. Nā certissimi iuris est milites in bello captos postq̃ à cōflictu semel recesserūt nō posse interfici, sed tanquā seruos custodiri & seruari, q̃ppe à seruando potius quā à seruiēdo appellati sunt serui: qui si occidantur, lege Cornelia de sicarijs perinde occisores tenentur, ac si liberos occidissent. §. i. de his qui sunt sui vel ali. iur. apud Iustin. & l. i. iā glos. in verbo occiderit. ff. eod. tit. Guil. Bened. in cap. Raynuti⁹ in verb. cuidā Petro tradiderūt. nū. 32. & Balthazar Ayala in ca. 5. lib. i. de iure & offic. bellic. & disciplina mil. quid ergo mirū, si anglis ex quo se tā inani facinore cōstrinxerūt, cōtigerint infelicitè vniuersa, cēpintq; in pei⁹ ruere

& retrò sublata referri? Pulchrè Valerius Max. libro quinto tit. de humanitate. *Humanitatis dulcedo etiam in efferata barbarorum ingenia penetrat, toruosq; & truces hostium mollit oculos, ac victoria insolentissimos spiritus flectit. Nec illi difficile & arduum est, inter arma contraria, inter districtos cominus mucrones, placidum iter reperire. Vincit iram, prosternit odiū, hostilemque sanguinem hostilibus lachrymis miscet.* Hæc ille. Hannibalem multis vitijs & sceleribus respersum, multa fidei atque ingenij inconstantia, multis fraudibus infamem historiæ loquuntur, tamē etiam Titus Livius plurimis virtutibus præditum dixit. Credo, in parte, quòd tantū humanitatis in pectore barbaro inveniri potuit, ut militibus ac Ducibus Romanis hostibus suis captivis honorem habuerit; mortuis, iustis parentaverit exequijs. Et quidem Pauli Æmilij apud Cumas trucidati, quæsitum corpus, quātum in eo fuit, iacere inhumatum passus non est. Tiberium quoque Gracchū summo

cum honore sepulturæ mandauit ; illius ossa in patriam asportanda, militibus Romanis tradidit ; Marci Marcelli in agro Brutio interempti, solemni ritu exequias celebrauit. Cui proinde, vt est acutè à Valerio dictum, *aliquantò plus gloriæ Paulus & Gracchus & Marcellus sepulti, quàm oppressi attulerunt : siquidem eos Punico astu decepit ; Romana mansuetudine honorauit.* Hannibale etiam clementia superiores Romani, qui Syphacem opulentissimum Numidiæ Regem victum & captiuum in custodia Tiburi mortuum publico funere efferendum censuerunt, vt vitæ dono honorem sepulturæ adijcerēt. Consimili clementia cum Perses Albæ, in quam custodiæ causa relegatus erat, decessisset, quæstorem miserunt, qui eum publico funere efferret ne reliquias regias iacere in honoratas paterētur. At illam Achillis immanitatem, quanta, apud Poëtam, cum animi indignatione legimus?

Ter circum Iliacos raptauerat Hectora muros,

*Exanimumq₃ auro corpus v̄debat Achil-
les.*

Quanto acerbioris sensu Asiaticos Galatas à barbarie detestamur? de quibus sic est apud Diodorum Siculum libro quinto bibliothecæ. *Cum nonnulli strenuè in acie pugnarunt, tum maiorum, tum suas laudes ac virtutes decantant, res hostium deprimunt, tanquam vituperatione dignas. Capita hostium in acie cadentium abscissa, equorum alligant collo, in foribus domorum, cum cantu atq₃ hymnis affigenda: quemadmodum feras solent venatu captas, Hostium nobiliorum capita aromatibus uncta in tectis condunt summa diligentia, ostendentes ea hospitibus, nulloq₃ pretio ea, vel petentibus, vel alijs reddunt. Nonnulli eò iactationis prouehuntur, ut pro capite tantundem, pensi auri nequaquam velint accipere, barbaram hoc pacto magnitudinem animi ostentantes. Non enim virtutis bellicæ insignia non vendere nobile est, sed cum mortuis pugnare ferum habetur atq₃ agreste. Hæc ille. Atferi isti
& cru-*

& crudeles animi, sæpè etiam in hac vita, terroribus pœnisque alijs ultorem Deum sentiunt. *Attalus Pergami Rex* matrem anum & *Beronicem* sponsam cum occidisset, diuina Nemese persequente, nunquam postea lætum vixit diè, squalidam vestem deposito omni regio ornatu sumpsit, barbam capillumque submisit, non in publicum prodire, non populo se ostendere, non domi lætiora conuiuia inire, aut aliquod signū sani hominis edere visus est, prorsus vt pœnas pendere interfectorum manibus crederetur. Omissi deinde regni administratione ad hortulani opera se contulit, terram fodiens, & gramina serens. Ab hoc studio ærariæ artis fabricæ se tradidit & ære fundendo procedendoque ocium fefellit matri deinde sepulchrum facere instituit, cui operi intentus, morbo ex solis ardore contracto è vita excessit. Testis Iustinus libro trigesimo sexto. *Cambyses* falsa suspitione motus, fratrem interficit, sororem in uxorem ducit, fratris neci illachrymantem

& grauidam interemit atq; ira numinis tā iniquum Regem diu regnare passa non est, nam cum in equum ascenderet, decidens ex vagina gladius ferit ei femur, quo ex vulnere post paucos dies moritur. Herodotus lib. tertio. Aristobulus Hircani filius qui primus se Regem post reditum ex Babylone nominauit: cum Antigonū fratrem virum præstantem regnum adpetere suspicaretur, eum vnà cum matre quam fratris adiutricem existimabat interfici curauit: postea cum stimulante conscientia nullam quietem capere posset, & magnis angoribus, in locum fraternæ cædis se gestari iussit ibi sanguinem vomens prodigioso vitæ exitu extinctus est. Iosephus lib. duodecimo antiquit.

Haud omnino his dissimili ratione, senserunt Angli in hac causa, Gallorum dolorem & iniurias vlciscentem Deum, dati conspicuè in timorem, trepidationeque dissoluti, vbi in armis fulgens Puella Ioanna eorum copijs propinquaret. Cuius nos rei locupletes testes ante adduximus.

Tertium documentum est. NON BELlico APPARATV NEQVE HVMANIS VIRIBVS, SED PRO- PITIO DEI FAVORE VICTO- RIAS PARARI. Quis enim nō crederet, *Anglis iā media in Gallia, mediaque Lu- tetia regnantibus, scissis in factiones Gal- lorum studijs, cōsociante arma cum An- glo, potentissimo Burgundiæ Duce, de- stituto à suis Carolo VII. totā Galliā breui in Angli ditionem esse venturam? Ast ali- ter visum superis; vniufque puellæ Deo Duce in Galliam aduentu, erepta Anglo Gallia est; sibi suoque legitimo Regi resti- tuta. adeò humana consilia spectanti, ne- cesse est Thucydidēum illud verum vide- ri; *Perrarò bellum eò quò euasurum præ- dicatur, euadit.* Semiramis ingentis ani- mi mulier, cum Nino marito defuncto, regni Assyriorum administrationem filij nomine suscepisset, mariti famam, qui ad Indum vsque arma promouerat, & totam Asiam excepta India sibi subiecerat, rerū gerendarum gloria antecellere cupiens,*

cum innumerabilibus copijs Indiã adorta, quarũ vi & armis ad Oceanum viam sibi patefaceret, varijs cladib⁹ affecto exercitu, domum redire coacta est; adeò non gloriam retulit, vt summum sibi dedecus pepererit; ex omnibus enim copijs haud supra viginti viros incolumes secum reduxit. Strabo lib. 15. Cyrus Persarum Rex non satis gloriæ se assequutum ratus, translato ad se Medorum, qui Assyrijs successerant imperio nisi illorum etiam conatus superaret, in Indiam cum iusto exercitu expeditionem suscepit: verum tam tristi euentu vt vix cum septem militibus ad suos redierit. Haud magis fortunata Persarum, Dario Hytaspis filio regnãte, in Atticam expeditio fuit. Cum enim peditum centum millia, equitum decem millia in eorum exercitu essent tamen à decem millibus Atheniensium, & mille Plataënsibus nullo propè negotio deuicti sunt: etenim prima tantũ illorũ acies hostibus obuertit ora, neq; ipsa quidẽ satis cõstanter pugnã excepit, media &

postrema vix hoste cōspecto, præcipiti & foeda fuga classem repetierunt, ac præpediēte multitudine, cū naues conscendere nō possent, miseri Persæ instar pecorū ab Atheniēsisibus, qui tergis instabāt sunt trucidati. Sed & Darij & Xercis duorū apud Persas, Medosque, potentissimorū Regū, notior est bello accepta calamitas (quam militū nimbos veherent) quā vt cōmemoratione nostra egeat. Moabitis & Ammonitis qui Arabes in societatem adsciuerant Iudæā aggressis cū Iosaphat suis rebus diffusus diuinā opē imploraret, Propheta Iahaziel bono eū animo esse iussit, & magnis hostiū copijs nequaquā terreri, Deū pro Rege populoq; suo pugnaturū. Rex Prophetæ verbis recreat⁹ suos in acie stare iubet, Sacerdotes cū tubis ante ordines cōsistere, Leuitas & cantores hymnos & laudes Domino canere, quietosq; quid Deus factururus esset expectare. Cum itaq; suspensis animis diuinū auxiliū præstolarentur, repentino tumultu cōcitati hostes mutuis cædibus se confecēre, tam effera

rabie cōgressi, vt ne vnus quidem ex tam numerosis copijs superfuerit. secundo Paralip. cap. vigesimo. Ionathas, Saulis filius, vno duntaxat comite adiutus, Philistæorum castra noctu ingressus, passim cum cæde peruagatus, tantum eis paucoris iniecit, vt cum omnia ab hoste teneri crederent in fœdam fugam omnes conuersi sint. cap. decimoquarto libri primi Regum. Denique Balduinus Gothofredi Buillonæi frater, & in regno Hierosolymitano successor, cum illud contra Mahumetanos defenderet, ducentis sexaginta equitibus tantum, peditibus non gentis stipatus, Calyphæ exercitum; in quo equitum nouem millia, peditum viginti millia erant, tam egregiè vicit vt in vno conflictu equitum quinque millia præter pedites trucidarit. Baptista Egnat. lib. tertio.

Quartum
documentum
est.

Quartum documentum est. REBUS
AFFLICTIS AC DVBIIS, CERTI-
VS A DEO SPERANDVM AV-
XILIVM, SPEMQVE IN EO COL-

LOCANDAM ESSE ALACRIVS.

Non vtar ad hoc confirmandum, illo Agathiæ verbo, *Amat Deus in extrema angustia constitutos, modò ne sint improbi.* Vtar illo potius Dei ad vnumquemque nostrum, illo in tempore, salutari hortatu: *Inuoca me in die tribulationis, eruam te, & honorificabis me.* Psal. 49. Dabo verò huius documēti certissimum testem Carolum septimum qui tum desperatissima in re sua, præsentius Dei auxilium est expertus, tum Deo optimo maximo laudes gratiasque dixit publicas; & morum in melius conuersione, Deo bonorum omnium auctori honorem eum habuit, quem ille à nobis potissimum expetit. Plenæ sunt horum exemplorum sacræ historiæ, plena Davidis vita, plena Machabæorum prælia, pleni Iudicum & Regum libri. Vnum illud de historia Ecclesiastica hîc repetam. Attila Hunnorum Rex expugnata Aquileia, ac solo æquatis Concordia, Batauio, Taruisio, Opitergio, Altino vicinis vrbibus in Italiã metu perculsam

vastabundus se effundebat, Romam imprimis quam ad exemplum Alarici immaniter deformare, & barbaris prædæ exponere decreuerat. Iam vrbi appropinquabat, cum Leo Pōtifex Romanus cum simplici Antistitum & Patritiorum ordine in tiara, sacerdotalique amictu ad eum supplex accedit. Qui cum pro Romanorum & totius Italiæ salute deprecaretur, videt ipse Attila duos augustiore specie Heroës qui à dextra læuaque supplicantis Leonis, vibratis gladijs sibi necem, nisi pijs precibus annueret minitabātur. Territus hoc ostento tyrannus, relicto Italiæ solo in Pānonias reducit exercitum. Paulus Diaco. libro decimoquinto rerum Roman.

Quintum
documentum.
rom.

Quintum documentum est. PIIS
MENTIBVS NON ID SPECTAN-
DVM ESSE IN HAC VITA, VT
ÆQVABILI SEMPER RERVM
PROSPERITATE VTANTVR:
PROVIDENDVM IIS ID ESSE, VT
QVÆCVMQVE FVERIT RERVM
CONVER-

CONVERSIO, NVLLAM VIRTVTIS
IMMINVTIONEM ADMITTANT.

Spectatum id est nostra in Ioanna, quam in hostium potestatem belli casus adduxit; ipsa inter hostes, conspectiora dedit exempla constantiæ & virtutis. *Virescit vulnere virtus*. Seneca libro de prouidentia, *Calamitas, virtutis occasio est. Quid mirum, si durè generosos spiritus Deus tentat? nunquam virtutis molle documentum est. Quos Deus probat, quos amat, hos indurat, recognoscit, exercet, eos autem quibus indulgere videtur, quibus parcere, molles venturis malis seruat.*

SEd iam hætenus & historiæ, & docu- Epilogus.
 mentorum satis. Excitavi in hac historia, non sanè iacentem, sed haud satis vnquam commemorandam, sparsimque à multis laudatam variè, ab vno aliquo nondum sat abundè, meo iudicio celebratam, Christianæ nostræ Amazonis Ioannæ Darc prædicabilem omnium gentium linguis, virtutem & gloriam. Pro-

dux rerum admirabilium, quas de ea memoravi, grauiissimos plurimosque testes: defendi ab obrectatorum calumnijs, defensam olim ab integerrimis sapientissimisque viris, testatam publico Europæ, publica, delegatorum ab Apostolica sede, sententia, eius integritatem & innocentiam; collegi aliquot, seu firmamēta meæ causæ, seu vitæ humanæ documenta, quæ in re insita, dissimulari à cōmodo, & commodandi hominum societati studioso historico, minimè debuerunt. Quid multa? Feci rem sanè mihi operosam; at optatam diu, fateor, & periucundam; facere optavi rem & priuatim & publicè vtilem; vtinam spem & voluntatem meam euentus non fallat! Certè quisquis aut Ioannæ Darc pace & bello clarissimæ Virginis, aut Lothareni, Gallicie nominis gloriæ, aut virtuti ipsi non inuidebit, fauebit, opinor, labori meo: tantoq; eum excipiet æquius, quanto diligentiore modestia facere studui, vt ne is cuiquā acerbus aut molestus esset. Vtcunque de mor-

talibus meritis fuero, Deo me spero Divisique gratum fecisse opus: qui hanc historiam ita scripsi, ut statuisset me putem ante hominum oculos, Dei in res humanas spectatissimæ providentiæ monumentum. Neque id ita expleui tamen, ut non etiam multa addi posse intelligam. Sed id erit fortasse alicuius maioris otij, aut mei, aut alterius, qui in hoc argumento, elaborare, cæterosque ante se vincere, pulchrum putabit. Quidquid istud nunc est, totum id doctorum hominum, modò ne maleuolorum, iudicio permitto: Censuræ autem Ecclesiasticæ, multò magis ex animo committo, submittoque.

F I N I S.

LAUS DEO OPT. MAX.
 Virgini Matri, Coelit.
 omnibus.

* *
 *

AVDICT SIEVR HORDAL
SON INTIME AMY, POVR LE
congratuler de l'heureux paracheuement de
son liure, contenant l'honneur & me-
rites de la Pucelle d'Orleans.

T^V obliges la France obligeant la Pucelle,
Qui luy donna secours contre le fier Anglois,
Je mourous donc pour toy: car il ny a François
Qui desireux d'honneur ne d'eust mourir pour elle.

I. D. P.



AVDICT SIEVR HORDAL
POVR LE MESME SVBIECT.

Que l'on ne vante plus d'un Homere la gloire
A chanter, un Virgile d'un AEnce la memoire:
Tu es bien plus, HORDAL, d'une veine meilleure
Empeschant IEANNE D'ARC qu'en la France ne meure.

Vostre tref-affectionné
D. RICHARD.

Acheué d'imprimer le 28. de May, 1612.



PRIVILEGE.

DU ROY.

NOVIS par la grace de Dieu Roy de France & de Navarre, A nostre Preuost de Paris, Bailly de Chaumont, Senechal de Lion, & tous noz autres Iusticiers ou Officiers ou leurs Lieutenants Salut. Nostre amé & feal M. Iehan Hordal Conseiller d'estat de nostre Tres-cher & tres-amé Cousin le Duc de Lorraine Docteur es droicts & Professeur ordinaire en l'Vniuersité du Pont-à-Mousson en Lorraine, Nous a fait remonstrer qu'il auoit depuis peu de temps en ça fait imprimer en l'Vniuersité dudit Pont-à-Mousson l'histoire de la Pucelle d'Orleans sous ce tiltre, *Heroinæ nobilissimæ Iohannæ Darc vulgo Aurelianensis Puellæ historia*. Lequel liure ledict Hordal desireroit de faire vendre & mettre en lumiere en cestuy nostre Royaume. Mais il doute que autres que luy ou ceux auxquels il auroit donné charge se voulsissent ingerer de l'imprimer frustrant par ce moyen leaiect suppliant de son labour s'il ne luy estoit sur ce pourueu de noz lettres à ce conuenables, humblemēt requerant icelles. A CES CAUSES desirant ledict suppliant estre recompensé de son labour, frais & mises, Auons à iceluy permis & octroyé, permettons & octroyons par ces presentes d'imprimer ou faire imprimer, vendre & distribuer par tout nostre Royaume ledict liure sans que autres, que ledict suppliant ou autre ayant droit & pouoir de luy le puisse imprimer ou faire imprimer, vendre & distribuer iusques au terme de six ans à compter du iour & date de l'Impression dudit liure, & ce sur peine de confiscation.

tion desdicts liures & amande arbitraire.

SI VOUS MANDONS & à chacun de vous commet-
tons endroit soy si comme à luy appartiendra que de nostre pri-
uilege & du contenu en iceluy vous faictes & souffrez iceluy
suppliant, & les ayans charger, iouyr & user plainement &
paisiblement, & à ce faire, souffrir & obeyr contraindez
tous ceux qui pour ce seront à contraindre par toutes voyes
& manieres deuës & raisonnables, Car tel est nostre plaisir,
nonobstâtes quelconques lettres à ce cōtraires. Donné à Paris
le dixseptiesme iour de Decembre, l'an de grace Mil six cens
vnze, & de nostre regne le deuxiesme. Et signees PAR LE
ROY en son Conseil, du Lis, & sellees en simple queüe du
grand seel de cire iaune.

Collationé à l'Original par moy Conseiller
Notaire & Secretaire du Roy.

D V L I S.

240-

N.Y.-

360





